

Meerelo a Arumiwi

Madhu oovolowana

Niivuru ndda nilebiwe ni Luka. Nnanona nda vovi oororomela owambeela amohi bawogile. Oliye kaali muZhudewu, aali a oAziya Mung'onong'ono. Alaba vamohi ni murumiwi Pawulo. Luka alebile vakukuuve yaaka ya makumi matanu ni emohi ni yaaka thaaruru (63) Kirixtu agabaliwe.

Niivuru ndda nrawoga dha mwemo Muneba Woweela mwlabeliwa mwa arumiwi amohi voofuna okaraatiha mulogo wa Yesu. Nipara na niivuru ndda fuumwadheya wa Muselu Wapama ni kopolo dha Muneba Woweela.

Ogawanyeya wa niivuru

Wambeeleya wa gerezha oZheruzalemi *1.1 ofiyedha 8.3.*

Omwadheyela wa gerezha ofiya oPalextina *8.4 ofiyedha 11.18.*

Omwadheyela wa gerezha ofiya oAntiyokiya *11.19 ofiyedha 13.12.*

Omwadheyela wa gerezha ofiya oAziya Mung'onong'ono *13.13 ofiyedha 16.5.*

Omwadheyela wa gerezha ofiya oEuropa *16.6 ofiyedha 26.32.*

Omwadheyela wa gerezha ofiya oRoma *27.1 ofiyedha 28.31.*

Ogwelihiwa odhulu wa Yesu

1 ¹Mmudhi aaga Tiyofilu, muniivuru naaga nowambeela gihilebamo dhaatedhene Yesu dhambeeliye wiirana ni osuuziha, ²ofiyedha nlabo nathukuleliwiye odhulu. Nda eera agaavahile magano mwa Muneba Woweela arumiwi yaasakuliliye. ³Wa aliwa ahiyooneyiha agarabule wi mugumi dila dhijinjidhene moohaanganyedha. Yesu owasuuziha dha Omwene wa Mulugu mwa malabo makumi manayi. ⁴Egali vamohi oliye ahaalamula wi ehivenyewo oZheruzalemi mbwenye ejejihege yoororomeliha ya Ababe, yawogiliye wi: “Miyu guwaaddelani ⁵ebaribareene Zhuwawu abathiza ni mahinje, mwa malabo ooyeva nyo munaabathiziwege ni Muneba Woweela”.

⁶Vano ale yatugumanenge yahimukohaga, wiira: “Nabwiya, bu mudhidihi oyene munaawelihedhiinyu a Ezarayeli omwene weewa?”

⁷Oliye ahaakulaga, wiira: “Kadhuufwaneeleni onona mudhidhi, naari wora dhineereye dhego dhedho ababa ekaraatihiliwa ni owodha weewa.

⁸Mbwenye munoodha mwaakele owodha wookitelani Muneba Woweela, muneere okala anamoona aaga mu Zheruzalemi, oZhudeya waatwene ni oSamariya waatwene, ofiyedha omagomelo wa elabo”.

⁹Vano agawaaddele dhego dhaatedhene dhedhi, Yesu ahithukuliwa odhowiwana odhulu, emoonaga. Murabo omukuneela. ¹⁰Vano aliwa yoosugwaga odhulu oliye agwelaga, mowaaguva alobwana abiili yawarilege dhoweela, yahikumelelaga vameentoni veewa, ¹¹wiira: “Nyo aGalileya, mwaha bwaddi mwiimeliliinyu musugwaga odhulu? Yesu oyene othukuleliwe odhulu vaari veenyu, onowela ni mukalelo mmohive wona mmooneliinyu adhowaga odhulu”.

Osakuliwa wa Matiya

¹²Dhigeereye ndo, aliwa yahivelelaga oZheruzalemi, ekumaga omwaangoni weethaniwa Olivera, oli waaddamela nluwa, olapela wa kilomeeturu nimohi. ¹³Vafiyiligiwa yahivolowaga, ogwelela osubini a odhulu wakaliwa. Yaaligi Peduru, Zhuwawu, Tiyago, Andire, Filipi, Tome, Baritolomeyo, Matewuzhi, Tiyago, mwaana a Alifiyu ni Simawu muZeloti^a ni Zhudasi, mwaana a Tiyago. ¹⁴Aatene yootugumanesa mmalobeloni, vamohi ni aharyana teto ni Mariya, maaye Yesu ni addibila a Yesu.

¹⁵Malabo alene Peduru ahiimelaga vaari va ale yaaligivo, wiinjiva weewa waaligi zana ni makumi meenddi (120). Oliye ahiiraga: ¹⁶“Amudhaaga, yaali yoofuneya wi Maleba, yawogile Muneba Woweela odheela mwa Davidi, yaakwanelihiwe yawoga dha Zhudasi, oyene ampelelele Yesu. ¹⁷Oliye aali mmohi mwa hiyo asakuleliwe wi akalena epaddi yoohidda mabasa ala yinnihuna”. ¹⁸(Zhudasi ahigula mudda ni korowa yooliviwa ya yoothega yeeriliye, vevale ahimorela muddibani, opuduwa, marubo okuma twii. ¹⁹Athu aatene oZheruzalemi yahinona eyene, ofiyedha wi mu ewogelo yeewa^b yahithwa ndina na mudda ole Akeledama, eyo enatapulela mudda wa mwazi.) ²⁰Peduru aheenjedhedhaga, wiira: “Vowi dhihilebiwa muniivuru na Masaalimu: ‘Vaade vaaye vikale vaddebe ahikalevo onaamagevo;’^c teto: ‘Mabasa aaye evahiwe muthu mmohiwa.’^d ²¹Mowindo enofuneya wi nimusakule mmohi mwa athu ala yaali ni hiyo mudhidhi waatene oyene waalihi ni Nabwiya Yesu, ²²wambeela obathiziwa waaye ni Zhuwawu, ofiyedha nlabo nathukuliwiye vaari veehu, adhowaga odhulu. Enofuneya mmohi mwa aliwa akale ni hiyo namoona a ovenyihiwa wa Yesu”.

^a 1.13 *AZeloti* Aliwa yaali a nikuru na aZhudewu yeethukulela oPalestina wona anamurala. Aliwa yoofuna wiinyuwela mwa pwere wi yaagonjihe ni wawiiigara aRoma. ^b 1.19 Ewogelo yeewa yaali ewogelo ya Aramayiku. ^c 1.20 Masaalimu 69.25 ^d 1.20 Masaalimu 109.8

²³Yahaathomaga alobwana abiili, Zhuuze, oononeya ni mandina Barasaba, naari wi Zhuxtu, mmohiwa Matiya. ²⁴Nuwindo, yahilobelaga, wiira: “Nabwiya, nyo muhunona mirima dha athu aatene. Munoonihe mwa ala abiili duuvi mmusakuliinyu ²⁵wi ahiddege mabasa ala a orumiwi, Zhudasi yaahiyiliye, adhowaga omburoni waaye-waaye”. ²⁶Vevale yahaweehaga aabiileene, asakuliwe di Matiya; oliye aheenjedhedhiwa wa arumiwi kumi ni mmohi.

Wambeeleya wa gerezha nlabo na Pentekoxte

2 ¹Vano nigafiyle nlabo na Pentekoxte, aatene yaaligi vamohive, mburo mmohive. ²Mowaaguva odhulu wahiiweya oruma, wakalagahi oruma wa pevo yuulubale, wahidhaala nyuba yaatene mwakaraatiligiwa. ³Vano yahoona dhakalagahi wona malumi a munddo, omwadheya, okala va kadda muthu. ⁴Aatene yahidhaaliwaga Muneba Woweela, wambeela owogaga dhiwogelo dhimohi mooligana ni Muneba mwawogiheliwa. ⁵MuZheruzalemi mwahikala aZhudewu yamweebedha Mulugu, yakumile malogo maatene a elabo ya vati. ⁶Ogeweyile oruma wule, mulogo wahitugumana okala wootikina mwaha wi kadda muthu awiiwaga ewogaga ni ewogelo yaaye. ⁷Athu aatene ohaleeliheya ni otikina, aliwa yookohanaga: “Ala aatene enawoga kahuwo aGalileya? ⁸Ki mwaha bwaddi kadda muthu mwa hiyo awiiwaga ewogaga ewogelo ya elabo ebaliiwe?” ⁹(Yaali aPariti, aMediya, aElemi ni ookala oMesopotamiya, oZhudeya ni oKapadosiya, oPonto, oAziya, ¹⁰oFirizhiya, oPamfiliya, wEgubuddu ni a dhipaddi dha oLibiya waaddamela oSirene, amohi aleddo aRoma. ¹¹Amohi mwa hiyo nili aZhudewu woobaliwana, amohi oovolowamo,^e amohi aKereta, aArabe.) “Hiyo nnowawiiwa ewogaga dhootikiniha dha Mulugu ni dhiwogelo dheehu-dheehu”. ¹²Aatene yahitikina ohaleeliheya, yookohanaga kadda muthu ni mukwaaye yiiraga: “Elaya enatapulela ddi?” ¹³Vano amohi yowaabeddaga, yiiraga: “Ala emulezele vinyu”.

Olaleya wa Peduru

¹⁴Mbwenye Peduru ahiimelaga vamohi ni ale kumi ni mmohi, vano oliye ni ndhu nootaama ahiwogaga ni aZhudewu, wiira: “Nyo alobwana a oZhudeya ni nyo mwaatene munakala oZheruzalemi wuno, mmaale wi guwaaddeleni. Mvuruwane pama. ¹⁵Kahuwo mwemo wona munoo-buweliinyu, athu ala kiire olezela, vovi mudhidhi oli wora tanu ni nnayi dha bebeh! ¹⁶Ela eneereya siyeene yawogile namavuhulela Zhoueli, yeeriliye:

^e 2.11 *Ovolowamo* yeeriwa aporoselitu ale yarumeedha obathiziwa, okutha mu nyuba ya Mulugu ni yahiieliwa.

- 17 “Mulugu wiire: Malabo oomariha ginoodha gikuthulele
Muneba waaga mmirimani mwa athu aatene,
azombwe ni anamwali eenyu eneerege ovuwiha mutheenga waaga,
Azombwe eenyu eneerege woona dhootikiniha dha Mulugu,
anakalaba eneerege oroha dhoovuhulela.
- 18 Wa amwiimeleli aaga aalobwana ni aahiyana
gineere waakuthulela Muneba waaga malabo ayene,
vano aliwa eneerege ovuwiha mutheenga waaga.
- 19 Gineere wiirana dhootikiniha odhulu ni elabo ya vati,
mwazi, munddo, ni murabo woothuwa mwiisi.
- 20 Nduwa nnoodha nsadduwe epipi,
mweeri onoodha osadduwe mwazi
nihinafiye nlabo noothithimiheya na Nabwiya.
- 21 Vano aatene ayene eneethane
ndina na Nabwiya eneere ovulumusiwa’^f

22 “Nyo aEzarayeli, vuruwanani madhu ala. Yesu muNazarethi ohuvu-
wihwi ni Mulugu vameentoni veenyu. Ohuvuwihwi odheela mwa
dhootikiniha ni dhitoonyihedho dhedho Mulugu dheeriyena vaari
veenyu odheela mwa oliye wona munoneliinyu. ²³Yesu ola ahipelekiwa
wona mwemo Mulugu mwasasanyedheliye, vano nyo ompa, omuko-
mela vamuraddini mookamihedhiwa ni athu ooholowa. ²⁴Mbwenye
Mulugu ahimvenyiha muukwani. Opadha mingoyi dhookwa wovi dhaali
dhohaandeya wi okwa omuwadeelele. ²⁵Vevale Davidi awogaga dha
Yesu, ahiira:

- “Goomoonave Nabwiya vameentoni vaaga.
Oliye oli omoononi waaga wooja, mwaha wovi gihithikeye.
- 26 Fivevo murima waaga onohagalala,
nlumi naaga nnothaba;
mwiili waaga teto oneere ovuma moojejiha,
- 27 wovi kamunaahiye egumi yaaga mburo wa anookwa,
kamunaamwihiye Oweela eenyu avudde.
- 28 Nyo muhuginoniha dila dha egumi,
muneere ogidhaaliha ohagalala vookala ni miyo’^g

29 “Amudhaaga, mugihiye guwaaddeleni mwa ebaribari dha nikolo
neehu Davidi. Oliye ahikwa, ologohiwa, nsiye naaye nili vaari veehu
ofiyedha peeno. ³⁰Mbwenye oliye aali namavuhulela, ahinona wi
Mulugu ahimuroromeliha mwa olibela wi eere omuhabihavo mmohi

^f 2.21 Zhoueli 2.28-32 ^g 2.28 Masaalimu 16.8-11

mohi korowadha waagawelaga ale yahanna, mooligana ni ohaleliwa wa kadda muthu. ⁴⁶Malabo maatene yootugumana mu nyuba ya Mulugu ni murima mmohive. Yoogwaddanya mukaathe vamohi mmavade mweewa, moohagalala ni mirima dhoopwaasa, ⁴⁷emutamaalaga Mulugu. Athu aatene yoodhiveliwa ni aliwa. Nlabo ni nlabo Nabwiya owaweenjedhedha ale yavulumusiwa.

Oyilihiwa wa muthu abaliwe ni meddo dhookwadhene

3 ¹Nlabo nimohi Peduru ni Zhuwawu egwelaga edhowaga nyuba ya Mulugu mudhidhi wa malobelo (wora thaaruru dha ciguwo). ²Athu amohiwa yoomuthukulelesa vamulago va nyuba ya Mulugu mulobwana ookwa meddo mbaliwelo. Malabo maatene yoomukaraatihesa vevale, vamulago weeriwa Mulago Wooriya wi oliye aalobege korowa ale yavolowa mu nyuba ele. ³Oliye agawoonile Peduru ni Zhuwawu evolowaga nyuba ya Mulugu ahaalobaga korowa. ⁴Aliwa yahimusugwesesa, vano Peduru ahiiraga: “Onisugwe hiyo!” ⁵Oliye ahaasugwaga ajejihedhaga waakela yego wa aliwa.

⁶Mbwenye Peduru ahiiraga: “Kaginna parata naari oro mbwenye ginniimina, ginowuvaha. Mu ndina na Yesu Kirixtu, muNazarethi, weedde!” ⁷Vevale Peduru ahimwihiddeelaga ndada na moonoo wooja, omwiimesa. Mowaaguva manyalo aaye, dhipothokoro dhaaye dhahilibaga. ⁸Ahivenyaga mwa kopolo, wiimela, wambeela weedda. Vano ahivolowaga vamohi ni aliwa mu nyuba ya Mulugu, eeddaga, alupaga, amutamaalaga Mulugu.

⁹Athu aatene vamooneiligiwa eeddaga amutamaalaga Mulugu, ¹⁰yahimudidelaga wi duuleene akaraatesa alobaga korowa va Mulago Wooriya wa nyuba ya Mulugu. Aatene yahirurumuwaga, otikinaga ebaribareene ni dhedho dhamwiireyele.

Olaleya wa Peduru mu nyuba ya Mulugu

¹¹Ooyilihiwa ole ahimuwadeelelaga Peduru ni Zhuwawu, vano athu yatikinaga, yahaathamagelaga aliwa omburoni weethaniwa Nikodde na Salomawu. ¹²Yoonaga nde, Peduru ahiiraga: “AEzarayeli, mwaha bwaddi munatikina nda? Mwaha bwaddi munanisugweliinyu wona omweeddihile muthu ola di hiyo ni kopolo dheehu, naari thagaraga dheehu?” ¹³Mulugu a Abarahamu, a Ezaaki ni a Yakobo, Mulugu a makolo eehu, ohumuthithimiha mwiimeleli aaye Yesu, oyene ampelekiliinyu wi apiwe, mwahimukoodda vameentoni va Pilatu, naari athongileve wi Yesu atapuliwe. ¹⁴Mbwenye nyo omukoodda Yesu, Oweela murima Apama. Oloba wi mutapuleliwe namapa. ¹⁵Nyo mwahimpa Namavaha egumi, oyene Mulugu ohumvenyiha muukwani. Hiyo nili anamoona a dhedho! ¹⁶Mwaha woororomela ndina na Yesu, ndina nenddo thiihile

wi mulobwana ola munamooniinyu, omunoniliinyu ayile. Odheela mwa nrromelo mwa oliye thimvahile egumi yowaakwana wona mwaatene munamooneliinyu.

¹⁷“Amudhaaga, dhiinova miyo gihinona wi nyo ni asogoleli eenyu mwiirilena dhedhi mwaha woohunonelamo. ¹⁸Mbwenye Mulugu ohaakwaneliha odheela mwa mukalelo wa dhedho dhawogiliye ni anamavuhulela aatene wi Kirixtu onoodha arabulihwiwe. ¹⁹Mutthwaruwe mirima dheenyu, muwelele wa Mulugu wi dhithimihiwe dhoothega dheenyu, ²⁰mowindo midhidhi dhoovuma dhinoodha vameentoni va Nabwiya teto oorumihedheni Kirixtu, oyene oosakuleliiyeni, oli Yesu. ²¹Eli yoofuneya wi oliye akale odhulu ofiyedha waakwanele mudhidhi oyene Mulugu oneeriye awomihedhe dhaatedhene. Eli wona mwawogeliye odheela mwa anamavuhulela aaye oweela mirima. ²²Vowi Mozezi ahiira: ‘Nabwiya Mulugu oneere omusakula mmohi vaari va emudhi yeenyu wi akale namavuhulela eenyu wona miyo; mmwiiwelelege mwa dhaatedhene dhinowaaddeligiyyeni.’¹ ²³Oyene ohunamwiiwelelege namavuhulela ole onoodha abwanyuliwe mowindo avenyihwiwe va mulogo waaye’.^m

²⁴“Anamavuhulela aatene, wambeela Samuweli, ofiyedha yadha mundduli, yahiwoga, yoolaleya dha malabo alena. ²⁵Nyo muli ahima a anamavuhulela, ahima a nipangano Mulugu neeriliyena ni abaabi eenyu awogaga ni Abarahamu, eeraga: ‘Odheela mwa anamabaliwelamo’ⁿ aawo malogo maatene a elabo ya vati enoodha ereelihiwe’.^o ²⁶Mulugu agamvenyihile muukwani Mwiiemeleli aaye, ambeele omuruma wa nyo wi ooreeliheni, ootthwaruwihagani dhoothega dheenyu”.

Othongiwa wa Peduru ni Zhuwawu

4 ¹Peduru ni Zhuwawu ewogagave ni athu, yahidha anamakutha amohi ni mpogo a anamaang'anela a nyuba ya Mulugu ni aSaduseyi. ²Aliwa yaali ootakaleliwa mwaha wi arumiwi abiili ala yowaasuu-zihya athu ni olaleyela wi mwa Yesu muhukala ovenyihwiwa muukwani. ³Mowindo yahaahidda Peduru ni Zhuwawu vovi wahiriba yahaafugela ofiyedha bebehi. ⁴Mbwenye athu ajinji yeewile madhu ale yahiroromela. Wiinjiva wa alobwana yaroromele yaali vakukuuve macikwi matanu (5.000).

⁵Ode ogasile apogo a aZhudewu, asogoleli eewa ni anamasuuzihya a malamulo yahitugumanaga oZheruzalemi. ⁶Yaaligi vevale Annasi, musogoleli a anamakutha ni Kayifa, Zhuwawu, Alixandere ni amohi yaali a emudhi ya musogoleli a anamakutha. ⁷Yahidhoweliwa waadhana va-

¹ 3.22 Deteronomiyo 18.15 ^m 3.23 Deteronomiyo 18.19 ⁿ 3.25 Naari wi: *namabaliwelamo*. ^o 3.25 Wambeela 22.18

meentoni veewa Peduru ni Zhuwawu, wambeela waakoha: “Owodha baani naari ndina nawani muneeriinyuna dhego dhi?”

⁸Peduru, agadhaaliwe Muneba Woweela, ahawaakula, wiira: “Nyo apogo ni asogoleli, ⁹munanikoha hiyo peeno dha mayilihelo a muthu ooragala ola. ¹⁰Munone nyo mwaatene, munone teto aEzarayeli mwaatene wi mwa ndina na Yesu Kirixtu muNazarethi, oyene amukomeliinyu, Mulugu amvenyiha muukwani, mwa ndina naaye thimuyilihe muthu ola wiimelile vameentoni veenyu. ¹¹Yesu ola,

“thi nibwe nakooddiliinyu, nyo anamamaga nyuba,
ndda nihisadduwa okala nibwe noohiddeela nyuba.’p

¹²Kalivo mmohi naari onavulumusa. Vowi elabo ya vati, kanilivo ndina nimohi nivahiwe vaari va athu wi nivulumusiwena”.

¹³Apogo ale yahitikiniheya vowoona oliba murima wa Peduru ni Zhuwawu teto voonona wi yaali athu yahasuuzile malamulo, odidela wi yakalesa ni Yesu. ¹⁴Vano vomoona muthu ole ayilihiwe ageemelile vakukuuve ni Peduru ni Zhuwawu, kayaandile waavaanya. ¹⁵Mowindo yahaalamula wi evenyevo vamutugumanoni, ohala ekohanaga aliweeneve, ¹⁶yiraga: “Nawiirole ddi alobwana ala? Vowi aatene enakala mu Zheruzalemi ehinona wi ehiirana etoonyihedho yootikiniha vameentoni va nlogo, kannaande ovaanya. ¹⁷Mbwenye vowoova wi bili ela enamwadheyele mwaatemwene, naawaraalihe, mowawoopopiha wi ehiwelele owoga ni muthu mu ndina na Yesu”.

¹⁸Egeere ndo yahaawiithana waalamula, wiira: “Ehidhe eromola naari osuuziha dha ndina na Yesu”. ¹⁹Mbwenye Peduru ni Zhuwawu yaha-waakulaga, wiira: “Othonga wa Mulugu oni avi, eli pama wuwiiwelelani nyo naari omwiiwelela oliye? Muthonge. ²⁰Kadhinaandeya wi hiyo nihiye owoga dhego dhooniliihu, dhiwiliihu”.

²¹Egawoopopihile mookwaranya yahaahiya wi edhowege, kayaandile wawooniha goyi mwaha wa nlogo, vowi noomuthithimiha Mulugu mwaha wa nde dheereyile. ²²Muthu oyo ayilihiwe ni etoonyihedho yootikiniha ele, anna yaaka dhookwaranya makumi manayi.

Olobela wa ooromela

²³Peduru ni Zhuwawu egatapuliwe yahivelela wa akwiiwa, wa-waaddela dhaatedhene dhawogiliiwa apogo a anamakutha ni asogoleli a aZhudewu. ²⁴Egeewile dhedhi yahigweliha madhu eewa wa Mulugu ni murima mmohive, yiraga: “Kingi di nyo, mpaddusile odhulu ni elabo ya vati, nyaza ni dhaatedhene dhili mwemo, ²⁵nyo mwahiwoga mwa Muneba Woweela odheela mwa mwiimeleli eenyu, babiihu Davidi mwiiraga:

“ Mwaha bwaddi malogo enatakaleliwiiwa
ni malogo eneenyuuwela ebeweene?

²⁶ Mamwene a elabo enovenyedha, anamathonga ehitugumanela,
omvenyedha Nabwiya, omvenyedha oosakuliwa aaye.^q

²⁷Ebaribareene Heroddi ni Pontiyo Pilatu, vamohi ni athu oode ni aEza-
rayeli yahitugumana muluwani mu, omvenyedha mwiimeleli eenyu
oweela murima Yesu, amusakuliinyu. ²⁸Aliwa ehiirana dhaatedhene
nde kopolo dheenyu ni owodha weenyu wasasanyedhiliinyu wale wi
dhiireye. ²⁹Vano Nabwiya, moone woopopihiwa weehu, munikami-
hedhe amwiimeleli eenyu niwogege madhu eenyu mooliba murima,
³⁰mutadeele madada eenyu wi athu eyilege, dhiireyege dhitoonyihedho
dhootikiniha, odheela mu ndina na mwiimeleli eenyu oosakuliwa”.

³¹Egamalile olobela, mburo olene watugumanigiwa wahithikeya-
ga. Aatene yahidhaaliwa Muneba Woweela, wambeela olaleya madhu a
Mulugu mooliba murima.

Omohi wa oororomela

³²Nikuru naatenene na oororomela naali na murima mmohive
ni moobuwelelo mamohive. Kaalivo muthu eera: “Nda dhinniimina
saaga-saaga”, mbwenye kadda muthu ooveleela dhaaye wi dhikale dha
athu aatene. ³³Arumiwi yowiiwela onamoona ni kopolo dhuulubale wi
Nabwiya Yesu ahivenyihiwa muukwani, mahala yaali ni aliwa aatene.
³⁴Vaari veewa kavaali muthu ootuweliwa yego, mwaha wi ale yanna
mudda naari nyuba yooguliha odhana korowadha, ³⁵oveleela wa aru-
miwi, vano yoomugawela kadda muthu mooligana ni ohaleeliwa waaye.

³⁶Wahikala muthu mmohi a nlogo na aLeevi a oXiperi, eeriwa Zhuuze,
oyene arumiwi yamuthwiliwa ndina na Baranabe, nnatapulela “mwaana
oolibiha murima”. ³⁷Ahiguliha mudda wanniiyena, odhana korowadha,
oveleela wa arumiwi.

Ananiya ni Safira

5 ¹Aali mulobwana mmohi eethaniwa Ananiya, ahikalana mwih-
yanaaye eethaniwa Safira. Aliwa yahiguliha mudda weewa.

²Mowiiwanana ni mwihiyanaaye ahilogoha epaddi emohi ya korowa
nde wi dhikale dhaaye, dhahalile yahidhana, oveleela mmadani mwa
arumiwi.

³Mbwenye Peduru ahimukohaga, wiira: “We Ananiya, orumeedhele
ddi wi murima waawo odhaaliwe ni Sathana, ofiyedha onyengetha Mu-
neba Woweela ologoha korowa dhimohi dha mudda waawo wi dhikale

dhaawo? ⁴Mudda oyo ohunagulihe kawaali waawo? Ki ogagulihile koro-wadha kadhaali muuthongini mwaawo? Ki wuubuwele addi wiira eyene mmurimani mwaawo? We kawaarathele athu mbwenye oxixile omurathele Mulugu!”

⁵Vevo Ananiya veewiligiye madhu ayo ahitongwa, okwela vevo. Athu yeewile dhedho yahoova vajinji. ⁶Nuwindo, azombwe yahivenyaga, okuneela mwiili waaye, othukulela ode, ologhiwa.

⁷Dhigavirile wora thaaru, ahivolowa mwihiyanaaye ahinonile yapadduwile. ⁸Peduru ahimukoha: “Ogaaddele mutheengo wagulihiliinyu mudda, buulena?”

Oliye ahaakula: “Ee, buuyene”.

⁹Peduru ahiiraga: “Mwaha bwaddi mwiiwananela onyengetha Muneba wa Nabwiya? Woone! Vamusiwoni vo manyalo a athu yagele omulogoha mamuno, eneere teto wuuthukulela ode”.

¹⁰Mudhidhi olene ahitongwaga, okwela vamanyaloni va Peduru. Vano azombwe yahivolowa, omfwanya agakwile, omuthukulela ode omulogoha vamohi ni mamune. ¹¹Woova wuulubale wahaadheela athu aatene a gerezha ni athu aatene yeewile dhoopadduwa ndo.

Dhitoonyihedho ni dhootikiniha

¹²Arumiwi yowairana dhitoonyihedho ni dhootikiniha dhijinji vaari va athu. Yootugumana ni murima mmohive muKodde mwa Salomawu. ¹³Kaalivo aliba murima wi atugumanega ni aliwa, mbwenye athu aatene yowaatthettheela. ¹⁴Yowiinjiva mookwaranya oororomela yamuroromela Nabwiya, anamwinji alobwana ni ahiyana. ¹⁵Athu yowaadhana aredda murampani, waakaraatihaga mmakamani ni mmoolilini wi Peduru aaviraga murinti waaye waafwanyege amohi. ¹⁶Yootugumana teto athu ajinji ookumela maluwa owaaddamana ni Zheruzalemi, yowaadhana aredda eewa ni ale yarabulihwiwa ni mineba dhabure; athu aatene yooyilihiwa.

Oharahariwa wa arumiwi

¹⁷Musogoleli a anamakutha ahivenyaga, vamohi ni akwaaye aatene (a nikuru na aSaduseyi), odhaaliwa nrima, ¹⁸yahaahidda arumiwi waafugela mukaambura yoononeya. ¹⁹Omahiyuni mungero a Nabwiya, ahifugula misiwu dha kaambura, waakumihedha ode, wawaaddela, ²⁰wiira: “Dhowani nyuba ya Mulugu, mweemele, mwawaaddelege athu dha madhu maatene a Egumi Ela”. ²¹Egeewile dhedho, yahivolowaga nyuba ya Mulugu bebeh, wambeela osuuziha.

Musogoleli a anamakutha agafiyile ni akwaaye ale ahiithaniha mutugumano wa Nikuru nuulubale, ela sowi nikuru na apogo a aZhudewu. Vano yahaarumaga athu wi edhowe okaambura yaadhena arumiwi

ale. ²²Mbwenye athu ale egafiyilewo kayaafwanyilewo, egawelilewo, yahawaaddela. ²³Wiira: “Nifwanyile kaambura egali yoofugiwene, ebaribareene anamaang'anela egeemelile vamisiwo mbwenye nigafugulile dhisewo, kanimfwanyilemo muthu”. ²⁴Vevo mpogo a anamaang'anela a nyuba ya Mulugu ni apogo a anamakutha egeewile madhu alena yahihaleeliheya, wuubuwelelaga, wiira: “Ki epadduwile ddi?”

²⁵Ahifiya muthu mmohi, wiira: “Moone, alobwana ale yaafugeliinyu mukaambura, yiimelile vathaddo va nyuba ya Mulugu, enaasuziha athu”. ²⁶Vevo anamaang'anela ni mpogo eewa yahidhowaga waathukula arumiwi ale, mbwenye kayaathukule mwa kopolo naari, vovi yawoova athu wi enaavonye ni mabwe.

²⁷Egaafiyilena yahawiimelihaga vameentoni va Nikuru nuulubale na apogo a aZhudewu. Vano musogoleli a anamakutha ahaakohaga, ²⁸wiira: “Hiyo kanokooddihileni wi kamusuuzihege ndina na Yesu? Mbwenye moone, nyo muhudhaaliha mu Zheruzalemi mwaatemwene ni dhoosuuziha dheenyu, munafuna onidheelana muladdu wa mwazi wa muthu ola”.

²⁹Peduru ni arumiwi amohi yahaakulaga, wiira: “Enofuneya omwiiwelela Mulugu ohiya omwiiwelela muthu! ³⁰Mulugu a makolo eehu ahimvenyiha muukwani Yesu oyene mwampiliinyu, mmukomela vamuraddini. ³¹Mulugu ohumugweliha wi akale Kingi ni Mvulumusi, omukaraatiha omoononi waaye wooja wi avahege otthwaruwa ni oleveleliwa dhoothega aEzarayeli. ³²Hiyo nili anamoona a dhoopadduwa dhedhi teto Muneba Woweela, oyene Mulugu waavahiliye ale enamwiiwelela”.

³³Egeewile ndo yahitakaleliwaga, ofunaga waapa. ³⁴Mbwenye mFari-zi mmohi, eeriwa Gamaliyeli, namasuuziha a malamulo, arihihiwa ni athu aatene, ahiimelaga va Nikuru nuulubale na apogo a aZhudewu, ahilamulaga wi arumiwi ale ekumihiwemo mudhidhi vang'ono. ³⁵Oliye ahiiraga: “Alobwana, aEzarayeli, muubuwelele pama dhinafuniinyu wawiiwela athu ala. ³⁶Malabo amundduli ahikumelela muthu mmohi eeriwa Tewudasi, axixile wiivuwiha, athu owaakwana mazana mannayi (400) yahimurumeedha. Oliye ahipiwa, aatene yamuhara yahibalaleya, omaala. ³⁷Dhigeereye ndo, malabo oolebela ahikumelela mmohi muGalileya, eeriwa Zhuda asogolela nikuru nimohi nowiinyuwela. Oliye teto ahipiwa, aatene yamuhara yahibalaleya. ³⁸Mowindo va mwaha olena miyo ginowuubebedhani mwaahiye alobwana ala mwa murenddele. Akala dhoofuna naari dhowiira dheewa dhinakumela mwa muthu dhinomala. ³⁹Mbwenye akala dhinakumela wa Mulugu, nyo kamunaakwaniha omariha. Pole-pole, munaadhe muwanenge ni Mulugu”.

⁴⁰Aliwa yahirumeedhela dhoowoga dha Gamaliyeli. Yahawiithanaga arumiwi ale, waawaxula, waahiiha wi ehiwogege ndina na Yesu. Vano yahaahiya odhowaga.

⁴¹Arumiwi yahivenyavo va Nikuru nuulubale na apogo a aZhudewu ni ohagalala, mwaha wowi Mulugu ahaweelengela okala oofwanelela onyemuliwa mwaha wa ndina na Yesu. ⁴²Mbwenye malabo maatene mu nyuba ya Mulugu ni mmavade kayahiyile osuuziha ni olaleya Muselu Wapama wi Yesu di Kirixtu.

Osakuliwa wa maddiyakoni atanu ni abiili

6 ¹Malabo alene anamasuuziye yeenjedhedheyaga, aZhudewu yawoga eGerego yowawaaba aZhudewu yawoga eHeberi, vovi amaamukwele eewa kayapwathiwa vamagawelo dhooja. ²Vevele arumiwi kumi ni abiili ale yahaatugumanya anamasuuziye aatene, wiira: “Kadhinakala pama ohiya olaleya madhu a Mulugu wi nawimelelege athu vooja. ³Amudhi, mwaasakule vaari veenyu alobwana atanu ni abiili a bili yapama, oodhaaliwa Muneba, atthotho. Naavahe aliwa mabasa ayene, ⁴vano hiyo nikalele ntidi olobela ni ohidda mabasa a madhu a Mulugu”. ⁵Dhoowoga nda dhahaadhivela anamwinji aatene. Yahimusakula Extevawu, muthu oodhaaliwa nrromelo ni Muneba Woweela, yahimusakula teto Filipi, Porokoro, Nikanoro, Timoni, Paramenasi ni Nikolawu avolowile mu eZhudewu, aali a oAntiyokiya. ⁶Yahaavelelela wa arumiwi, aliwa olobela, waahela madada.”

⁷Vano madhu a Mulugu yoomwadheya. Anamasuuziye yoweenjedhedheya vajinji mu Zheruzalemi; teto anamakutha ajinji yahirumeedha Muselu Wapama.

Omagiwa wa Extevawu

⁸Extevawu, oodhaaliwa mahala ni owodha, owiirana dhootikiniha ni dhitoonyihedho dhuulubale vaari va athu. ⁹Mbwenye yahivenya amohi a mburo weethaniwa Nyuba ya Matugumano Yowooboliwa. Yaali a oSirene, a oAlixandiriya, a oSilisiya ni a oAziya. Athu ala yoovaanyihana ni Extevawu. ¹⁰Mbwenye kayaakwanihile omvaanya dhawogiyiye, vovi awoga ni tthotho dha Muneba Woweela.

¹¹Vano yahaanyingala alobwana amohi wi yeerege: “Nihimwiwa awogaga madhu oonyemula, amunyemulaga Mozezi ni Mulugu”. ¹²Mowindo yahitatamula nlogo, asogoleli a mutugumano ni anamasuuziye a malamulo. Vano yahifiya, ommaga Extevawu, omudhowana oNikuruni nuulubale na apogo a aZhudewu. ¹³Yahivelelela onamoona wooratha, yoowogaga, yiiraga: “Mulobwana ola kanahiya owoga dhoonyemula mburo woweela ola teto ononyemula Malamulo. ¹⁴Nihimwiwa oliye awogaga, eeraga: ‘Yesu oyo muNazarethi, onoodha abwanyule mburo ola ni ocenja dhoolemelelela dhedho Mozezi dhinivahiliye’ ”.

^r 6.6 *Waahela madada* waali waasakulela mabasa, teto dhatoonyihedha wi Mulugu eere waavaha owodha woohiddana mabasa ale.

¹⁵Aatene yakaraatilege Nikuru nuulubale na apogo a aZhudewu yahoo-naga kove yaaye efwanafwanaga ni kove ya mungero.

Waakula wa Extevawu

7 ¹Vano musogoleli a anamakutha ahimukohaga Extevawu, wiira: “Nda dhinawogiwa, ebaribari?”

²Oliye ahaakulaga, wiira: “Alobwana, addibila ni abaabi, mvuruwane! Mulugu a nthithimiho ahimooneyela babiihu Abarhamu agali oMesopotamiya, ahinamage oHarani. ³Mulugu omwaaddela, wiira: ‘Ohiye elabo yaawo, emudhi yaawo, odhe elabo eyene gineeriimi guutoonyihedhe’.^s

⁴“Vano ahivenyaga elabo ya aKalideya, omaga oHarani. Wewule, babe agakwile, Mulugu ahimutamihedha Abarhamu elabo ela eliinyu. ⁵Kaavahiwe elabo, naari mburo wowaakwana nnyalo, mbwenye ahimuroromeliha omvaha elabo ela wi ekale yaaye ni ya anamabaliwelamo aaye, naari ahannave mwaana. ⁶Mulugu ahimwaaddela wi anaaye a musogolo yaakale anaweendda mu elabo ya amohi. Yiiriwe adhaari, erabulihiwe ofiyedha yaaka mazana mannayi (400). ⁷Mulugu ahiira: ‘Miyo gineere othonga nlogo nddo nnaarabulihe wona adhaari, dhavira nda anaawo enoodha ekumemo, egeebedhege mburo oleni.’^t ⁸Vano Mulugu ahimvaha Abarhamu nipangano nowiinelwa: Mowindo Abarhamu ahimbala Ezaaki, omwiinela vigavirile malabo matanu ni maraaruru. Ezaaki ahimbala Yakobo. Vano Yakobo ahaabala makolo eehu kumi ni meenddi.

⁹“Vano makolo eehu ale yahimuguliha Zhuuze wEgubuddu, mwaha wa nrima, mbwenye Mulugu aali ni oliye. ¹⁰Ahimvulumusa mwa dhoorusa dhaaye dhaatedhene, omvaha mahala ni tthottho, Farawo, mwene a wEgubuddu, aganonile nde, ahifiyedha omvaha osogoleli wa wEgubuddu ni vaade vaaye vaatevene.

¹¹“Vano wahidha dala elabo yaatene ya wEgubuddu ni oKanani, wahi-kala goyi yuulubale, makolo eehu kayanna yooja. ¹²Yakobo ageewile wi elabo ya wEgubuddu ohukala tirigu, ahaarumawo makolo eehu olendo wowambeela. ¹³Olendo wa nabii, Zhuuze ahiinoniha wa addibile. Vano nihimo na Zhuuze nahinoniwa wa Farawo. ¹⁴Zhuuze ahirumiha omwiithana babe, Yakobo ni amudhi aaye aatene, yaali athu makumi matanu ni meenddi ni atanu (75). ¹⁵Yakobo ahikitela wEgubuddu, okwela wewo teto ni abaabi eehu. ¹⁶Yahithukuliwawo, odhowiwana oXikemu, oheliwa munsiyeni Abarhamu naguliliye wa ahima a Hamori oXikemu ni korowa.

¹⁷“Waaddamelaga mudhidhi wowi Mulugu aakwanelihe ororomeliha waaye walibeliye wa Abarhamu,” nlogo neehu naheenjedhedheya

^s 7.3 Wambeela 12.1 ^t 7.7 Wambeela 15.13-14 ^u 7.17 *Yoororomeliha* Ela yaali yowi Mulugu eere waavenyiha muudhaarini wEgubuddu. Moone Wambeela 15.13-14.

vajinji wEgubuddu. ¹⁸Vano mwene mmohiwa ahaamunonile Zhuuze, ahambeela osogolela wEgubuddu. ¹⁹Mwene ole oonyengetha nlogo neehu, wawoonihaga goyi makolo eehu, owaawaddihedha waathathila aniiwa a manyenya wi ekwege.

²⁰“Mudhidhi olene wabaliwe Mozezi, Mulugu ahuubuvela wi aali mwaana ooriya vajinji. Aleliwe vaade va babe mweeri miraaru.” ²¹Mozezi vathathiliwiiye, mwaana-mwihiyana a Farawo omuddodda, omulela wona mwaana aaye-aaye. ²²Mozezi asuuzihiwe ni ononelamo waatewene wa aEgubuddu, aali muthu awoga ni wiirana mwa owodha.

²³“Mozezi aakwanihaga yaaka makumi mannayi, ahimaruwela waweeddelala addibile, aEzarayeli. ²⁴Agamoonile muthu oonihiwaga goyi, ahimuthiithihedhaga, odhana othongi, woomba mwEgubuddu. ²⁵Oliye oobuwela wi addibile yeere wiiwelelamo wi Mulugu afuna aavulumuse odheela mwa oliye, mbwenye kayeweleele. ²⁶Nlabo nooharela Mozezi ahawaaddamelaga aEzarayeli abiili yawanaga. Ahixixa wiirana murenddele, eeraga: ‘Alobwana, muli oddibila; munawanala ddi?’ ²⁷Mbwenye ole amuddwadhaga mukwaaye ahimutukumaga Mozezi, wiira: ‘Wuusakule okala musogoleli ni onithonga hiyo baani?’ ²⁸Onafuna teto ogipe wona ompeliwe mwEgubuddu ndilo?’” ²⁹Mozezi ageewile dhedho ahithawelaga oMidiyani, okala wewo wona mwanaweendda, ahaabalawo anaalobwana abiili.

³⁰“Dhigavirile yaaka makumi mannayi mwiiddedereni mwa Mwaango Sinayi, mungero ahimooneyela Mozezi vanlumini na mundo vanikupuni. ³¹Mbwenye Mozezi agoonile ahitikinaga ni nde dhoonili-giye, aaddamelagavo ahiiwaga ndhu na Nabwiya: ³²‘Miyo gili Mulugu a ababo, Mulugu a Abarhamu, Mulugu a Ezaaki ni Mulugu a Yakobo.’” ³³Vano Nabwiya ahiiraga: ‘Okurule satho mmanyaloni mwaawo, mwaha niburo viliwe thi noweela. ³⁴Gihooona orabula wa mulogo waaga wEgubuddu, gihiiwa wuundda weewa, gihikita wi gawoobole. Odhe dhiinova, guurume wEgubuddu.’”

³⁵“Mozezi di oyene aEzarayeli yamukooddiliwa, yiiraga: ‘Wuuvahile okala musogoleli ni onithonga hiyo baani?’” ³⁶Oliye ahirumiwa ni Mulugu wi akale mpogo ni namoobola odheela mwa mungero ole amooneyele vanikupuni. ³⁶Oliye ahaavenyihawo aEzarayeli wEgubuddu eerihedhaga dhootikiniha ni dhitoonyihedho mwiilaboni mule, ni mu Nyaza Yoofiila, mwiiddedereni mwa yaaka makumi mannayi.

³⁷“Mozezi di oyene awogile ni aEzarayeli: ‘Mulugu oneere omvenyiha namavuhulela mmohi wa nyo, ooligana ni miyo, oosakuliwa vaari va addibilinyu’” ³⁸Di Mozezi aali vamutugu-

∇ 7.20 Okuma 2.2 √ 7.28 Okuma 2.14 × 7.32 Okuma 3.6 √ 7.34 Okuma 3.5,7-8,10
 z 7.35 Okuma 2.14 a 7.37 Deteronomiyo 18.15

manoni mwiideddereni ni mungero awogiiyena oMwaangoni Sinayi ni makolo eehu, aakelile madhu a egumi wi anifiyihe-dhe hiyo, ³⁹oyene makolo eehu yamukooddiliwa omwiivelela, emvaanya efunaga owelela wEgubuddu; ⁴⁰voomwaaddela Aro-ni wi: ‘Anisasanyedhele amilugu oonisogolela, vowi Mozezi ole onivenyihile wEgubuddu, kannonile emwiireyele!’ ⁴¹Mudhidhi olene yahimusasanya mulugu oosemiwa ooligana ni ng'ombe. Yahidheelana mikutho, yahithabela mabasa yasasanyiliwa. ⁴²Mbwenye Mulugu ahaarabela, waapeleka weebedha nduwa, mweeri ni ttendderi mooligana ni dhedho dhilebiwe muniivuru na anamavuhulela:

“We, nyuba ya Ezarayeli,
wagipelekela miyo mikutho ni dhoovaha mwa
yaaka makumi mannayi nde mwiideddereni?
⁴³ Moohiyaniha, wathukula musasa wa Moloki,
ni ttendderi, mulugu aawo Refani,
vamohi ni dhoofwanafwaniha
dhisasanyedhiwe wi weebedhege!
Mowindo ginowuukwaranyihedha oBabilooniya’.^b

⁴⁴“Vaari va makolo eehu mwiideddereni vahikala musasa wa onamoona. Wasasanyiwe mooligana ni makalelo ayene Mulugu yamulamuleliye Mozezi. ⁴⁵Egaakelile musasa wa onamoona makolo eehu ni Zhouwe, yahidhowana vathukuliwa dhilabo dha malogo, ayene Mulugu yawiigariliye vameentoni veewa. Musasa ola wahi-logelave elabo elene ofiyedha mudhidhi wa Davidi, ⁴⁶oyene aakelile mahala vameentoni va Mulugu, omuloba wi amurumeedhihe omma-gela vookala Mulugu a Yakobo. ⁴⁷Mbwenye Salomawu dammagele nyuba.

⁴⁸“Naari dhigalive ndo, Amudhulu-dhulu kanakala nyuba yoomagiwa ni madada a athu. Wona muwogele namavuhulela:

⁴⁹“ ‘Nabwiya dinawoga.
Odhulu bu mpanddo waaga wa omwene,
elabo ya vati foonyingala manyalo aaga.
Muneere mugimagele nyuba yowi avi,
naari mburo woovumavo wowi avi?
⁵⁰ Kahuwo madada aaga esasanyile
dhego dhaatedhene dhedhi?’^c

^b 7.43 Amosi 5.25-27 ^c 7.50 Ezaya 66.1-2

⁵¹“Nyo, addiyamaru, oohiNELIWA murima ni mabaru,^d nyo munovaa-nyave Muneba Woweela, munaligana ni makolo eenyu! ⁵²Namavuhulela aharabulhiwe ni makolo eenyu baani? Aliwa yahaapa ale yawoga dha odha wa Owogoowa, oyene nyo mwasadduwiliinyu mukala aliba ompeleka ni ompa. ⁵³Nyo muli ale mwaakelile Malamulo odheela mwa angero mbwenye kamwawiiwelele”.

Opiwa wa Extevawu ni mabwe

⁵⁴AZhudewu egeewile ndo yahitakaleliwaga, yootakuna meeno wa oliye. ⁵⁵Mbwenye Extevawu, oodhaaliwa ni Muneba Woweela, ahisugwaga odhulu, wona nthithimiho na Mulugu, Yesu ageemelile omoononi wooja wa Mulugu. ⁵⁶Nuwindo, ahiiraga: “Ginwoona odhulu ogafuguwe, Mwaana a Muthu, ageemelile omoononi wooja wa Mulugu”.

⁵⁷Aliwa yahithiyelaga obaruni, okuwa ni ndhu nootaama, vamohi yahimulupelaga Extevawu, ⁵⁸egamvokedhe ode wa nluwa yahambeela omvonya ni mabwe. Anamoona^e yahihiyaga dhoowara dheewa mmadani mwa mulobwana mmohi, eeriwa Sawuli. ⁵⁹Vamvonyigiiwa ni mabwe, Extevawu oolobelaga, eeraga: “Nabwiya Yesu, akelani muneba waaga”. ⁶⁰Nuwindo, ahitongwaga ni makokoro okuwa moolibha, wiira: “Nabwiya, muhaweelengele aliwa yoothega ela”. Agawogile nda, okwa.

8

¹Sawuli aaligi vevale, oorumeedhelaga dha opiwa wa Extevawu.

Oharahariwa ni omwadheya wa gerezha

Nlabo nendde gerezha ya oZheruzalemi yahambeela oharahariwa. Athu aatene oororomela yahibalaleyela dhipaddi dhaatedhene dha oZhudeya ni dha oSamariya, waahiya arumiwi. ²Alobwana amohi oomudhivela Mulugu yahidhowa omulogoha Extevawu, yahimundde-la vajinji. ³Mbwenye Sawuli ole ahixixa obwanyula gerezha. Nyuba ni nyuba oovolowamo, aaburulaga alobwana ni ahiyana, aafugelaga mukaambura.

Ofiya wa gerezha oPalextina

⁴Oororomela ale yabalaley yoovira elaleyaga Muselu Wapama. ⁵Filipi agakitele nluwa na oSamariya, owaalaleyela Kirixtu. ⁶Anamwinji muumohini yoomvuruwana dhende dhawogiiye, yiiwaga yowoona dhitoonyihedho, dhootikiniha dheeriyena. ⁷Mineba dhootakala dhookuma mwa athu ajinji, dhikuwaga, ajinji ooheedda, ooragala yahiyilihiwa. ⁸Ndala, muluwani mule mwahidhaala ohagalala.

^d 7.51 *OohiNELIWA murima ni mabaru* dhinatapulela oovaadda mirima, oothiyana obaruni. Extevawu awaagana ale yeethukulela ni wiNELIWA, emvaanyaga Mulugu. ^e 7.58 *Anamoona* Ala enaagiwana alene yamvonyaga Extevawu ni mabwe.

Otthwaruwa wa muliba masenga

⁹OSamariya wahikala mulobwana mmohi eethaniwa Simawu. Ola owiirihedhesa dha masenga, aatikinihaga athu aatene. Oliye owiivuwihana wi doothithimiheya vajinji, ¹⁰athu aatene, ahima ni apogo yoomvuruwana, yoowoga, yiiraga: “Mulobwana ola fu owodha wa Mulugu, oneeriwa Owodha Wuulubale”. ¹¹Aliwa yoomvuruwana vowi wahivira mudhidhi mujinjeene aatikinihaga athu ni masenga aaye ale. ¹²Mbwenye yahimuroromela Filipi vevo valaleyiiye Muselu Wapama, wawogaga dha Omwene wa Mulugu ni Yesu Kirixtu. Alobwana ni ahiyana yaroromele yahibathiziwa. ¹³Simawu teto ahiromela, agabathiziwe oomuhara Filipi mwaviriye, oonaga dhitoonyihedho ni dhootikiniha dhuulubale dheereya, ootikiniheya.

¹⁴OZheruzalemi, arumiwi egeewile wi Samariya ahaakela madhu a Mulugu, yahaarumawo Peduru ni Zhuwawu. ¹⁵Aliwa egafiyile, yahaalobelega wi aSamariya yaakele Muneba Woweela, ¹⁶vowi yabathiziwe mu ndina na Nabwiya Yesu, mbwenye Muneba Woweela waali ohunaakitele. ¹⁷Nuwindo, Peduru ni Zhuwawu yahaahela madada eewa aSamariya, vano aliwa yahaakela Muneba Woweela.

¹⁸Simawu vooniliye wi Muneba Woweela waakeliwa ni ohela madada wa arumiwi, ahifuna waavaha korowa, ¹⁹ahiira: “Mugivahe ni miyeene teto owodhawo wi muthu onamuheligiimi madada aaga aakelege Muneba Woweela”.

²⁰Peduru ahimwaakulaga, wiira: “Korowa dhaawo vamohi ni weeya mudhowe omunddoni, mwaha wi onoobuwela wi mvahi wa Mulugu onoguliwa ni korowa! ²¹We kwinna epaddi, naari mburo va mabasa alena, mwaha wi murima waawo kahuwo wowogoowa vameentoni va Mulugu. ²²Otthwaruwa mwa dhootakala dhaawo, olobele wa Nabwiya, adha ayo oolevelega yuubuwelelo eyo ya mmurimani mwaawo, ²³vowi ginwoona wi we ohudhaaliwa nrima, ohumagiwa ni fingwi dha yoothega”.

²⁴Vevo Simawu ole ahaakulaga: “Mugilobelega wa Nabwiya wi dhigwiliinyu dhigipadduwele”.

²⁵Peduru ni Zhuwawu egamalile waalibiha ni olaleya madhu a Nabwiya, ewelelega oZheruzalemi, yoolaleyaga Muselu Wapama mirudda dhijinji dha oSamariya.

Filipi ni mwEtiyopiya

²⁶Mungero a Nabwiya ahiira wa Filipi: “Kavenya, odhowele wewo onakumela pevo ya murubi, dila ya mwiiddedereni enakita oZheruzalemi, edhowaga oGaza”. ²⁷Oliye ahivenyaga, omaruwa. Mundila ahimfwanyaga mulobwana mmohi mwEtiyopiya oofuuliwa,^f musogoleli oofuneya

^f 8.27 *Oofuuliwa* mu elemelelo ya athu ale, adhaari amohi yeera ofuuliwa.

aang'anela dhego dhaatedhene dha Kandasi, mwene a mwihiyana aEtiyopiya. Mulobwana ola afiyile oZheruzalemi, omweebedha Mulugu, ²⁸vooweleda owaniwa, ahikaraatigi mugareetani^g mwaaye, weelengaga niivuru na namavuhulela Ezaya. ²⁹Vano Muneba wahiira wa Filipi: “Kaaddamela gareeta eyo othaananegena”. ³⁰Filipi agathamagelewo, ahimwiiwaga mulobwana ole eelengaga niivuru na namavuhulela Ezaya. Filipi ahimukohaga: “Nabwiya, munowiiwelelamo dhineelengiinyu?”

³¹Oliye ahaakulaga: “Aa, gineeweleelele addi gihinna muthu oogaaddeliha?” Nuwindo, ahimulobaga Filipi wi agwele, akaraati ni oliye.

³²Madhu a Maleba yeelengigiye baala:

“Wona nibila nnadhowiwana omapiwelo,
wona nibila vameentoni va muliba ojema
nnakala pee, oliye kanafugula mulomo.

³³ Vomvevusa, kaathongiwe mowogoowa.
Kalivo onawoge dha anamabaliwelamo aaye,
Vowi egumi yaaye ehivenyihwamo
mwiilaboni ya vati”.^h

³⁴Mulobwana ole ahimukohaga Filipi, wiira: “Ogaaddele, nama-vuhulela ola, onawoga dhawani? Dha oliyeene, kaahi dha mmohiwa?”
³⁵Nuwindo, Filipi, ahambeelaga Maleba ale, omulaleyela Muselu Wapama wawoga dha Yesu.

³⁶Edhowagave mundila, yahifiyaga mburo vaaligi mahinje. Mulobwana ole ahiiraga: “Kasugwa, mahinje ala, enahiha ddi wi gihibathiziwe?”
³⁷[ⁱFilipi ahiiraga: “Dhinowaandeya, waroromela ni murima waawo waatene”. Mulobwana ole ahaakulaga, wiira: “Ginororomela wi Yesu di Mwaana a Mulugu”.]
³⁸Vevale ahiimelihaga gareeta, Filipi ni mulobwana ole yahikitelaga mmahinjeni, vano Filipi ombathiza. ³⁹Egakumile mmahinjeni, mowaaguva Muneba wa Nabwiya wahimuthukula Filipi. MwEtiyopiya ole kmoonileve, mbwenye ahiwelela olenddo waaye ahalalaga. ⁴⁰Filipi afwanyeya oAzoto, eddeeddaga ofiyedha oSezareya, oolaleyela Muselu Wapama maluwa maatene mwaviriye.

Otthwaruwa wa Sawuli

9 ¹Sawuli, owawoopopihave anamasuuzwa a Nabwiya, ofunaga waapa. Ahidhowaga wa musogoleli a anamakutha, ²omuloba makaarata oodhowana nyuba dha matugumano dha oDamasiku, eera wi aafwanyawo

^g 8.28 Gareeta Naari wi: karasariya ya ng'ombe ^h 8.33 Ezaya 57.7-8 ⁱ 8.37 Madhu ala kinafwanyeya mmaniivuruni awale.

oohara Dila amohiwa, alobwana naari ahiyana, aadhowena oomagiweene oZheruzalemi. ³ Voolenddoni waaye, aaddamelaga oDamasiku, mowaaguvava waara wookumela odhulu wahimwaapeelaga. ⁴ Agatongwele vati ahihiwa ndhu niiraga: “Sawuli, Sawuli, onagiharaharela ddi?”

⁵ Sawuli ahikohaga, wiira: “Muli aani, Nabwiya?”

Oliye ahaakulaga, wiira: “Di miyo, Yesu, oyene we onamuharahariwe. ⁶ Ovenye, ovolowe muluwani, onowaaddeliwa yoofwanelela wiirana”.

⁷ Alobwana yaaligi ni Sawuli voolenddoni yahiimelaga, kuhaandaga owoga; yahiiwaga ndhu mbwenye kayamoonaga muthu. ⁸ Sawuli ahiimelaga. Agakunuule meento, kaakwanihaga woona elabo. Nuwindo, alobwana ale yahimwihiddeelaga moonu, omvelela oDamasiku. ⁹ Ahimamala malabo maraaru ahoonaga, kaaja yego naari ong'wa.

¹⁰ ODamasiku wahikala namasuza mmohi eethaniwa Ananiya. Nabwiya ahimwiithanaga moorohani^j: “Ananiya!”

Oliye ahaakulaga, wiira: “Gili va, Nabwiya”.^k

¹¹ Nabwiya ahimwaaddela, wiira: “Ovenye odhowe rampa oneeriwa Owogoowa. Vaade va Zhuda wamukohedhele mulobwana a oTarusu oneethaniwa Sawuli; vovi onolobela. ¹² Ahimoonaga mulobwana mmohi eethaniwa Ananiya avolowaga, ahimuhelaga madada aaye wi awelihedhiwe woona waaye”.

¹³ Ananiya ahimwaakula, wiira: “Nabwiya, ginowiiwesa wa ajinji dha muthu oyene, dhootakala dhinawiireliye oweela mirima eenyu oZheruzalemi. ¹⁴ Odhiile wuno ni owodha ovahiwiye ni apogo a anamakutha wi aamage athu aatene enooharani yuulobelegani!”

¹⁵ Mbwenye Nabwiya ahiira: “Dhowa! Ola muthu gimusakuliimi wi alaleyele ndina naaga wa athu oode,^l wa mamwene ni wa nlogo na Ezarayeli. ¹⁶ Gineere gimoonihe monnuwelo a goyi eneriye akanne mwaha wa ndina naaga”.

¹⁷ Ananiya ahidhowaga, ovolowa mba, omuhela madada Sawuli, wiira: “Ddibila Sawuli, Nabwiya Yesu owooneyele odila wewo wadhiiwe, ohugiruma wi owelele woona teto odhaaliwe ni Muneba Woweela”.

¹⁸ Mowaaguvava dhego dhakalagahi manguru dhahimoraga mmeentoni mwa Sawuli, ahambeela woona. Ahivenya, obathiziwa, ¹⁹ agajile, kopolo dhaaye dhahiwelelagamo. Sawuli ahikala oDamasiku malabo majinjeene ni anamasuza.

Dhoolaleya dhowambeela dha Sawuli

²⁰ Mowaaguvava ahambeela olaleya mu nyuba dha matugumano, eeraga: “Yesu di Mwaana a Mulugu”. ²¹ Aatene yeewaga yootikina, yookoha-

^j 9.10 *Oroha* wula oneereya muthu agali meento. ^k 9.10 *Nabwiya* Va onaagiwana di Yesu. Moone Meerelo a Arumiwi 9.17. ^l 9.15 *Athu oode* enaagiwana ale ehili aZhudewu.

na, yiiraga: “Ola kahuwo olene afunesa wanoonga ale yamuhara ni omweebedha Yesu a oZheruzalemi? Kadheele waahidda athu owinda aadhowegena oomagiweene wa apogo a anamakutha?” ²²Mbwenye Sawuli oweenjehedheya ononelamo, ofiyedha waaviriganiha aZhudewu yakala oDamasiku, vowaawoniha wi Yesu dili Kirixtu.

²³Vigavirile malabo majinji, aZhudewu yahiiwananela wi empe Sawuli, ²⁴mbwenye Sawuli ahaaddeliwa dhamusasanyedheliisu. Mahiyu ni mutana yowiiing'anela va mulago wa nluwa wi empe. ²⁵Mbwenye omahiyuni anamasuza aaye yahimuhelaga mmuddangani omaga ni mingoyi, omukitihedha ode wa ncinga nuulubale.

Wunnuwa wa gerezha

²⁶Sawuli agafiyile oZheruzalemi, ahisayela otugumana ni anamasuza, mbwenye aatene yoomoova mwaha wi kayarumeedha wi di namasuza. ²⁷Vevale Baranabe^m ahimuthukulaga omudhowana wa arumiwi, wawaaddela mwemo Nabwiya mooneyeliye wa Sawuli mundila, mwemo Nabwiya mwa-wogeliye ni oliye teto mwemo oDamasiku Sawuli mwalaleyeliye moohoova mu ndina na Yesu. ²⁸Mowindala Sawuli ookala ni aliwa muZheruzalemi, oolaleya moohoova mu ndina na Nabwiya. ²⁹Oowoga ni orunihana ni aZhudewu yawoga eGerego, mbwenye aliwa yoosayela ompa. ³⁰Addibilaⁿ vanoniliwa yahimudhowana oSezareya, omurumiha oTarusu.^o ³¹Mudhidi olene gerezha yahikanna murenddele oZhudeya waatewene, oGalileya ni oSamariya. Gerezha yooliba, yoweeda moomoova Nabwiya, yeeddaga moowaraalihiwa ni Muneba Woweela, mowindala gerezha yowunnuwa.

Oyilihiwa wa muthu ookwa meddo

³²Peduru eddeeddaga wula ni wula, ahikitaga ofiya teto wa oweela yakala nluwa na oLida. ³³Wewule ahimfwanyaga muthu mmohi eethaniwa Eneya, akonaantile voolilini yaaka tanu ni thaaru, vovi aali ookwa meddo. ³⁴Peduru ahiiraga: “Eneya, Yesu oli Kirixtu onowuuyiliha! Venya, okune olili waawo”. Mowaaguva ahivenyaga. ³⁵Aatene yakala oLida oSaroni egamoonile yahirugunuwela wa Nabwiya.

Ovenyihwa wa Dorika muukwani

³⁶Nluwa na oZhope wahikala namasuza mmohi ndina naaye eeriwa Tabita (ndina nddo mu ewogelo ya eGerego nnatapulela Dorika). Owiire-sa dhapama, owaakamihedhesa oorabula. ³⁷Malabo alene ahibulela, okwa, mwiili waaye wahihabihiwaga, oheliwa suubi a odhulu.^p ³⁸Lida

^m 9.27 Baranabe enatapulela mwaana oolibiha. ⁿ 9.30 Addibila enaagiwana addibila mwa Yesu Kirixtu. ^o 9.30 Tarusu yaali elabo yabaliwe Pawulo. Yakala oAziya Mung'onong'ono. ^p 9.37 Suubi a odhulu Murudda nde nyuba dhiwa dhakanna dhipaddi biili, vati ni odhulu.

akala waaddamela oZhope, vano anamasuuzwa veewiligiiwa wi Peduru aali oLida, yahaarumaga alobwana abiili wi yamulobe: “Ahiribeliwe, adhe wuno”.³⁹ Peduru ahivenya, odhowa ni aliwa. Vafiyiligiiye, yahimugwelihaga suubi a odhulu. Amaamukwele aatene yahimwaaapeelaga, yuunddaga, emoonihaga mikanjo^q ni dhoowara dhimohi Dorika dhasasanyiliye akalaga ni aliwa. ⁴⁰ Peduru ahilamulaga wi aatene ekumewo osuubini wule. Nuwindo, ahikokoraga, olobela; orugunuwela muruthu ole, wiira: “Tabita, kavenya!” Oliye okunuula meento, vano agamoonile Peduru, ahivenyaga, okaraati. ⁴¹ Peduru ahimwihiddeelaga ndada, omvenyiha. Vano ahawiithanaga oororomela ni amaamukwele, ahaapelekelaga Tabita agali mugumi. ⁴² Dhoopadduwa nda dhahinoneya oZhope waatewene, ajinji yahimuroromela Nabwiya. ⁴³ Peduru ahikala oZhope wewule malabo majinji, vaade va Simawu, oyene asasanya makupa.

Ottwaruwa wa sinturiyawu Korineeliyu

10 ¹ Nluwa na oSezareya wahikala mulobwana eethaniwa Korineeliyu. Aali sinturiyawu^r a kumpaniya ya anyakoddo a oRoma yeethaniwa “Kumpaniya ya oItaliya”. ² Oliye ni emudhi yaaye yaatene yoomwiiwelela ni omoova Mulugu. Owaakamihedhesa oorabula, oolobelesa wa Mulugu.

³ Nlabo nimohi, mudhidhi wa wora ya neethaaruu ya ciguwo,^s Korineeliyu ahimoonaga pamadhene mungero a Mulugu afiyaga, wiira: “Korineeliyu!”

⁴ Oliye oomusugwaga mungero ole, oomooava vajinjivene, wiira: “Munafuna ddi, Nabwiya?”

Vano mungero ahimwiirelaga: “Malobelo aawo ni waakamihedha waawo oorabula dhihimudhivela Mulugu wona mukutho woonukwela. ⁵ Dhiinova waarume alobwana edhowe nluwa na oZhope, wa muthu oneethaniwa Simawu, oneethaniwa teto ni ndina na Peduru. ⁶ Onakala vaade va Simawu mmohiwa, namakutha makupa. Nyuba yaaye eli waaddamela seresere ya nyaza”.

⁷ Agadhowile mungero ole awogigiiyena, Korineeliyu ahawiithanaga anamalaba aaye abiili ni munyakoddo mmohi mwa ale yaaligi vamabasani vaaye. Munyakoddo ola teto oomweebedhesa Mulugu. ⁸ Korineeliyu agawaaddele dhaatedhene dhapadduwile, ahaaruma wi edhowe oZhope.

Dhootikiniha dhoonile Peduru

⁹ Nlabo nooharela mudhidhi waaddamelaga wora ya neekumi nabiili ya mutana, ale jaarumilege Korineeliyu yaaddamelaga oZhope, Peduru

^q 9.39 *Mukanjo* yaali yoowara ya athu aatene alobwana ni ahiyana, ode wiwa wookala yookuneelana. ^r 10.1 *Asinturiyawu* yaali asogoleli a anyakoddo zana (100) a oRoma.

^s 10.3 *Mudhidhi wa wora ya neethaaruu ya ciguwo* yaali elemelelo ya aZhudewu mudhidhi walobeliwa.

ahigwelaga vadhulu va nyuba wi alobele.^t 10 Agali wewule ahivoliwaga dala, oofunaga oja. Vevale athu esasanyaga yoojaya, Peduru ahikalaga wona wiire okomowa. 11 Ahoonaga odhulu ogafuguwe, ekitaga yego wona guwo yuulubale, ekithedhiwaga vati ni mapiyo mannayi. 12 Muwari mwa guwo ele mwahikalaga aneenyama a meddo minnayi ni owiiburula ni balame dha mukokolani. 13 Peduru ahiwa ndhu niwogaga ni oliye, niiraga: “Peduru, kavenya, ompe mwaneenyama, omuje!”

14 Mbwenye Peduru ahiira: “Naari, Nabwiyani. Kaginaabihege oja yego yootakala, yookoodhihiwa mMalamuloni!”

15 Vano ndhu nahiwoga dila ya nabili, wiira: “Ehuwile Mulugu, we ohuubuwele wi sootakala”.

16 Dhedhi dhahiireya dila tharu, mowaaguva guwo ele yahithukuleliwa odhulu.

17 Mudhidhi Peduru woobuweligiye yootapulela ele yooniliye, alobwana ale yarumiwege ni Korineeliyu ekohedhelaga vaade va Simawu egeemelile va mulago. 18 Aliwa wiithana, okoha, wiira: “Simawu ononiwe ni ndina na Peduru, onakala veva?” 19 Mudhidhi Peduru oobuweligiye ya ele yooniligiye, Muneba wahimwaaddelaga, wiira: “Peduru, woone! Alobwana araaru enoosayela weene. 20 Mowindo ovenye, okitele muddibani, odhowe ni aliwa ohaanganyedhe vovi di miyo gaarumile”.

21 Vevale Peduru ahikitaga, wawiirela athu ale: “Dimiyeene onamusa-yeliinyu. Mudheele mwaha wa ddi?”

22 Aliwa wiira: “Sinturiyawu oneethaniwa Korineeliyu dinirumile. Oliye muthu ooharihamo, oomoova Mulugu. AZhudewu aatene enowoga dha opama waaye. Mungero a Mulugu dimwaaddele wi owiithaneni mudhowe vaade vaaye, owiweni dhinafuniinyu owoga”. 23 Vevale Peduru ahawiithanaga wi evolowe, waavaha mburo. Nlabo nooharela Peduru ahiisasanyedhaga, odhowa vamohi ni aliwa. Addibila amohi a oZhope yahidhowa vamohi ni oliye.

Wakeliwa wa Muneba Woweela ni athu oode

24 Nlabo nooharela aliwa yahifiya oSezareya. Vano Korineeliyu owaajejihedhaga, ahaatugumanyaga amudhi aaye, akwaaye a vamurimani.

25 Peduru avolowagawene, Korineeliyu ahidhowaga ogumanana ni oliye, vevale ahiworomaga okokora vameentoni vaaye, wooneyiha nriiho.

26 Mbwenye Peduru ahimvenyihaga, wiira: “Ovenye, vovi miyo gili muthu wona weevo”.

27 Awogagave ni Korineeliyu, yahivolowaga mba, Peduru ahaafwanyaga athu ajinjeene egatugumane mwemule. 28 Vevale ahawiirelaga aatene: “Nyo muhunona wi kadhinarumeedhihiwa wi muZhudewu aandane

^t 10.9 Nyuba dha mudhidhi olene dhookalana nthaddo odhulu wiwa.

naari omweeddela muthu a nlogo nimohi. Mbwenye Mulugu ohuginoniha wi gihimwiire muthu di muthu ootakala.⁴ ²⁹Mwahaya buuyene ngeethaniwe, gihidha kagivaanyile. Dhiinova ginowuukohani: mwagiithanela si ddi?”

³⁰Korineeliyu ahiiraga: “Malabo mannayi amundduli wora yowindala, wora ya neethaaru ya ciguwo, miyo gaali vaade vaaga, gilobelaga. Mowaaguva, osogolo waaga ahikumelelaga muthu agawarile dhoo-wara dhoweela. ³¹Ogiirela: ‘Korineeliyu, olobela waawo ohiiwiwa, vano Mulugu ohaakula okamihedha waawo onawiirelesiwe oorabula. ³²Omurume muthu adhowe oZhope amwiithane Simawu, ononiwe ni ndina na Peduru. Oliye onakala vaade va Simawu, namakutha makupa, nyuba yaaye eli waaddamela seresere ya nyaza’. ³³Nuwindo, ghirumiha wuwiithana mowaaguva, vano nyo mwihira pama muhudha. Dhiinova nili va aatene vameentoni va Mulugu wi niiwe madhu maatene Nabwiya yuurumiliiyeni osoriha”.

³⁴Vevele Peduru wambeela owoga, wiira: “Dhiinova gihinona wi Mulugu kann nsakulo! ³⁵Moohiyaniha, dhilabo dhaatedhene ale enamoova yiiragana dhapama enorumeedhiwa wa oliye. ³⁶Ala bi madhu Mulugu yaarumihedhiye nlogo na Ezarayeli: athu yeere okanna murenddele ni Mulugu odheela mwa Yesu Kirixtu, ola di Nabwiya a athu aatene. ³⁷Nyo muhunona dhedho dheereyile murudda dhaatedhene dha oZhudeya, wambeela oGalileya, agamalile Zhuwawu olaleya obathizo. ³⁸Nyo muhunona dha Yesu a oNazarethi wona Mulugu mwamukuthuleliye Muneba Woweela ni owodha. Oheedda dhipaddi dhaatedhene eeragana dhapama, aayilihaga aatene alene yarabulihwa ni Sathana, vovi Mulugu aali ni oliye. ³⁹Hiyo nili anamoona a dhaatedhene dhiiriliye oZhudeya ni oZheruzalemi. Vano aliwa ompa, omutomeya vamuraddini. ⁴⁰Nlabo na neethaaru, Mulugu ahimvenyiha muukwani, wiiraha wi ooniwe. ⁴¹Kooniwe ni athu aatene, mbwenye wa hiyeeneve anamoona Mulugu yanisakuleliye, hiyo nijile, ning'wa ni oliye agamvenyihile muukwani. ⁴²Oliye ohunilamula olaleya ni owaraaliha nlogo wi ola di oyene Mulugu omusakuliye wi akale namathonga a athu ookalawo ni ookwa. ⁴³Wa oliye anamavuhulela aatene enomwiirela onamoona wi odheela mwa ndina naaye aatene enamuroromela enoleveleliwa dhoothega dheewa”.

⁴⁴Peduru awogagave madhu alena, Muneba Woweela wahaakitela aatene yeewaga madhu ala. ⁴⁵Vano oororomela yamveleege Peduru, aZhudewu owiineliswa yahitkinaga, mwaha teto athu oode yahikuthuleliwa mvahi wa Muneba Woweela; ⁴⁶vovi yoowawiiwaga ewogaga dhiwogelo dhimohi ni omuthithimiha Mulugu.

⁴ 10.28 Peduru onatapulela ele yiiweleliiyemo odheela yooniliye wi dhinorumeedheya aZhudewu waandana ni athu oode.

Nuwindo, Peduru ahiwogaga, wiira: ⁴⁷“Athu ala ehaakela Muneba Woweela wona hiyo. Ohukalavo onaakooddihe wi ehibathiziwe ni mahinje?” ⁴⁸Ahilamula wi ebathiziwe mu ndina na Yesu Kirixtu. Nuwindo, yahimuloba wi akale ni aliwa malabo vang’ono.

Wiyaakihedha wa Peduru

11 ¹Arumiwi ni addibila yaali oZhudeya, yahiiwa dhowi teto athu oode yahirumeedha madhu a Mulugu. ²Peduru vagweliliye^v oZheruzalemi, ooromela yaali owiNELIWA yahimusumulula oliye, ³yiiraga: “Ohuvolowa nyuba ya athu oohiNELIWA, ohuja ni aliwa”.

⁴Vano Peduru ahambeelaga wawaaddela mooharana-harana, eeraga: ⁵“Miyo gaali nluwa na oZhope gilobelaga, gahikala wona giire okomowa. Gahoono yego yakalahi guwo yuulubale ekitaga odhulu egamagiwe mapiyo mannayi, edhaaga wa miyo. ⁶Ngasugwesese muwari mwa guwo ele, gahawoonaga aneenyama a meddo minnaye, owoopiha, owiiburu-la ni balame dha mukokolani. ⁷Teto gahiiwaga ndhu niiraga: ‘Peduru, kavenya, ompe mwaneenyama, omuje!’

⁸“Gahiira: ‘Naari, Nabwiya, kaginaabihege oja yego yootakala, yookooddihiwa mMalamuloni’.

⁹“Ndhu nahikumaga odhulu olenddo wa nabiili, wiira: ‘Ehuwile Mulugu, we ohuubuwele wi sootakala’. ¹⁰Dhedhi dhahiireya dila thaar, guwo ele yahithukuleliwa odhulu.

¹¹“Mudhidhi olene alobwana araaru yarumiwege wa miyo ni Kori-neeliyu a oSezareya, yahifiya vaade vakaliihu. ¹²Vano Muneba Woweela wahigaaddelaga wi gidhowe ni aliwa gihaanganyedhe. Yahidhowa ni miyo addibila ala atanu ni mmohi. Nahivolowaga nyuba ya Korineeliyu. ¹³Oliye ahinaaddela wi ahimoono mungero ageemelile vaade vaaye. Mungero ole ahimwaaddela, wiira: ‘Waarume oZhope athu yamwiithane Simawu, ole oneethaniwa ni ndina na Peduru, ¹⁴oyene onowuwaaddela mwemo Mulugu munoovulumuseliye we ni vaade vaawo vaatevene’.

¹⁵“Miyo ngambeele owoga, Muneba Woweela wahaakitela wona wanikiteleliwa hiyo vowambeela. ¹⁶Vano gahuubuwelela dha madhu a Nabwiya, yeeriliye: ‘Zhuwawu ebaribareene abathiza ni mahinje, nyo munaabathiziwege ni Muneba Woweela.’” ¹⁷Akala Mulugu ahaavaha mvahi mmohive wona teto hiyo nnamuroromela Nabwiya Yesu Kirixtu, miyo gaali aani wi gihiihe ofuna wa Mulugu?”

¹⁸Vano arumiwi ni addibila egeewile nda, yahikurumuwaga, omuthithimihaga Mulugu, wiira: “Ebaribareene Mulugu ohaavaha athu oode otthwaruwa onadhana egumi yoohumala”.

^v 11.2 *Vagweliliye* enatapulela moononeya pama wi Zheruzalemi aali othuthumani, Sezareya aali seresere ya nyaza. ^w 11.16 Moone Meerelo a Arumiwi 1.5

Ofiya wa gerezha oAntiyokiya

¹⁹Vano ale yamwadheyele mwaha wooharahariwa wambeele ni opiwa wa Extewawu yahimwadheya ofiya oFinisiya, oXiperi ni oAntiyokiya yaalale-yelaga aZhudewuve Muselu Wapama. ²⁰Mbwenye vaari veewa yahikalavo yaali a oXiperi, a oSirene, ale yadhowile oAntiyokiya, yowaalaleyela teto aGerego muselu wa Nabwiya Yesu. ²¹Kopolo dha Nabwiya dhaali ni aliwa, athu ajinji yahiroromela, otthwaruwa, omuharaga Nabwiya.

²²Gerezha ya oZheruzalemi veewiliwa dhoowoga nda, yahimuruma Baranabe oAntiyokiya. ²³Agafiyile, ahoonaga mahala a Mulugu, ahihagala, waaloba wi emuroromelegeve Nabwiya ni murima waatene. ²⁴Vowi Baranabe aali mulobwana apama, oodhaaliwa ni Muneba Woweela ni oororomela, athu ajinji yahimuroromela Nabwiya.

²⁵Baranabe ahimaruwa, odhowa oTarusu, omusayela Sawuli; ²⁶agamfwanyile, ahimudhowagana oAntiyokiya. Yahikala vamohi wewule yaaka emohi, yootugumana mu gerezha elene, yaasuuzihaga athu ajinji. Fu oAntiyokiya wewo anamasuuzi ale wavahiwiisu vowambeela ndina nowi “aKirixtu”.

²⁷Malabo alene yahikita oZheruzalemi anamavuhulela, odhowa oAntiyokiya. ²⁸Mmohi mwa aliwa, ndina naaye eeriwa Agabu. Ahiwogaga ni oowodha wa Muneba wi voohulogela weere odha dala yuulubale elabo yaatene. (Dala eyo yahidha mudhidhi wa Kalawudiyu.) ²⁹Anamasuuzi yahiiwananelaga ohidda mabasa owaakamihedha addibiliwa yakala oZhudeya, mooligana ni okalana wa kadda muthu. ³⁰Vevo yahiiirana ndo, waarumana dhoovaha nde, Baranabe ni Sawuli oveleela wa apogo a gerezha.

Oharahariwa wa Tiyago ni Peduru

12 ¹Mudhidhi olene, Samasowa Heroddi ahilamula wi ehiddiwe athu amohi a gerezha wi awoonihe goyi. ²Ahimpaha ni supaadda Tiyago,^x ddibila a Zhuwawu. ³Heroddi agoonile wi dhahaadhivela aZhudewu, ahimmaga teto Peduru. (Yaali malabo a Mathanga a Mikaa-the Dhoohuheliwa Emela.) ⁴Agammagihile, ahimuhela mukaambura, ahimpeleka wa makuru mannayi a anyakoddo annayi-annayi. Afunaga wi amuthonge vameentoni va athu Paxkwa agavirile. ⁵Peduru aali oo-fugeliweene mukaambura; mbwenye gerezha yoomulobelela wa Mulugu moohumaaliha.

⁶Omahiyuni wiwa Heroddi vafunigiye omuthonga, Peduru agona-ga eeng'aneliwaga ni anyakoddo abiili, egammagile ni fingwi biili ni anamaang'anela vamusiwo yowiing'anelaga kaambura. ⁷Mowaaguva, mungero a Nabwiya ahikumelelaga, vano waara wahimoneyaga suubi ole. Mungero ahimukahinyaga Peduru wi arurumuwe, wiira: “Kavenya mo-

^x 12.2 Tiyago ola aali murumiwi.

waaguva!” Fingwi omora mmoononi mwaaye. ⁸Mungero ahimwiirelaga: “Omagele sintu naawo, oware satho dhaawo”. Ahiirana ndale. Mungero teto ahiiraga: “Oware kasaako yaawo, ogiharege”. ⁹Vano ahimaruwa, omuharaga, ahinonaga wi ebaribari dheereya ni mungero ole, oobuwelaga wi onooroha. ¹⁰Egakwaranye nikuru na owaang’anela owambeela ni na nabiili, yahifiya esewo ya mugogo vaakumeleliwana muluwani. Esewo ele yahifuguwaga weekiwa. Aliwa okuma, weedda vang’ono, mo-waaguva mungero ole ahimwihiya.

¹¹Vano Peduru aganonelemo, ahiiraga: “Vano gihinona ebaribareene wi Nabwiya ahimurumiha mungero aaye ogivulumusa mmadani mwa Heroddi, ogivulumusa mwa dhootakala dhaatedhene aZhudewu dhoo-buweliwa ogiirela”.

¹²Peduru aganonile nda, ahidhowa vaade va Mariya, maaye Zhuwawu Maruku, vaaligi athu ajinji egatugumane, elobelaga. ¹³Peduru vagogo-ddiligiye musiuwo, ahidhaaga mwiimeleli mwaana-mwihiyana ndina naaye Rodda wi amoone aali aani. ¹⁴Agadidele ndhu na Peduru, kaafugulile vamavolowelo mwaha woohagalala. Ahithamagela mba, wawaaddela athu, wiira: “Peduru oli vamavolowelovo!”

¹⁵Athu yahiiraga: “We ohusavuwa!” Mbwenye oliye oolibihedhagave wi ebaribari. Aliwa yoowiiraga: “Di mungero aaye oyo”.

¹⁶Mbwenye Peduru oogogoddagave; aliwa egafugulile, yahimoonaga wi duuliyeene, yahitikiniheyaga vajiinji. ¹⁷Peduru ahiirihedhaga etoonyihedho ni ndada wi emaale, ahawaaddelaga wona Nabwiya mwaamvenyiheliye mukaambura. Aheenjedhedhaga, wiira: “Mmwaadde dhedho Tiyago ni addibilihu”. Nuwindo, Peduru ahivenyagavo, odhowa mburo mmohiwa.

¹⁸Ode ogasile anyakoddo yahisimwelaga vajiinji, yahiiraga: “Ii! Peduru emwiireyele ddi?” ¹⁹Heroddi agamusayele kamfwanyile. Ahaakoha anamaang’anela, oliye olamula wi aliwa evenyihewevo, yapiwe. Vano Heroddi ahivenya oZhudeya, okita odhowa oSezareya, okala wewo.

Okwa wa Heroddi

²⁰Wahikala ohiiwanana wuulubale wa Samasowa Heroddi ni athu a oTiru ni a oSidoni. Vano aliwa yahiiwanana odhowa owoga ni oliye. Vowambeela yahimukwekwethaga Balasito, oyene aali musogoleli mulubale a nyuba ya samasowa wi aakamihedhe. Vevo yahimuloba Heroddi wi eerihedhe murenddele ni aliwa, mwaha wi dhooja dheewa dhakuma elabo yaaye. ²¹Heroddi ahipangana nlabo ni aliwa, nigafiyile nlabo ndde, oliye ahiwaraga guwo dha osamasowa, okaraati vampanddoni vaaye va othongi, wambeela owoga wa aliwa. ²²Athu yoowogaga moogweliha madhu wa Heroddi, yiiraga: “Ndda ndhu na mulugu mmohi, kahuwo muthu onawoga!” ²³Mowaaguva mungero a Nabwiya ahimutatamula

oredda Heroddi, vowi kaamvahile nthithimiho Mulugu, mihago dhahimuja marubo okwa.

²⁴Mbwenye madhu a Mulugu yowunnuwa, yooweenjedhedheyave.^y

²⁵Vano Baranabe ni Sawuli yahaakwaniha ohidda mabasa yarumiwiiwa, yahiwelawo oZheruzalemi, omuthukula Zhuwawu Maruku.

Orumiwa wa Baranabe ni Sawuli

13 ¹Mu gerezha ya oAntiyokiya mwahikala anamavuhulela ni anamasuuziha ala: Baranabe, Simiyawu eethaniwa Nizheri, Lusiyu a oSirene, Manayemi onnuwile vamohi ni Heroddi, namathonga^z a elabo ya oGalileya, ni Sawuli. ²Aliwa yeebedhaga wa Nabwiya ni othuga, Muneba Woweela wahiiraga: “Mugisakulelevo Baranabe ni Sawuli wi yahidde mabasa ayene gawiithaneliimi aliwa”. ³Vano egathugile ni olobela, yahaahelaga madada waaruma.

Wakeliwa wa Muselu Wapama oXiperi

⁴Egarumiwe ni Muneba Woweela, aliwa yahikitela oSelusiya, ogwela mwanddeya, odhowaga eliga ya oXiperi. ⁵Vano egafiyile nluwa na oSalamina, yoolaleya madhu a Mulugu mu nyuba dha matugumano dha aZhudewu. Yaaligi ni Zhuwawu Maruku, aakamihedhaga aliwa.

⁶Egeeddile eliga yaatene, yahifiya nluwa na oPafosi.^a Yahimfwanya mulobwana a masenga, namavuhulela ooratha, muZhudewu ndina naaye Bari-Yesu.^b ⁷Aali mukwaaye a kuminadori a wewule, Serizhiyu Pawulo, aali a tthottho. Ola ahawiithanaga Baranabe ni Sawuli, afunaga wiiwa madhu a Mulugu. ⁸Mbwenye mulobwana a masenga ole, (Elimasi mu ewogelo ya eGerego), oovaanyihana ni aliwa. Asayela wi kuminadori ole ahiroromele. ⁹Mbwenye Sawuli, oyene eethaniwa teto ni ndina na Pawulo, oodhaaliwa ni Muneba Woweela, ahimusu-gwesesaga, ¹⁰wiira: “Oodhaaliwa onyengetha! Oodhaaliwa dhootakala! Mwaana a muneba wootakala, mwiiddani a dhowogoowa dhaatedhene! Mwaha bwaddi kunahiya okoromaniha dila dhowogoowa dha Nabwiya? ¹¹Vano dhiinova woone, moonoo wa Nabwiya wuurabulihe. We onaakale oohoona, kunoone nduwa mwa mudhidhi”. Mowaaguva yiihi yuulubale yahimudheelaga Elimasi, wambeela weedda mowapeela amusayelaga oomwihiddeela ndada. ¹²Kuminadori agoonile nde, ahiroromela, okala ootikiniheya vajinji ni dhosuuziha dha Nabwiya.

Ofiya wa gerezha oAziya Mung'onong'ono

¹³Pawulo ni akwaaye yahigwelaga mwanddeya oPafosi, ofiya nluwa na oPerege, murudda wa oPamfiliya. Mbwenye Zhuwawu Maruku ahaahiya-

^y 12.24 Verisikulu ela enatapulela wi gerezha yowunnuwa, athu ajinji yoomurorome-lave Nabwiya. ^z 13.1 *Namathonga* eeriwa tetararaka; athonga epaddi ya nennayi ya murudda mmohi. ^a 13.6 *Pafosi* naali nluwa nuulubale na eliga ele, vakala kuminadori.

^b 13.6 *Bari-Yesu* enatapulela *Mwaana a Yesu*.

ga wewo, owelela oZheruzalemi. ¹⁴Aliwa egavenyile oPerege yahifiyaga nluwa na oAntiyokiya, murudda wa oPiziddiya. Nlabo na sabuddu yahivolowaga nyuba ya matugumano ya aZhudewu, okaraati. ¹⁵Nuwindo, egeelengile madhu a Malamulo a Mozezi ni madhu a maniivuru a anamavuhulela, asogoleli a nyuba ele yahirumihaga mutheenga wa aliwa, wiira: “Addibila, akala muhukalana madhu oolibiha wa nlogo, muwoge”.

¹⁶Vevale Pawulo ahivenyihaga ndada wiirihedha etoonyihedho, wambeela owoga, wiira: “Alobwana aEzarayeli ni nyo mwaatene munamoova Mulugu, keewani. ¹⁷Mulugu a nlogo ndda na aEzarayeli ahaasakula abaabi eehu, wiinjiviha nlogo neehu egali anaweendda elabo ya wEgubuddu. Oliye ahaavenyihawo abaabi eehu ni owodha waaye wuulubale. ¹⁸Mwa yaaka makumi mannayi ahivilela ni aliwa mwiiddeddeneni. ¹⁹Agabwanyulile malogo matanu ni meenddi a elabo ya Kanani, elaboya ahaavaha aEzarayeli wi ekale yeewa malabo maatene. ²⁰Nda dhaatedhene dheereyile mwa yaaka mazana mannayi ni yaaka makumi matanu (450). Nuwindo, Mulugu ahaavaha aliwa anamathonga, ofiyedha mudhidhi wa namavuhulela Samuweli. ²¹Vevale yahimuloba kingi, Mulugu ahaavaha Sawuli, mwaana a Kiizhi. Sawuli aali mulobwana a nlogo na Benzhami, alamulele yaaka makumi mannayi. ²²Mulugu agamvenyihilevo ola, ahimuhabihawo Davidi wi akale kingi eewa, oyene amwiireliye onamoona, eeraga: ‘Gihimoonna mwaana a Zhesi, Davidi, mulobwana oneewanana ni murima waaga,^c oneerena dhoofuna dhaaga dhaatedhene’.

²³Mwa anamabaliwelamo a Davidi, mooligana ni ororomeliha wa Mulugu, ahimudhana wa aEzarayeli Mvulumusi, oli Yesu. ²⁴“Yesu ahinafiye, Zhuwawu oolaleya obathizo wootthwaruwa wa aEzarayeli aatene. ²⁵Zhuwawu aakwanelihaga mabasa aaye oowoga, eeraga: ‘Munaguubuwelana okala aani? Miyo kagili Kirixtu. Mbwenye moone, ole onadha mundduli mwaaga, miyo kagifwaneele otapula mingoyi dha satho dhaaye’.

²⁶Amudhi, anamabaliwelamo a Abarhamu ni nyo amohiwa munamoova Mulugu, mvuruwane! Wa hiyo aatene nahirumihedhiwa madhu ala oovulumusa. ²⁷Ebaribari athu a oZheruzalemi ni apogo eewa kayamunonile wi Yesu aali Mvulumusi, yahaakwaneliha madhu a anamavuhulela, yeelengiwa masabuddu maatene. Mowindo yahaakwaneliha dhoovuhulela nda vamukoniliisu oliye wi akwe. ²⁸Naari yahaafwanyileve mwaha wofwanelele ompela, yahimuloba Pilatu wi Yesu apiwe. ²⁹Dhigaakwanele dhaatedhene dhalebiwe dha oliye, yahimvenyihavo vamuraddini, omuhela munsiyeni.^d ³⁰Mbwenye Mulugu ahimvenyiha muukwani. ³¹Yesu ahilogela malabo majinjeene ooneyelaga wa ale yamveelele okuma oGalileya, ofiya oZheruzalemi. Vevale ayene

^c 13.22 Samuweli Owambeela 13.14 ^d 13.29 Masiye a mudhidhi olene yakala wona nikungu.

yaaligi anamoona aaye wa nlogo. ³²Mowindo hiyo nnoolaleyelani Muselu Wapama: ³³Nde dhaaroromelihiiye makolo eehu, Mulugu ohaakwaneliha wa hiyo, vamvenyihiliye Yesu muukwani wona mulebeliwiiwa mu Saalimu a nabii:

“We oli Mwaana aaga;
peeno miyo guhuubala’.^e

³⁴Owoga dha ovenyihiiwa wa Yesu muukwani wi ahidhe awelela omavuddelo, Mulugu ahiiraga:

“Ginowuuvahani mareeliho oweela,
oororomeleya wa Davidi’.^f

³⁵Saalimu mmohi ahiwoga:

“Nyo kamunamwihiiye
Oweela eenyu avudde’.^g

³⁶“Ebaribareene Davidi agamwiimelele Mulugu mwiigumini mwaaye, ahikwa, ologohiwa ni makolo aaye, ovudda. ³⁷Mbwenye ole Mulugu amvenyihiliye muukwani kaavuddile. ³⁸Mowindo, amudhi, munone wi odheela mwa Mozezi nnolaleya oleveleliwa dhoothega. ³⁹Odheela mwa oliye aatene enamuroromela enowaakihedhiwa dhoothega dhaate-dhene, dhoothega dhahaandeyile waakihedhiwa odheela mwa nlamulo na Mozezi. ⁴⁰Moone wi dhuhuwiireyeleni dhawogile anamavuhulela, dheeriliisu:

⁴¹ “‘Moone, nyo munamunyemula Mulugu!
Mutikiniheye, mukwe.
Vowi gihiirana yego mwa malabo eenyu,
si yego eneeriinyu muhurumeedhe,
naari mmohi owaaddelihemoni’ ”.^h

⁴²Pawulo ni Baranabe egamaruwe, athu a wewule yahaalobaga wi sabuddu oowelela yaawogena muru mmohive olene. ⁴³Mutugumano ole ogamalile, aZhudewu ajinji ni amohiwa yamweebedha Mulugu yahimuharaga Pawulo ni Baranabe. Aliwa yoowoga ni athu ale yahaakwekwetha wi ekalegeve mmahalani a Mulugu.

^e 13.33 Masaalimu 2.7 ^f 13.34 Ezaya 55.3 ^g 13.35 Masaalimu 16.10

^h 13.41 Habakuki 1.5

⁴⁴Sabuddu ooharela mwa athu aatene a nluwa ndde yahitugumana-ga wi yiiwe madhu a Nabwiya. ⁴⁵AZhudewu egoonile muthithi ole, yahidhaaliwaga nrima, yahambeelaga ovaanyihanaga ni Pawulo, emunyemulaga.

⁴⁶Vano Pawulo ni Baranabe yahawaakulaga moohoova, wiira: “Yaali yoofuneya wi madhu a Mulugu elaleyiwe vowambeela wa nyo aZhudewu. Mbwenye vowi nyo kamunafuna waarumeedha, munoobuwela wi kamfwaneelele waakela egumi yoohumala, hiyo nnarugunuwela malogo mamohiwa. ⁴⁷Vowi eyo Nabwiya sinilamuleliye:

“ ‘Miyo guhuuhela we wona waara
vaari va malogo mamohi,
wi othukulele ovulumusiwa
ofiyedha omagomelo wa elabo’ ”.ⁱ

⁴⁸Athu oode veewiliwa madhu ayo yahihagalala, yahambeela othithimiha madhu a Nabwiya. Aatene yasakuliwe wi ekanne egumi yahiroromela Muselu Wapama ola.

⁴⁹Mowindo madhu a Nabwiya yahimwadheyela murudda ole waatene. ⁵⁰Mbwenye aZhudewu yahaatuzha ahiyana yamweebedha Mulugu yanna mabasa a vadhulu teto apogo oofuneya a nluwa ndde, vamohi yahambeela waaharahara Pawulo ni Baranabe. Athu ale yahawiigara murudda ole. ⁵¹Vano arumiwi yahitata nthubi na satho dheewa wona etoonyihedho yowaaruniha, nuwinda yahidhowa nluwa na oIkoniyo.^j ⁵²Anamasuuzwa a nluwa ndde yahidhaaliwa ohagalala ni Muneba Woweela.

Ofiya wa Muselu Wapama murudda wa oLikawoniya

14 ¹Nluwa na oIkoniyo, Pawulo ni Baranabe yahivolowa vamo-hi nyuba ya matugumano ya aZhudewu, yoolaleya ofiyedha aZhudewu ajinji teto athu aGerego ororomela. ²Mbwenye aZhudewu yaharoromele yahaatuzha oode wi yiiddane ni addibila yaali aKirixtu. ³Arumiwi yahikala malabo majinji elaleyaga madhu a Mulugu moohoova. Nabwiya owiirela onamoona dhawogiiwa dha mahala aaye, aavahaga owodha wowiirana dhitoonyihedho ni dhootikiniha ni madada eewa. ⁴Mbwenye athu a nluwa ndde yahigawanyeya; amohi yaali epaddi ya aZhudewu, amohiwa yaali epaddi ya arumiwi. ⁵Vano athu oode, aZhudewu ni apogo eewa, egaxixile wawooniha goyi ni waapa ni mabwe Pawulo ni Baranabe, ⁶arumiwi ale yahithawela oLixtara ni oDeribe, ma-

ⁱ 13.47 Ezaya 42.6; 49.6 ^j 13.51 Yesu ahaalamula anamasuuzwa aaye wi etate nthubi na manyalo eewa wooniha wi ale enakoodda Muselu Wapama enakala ookoneya. Moone Matewuzhi 10.14; Maruku 6.11; Luka 9.5; 10.11.

luwa a murudda wa oLikawoniya ni dhipaddi dhowaaddamela. ⁷Wewule yahiwelela olaleya Muselu Wapama.

⁸OLixtara wahikala mulobwana ookwa meddo, alogelesa ookaraatene, abaliwe ndo, keedda. ⁹Oliye ahimwiiwa Pawulo awogaga, vano Pawulo agamusugwile ahimoono wi ahikanna nrromelo nowi eere oyilihiwa. ¹⁰Oliye ahiwoga ni ndhu nootaama, wiira: “Wogoole manyalo aawo, wiimele!” Vevo mulobwana ole ahivenya, wambeela weedda.

¹¹Athu yaaligi vevale egoonile dheerile Pawulo, yahambeelaga okuwa mu eLikawoniya, yiiraga: “Amilugu ehissadduwa athu, okitela wa hiyo!” ¹²Mowindo yahimvahaga Baranabe ndina na Zhupiteri, yahimvaha Pawulo ndina na Merikuriyu mwaha wi Pawulo dawoga.^k ¹³Namakutha a nyuba ya mulugu Zhupiteri, nyuba eyene yaali ode wa nluwa, ahidha vamavolowelo agathukule ng'ombe ni kara dha todo. Oliye vamohi ni athu aaye yafunaga yaapelekele mikutho.

¹⁴Mbwenye arumiwi ala Pawulo ni Baranabe egeewile nde, yahitalaga dhoozara dheewa, olupela vaari va anamwinji, ekuwaga, yiiraga: ¹⁵“Alobwana, muneerela ddi dhedho? Hiyo nili alobwana a mukalelo mmohive ni nyo. Nili wuno wuulaleyelani Muselu Wapama wi murugunuwe wa milugu dheebeweene, murugunuwele wa Mulugu mugumi, opaddusile elabo ya odhulu ni ya vati, nyaza ni dhaatedhene dhili mwaatemwene mwemo. ¹⁶Wale Mulugu ahaahiya malogo maatene weedda dhifunelo dheewa. ¹⁷Mbwenye Mulugu kahiyile wiyooniha, eeragana dhapama, oovahagani muzongwe okumela odhulu, oovahagani midhidhi dhoo-hadda, adhaalihaga mwiili dheenyu ni dhooja, mirima dheenyu ni ohagalala”. ¹⁸Naari egawogile ndo dhaali dhoorusa wi yaatuzhe athu ale wi ehiplekele mukutho wa aliwa.

¹⁹Mbwenye yahifiya aZhudewu a oAntiyokiya ni a olkoniyo, waatuzha athu ale omvonya Pawulo ni mabwe. Omburulela ode wa nluwa, omoonga wona okwile. ²⁰Anamasuuzaga egamwaapeelele oliye ahivenya, owelela muluwani mwemule. Omenseloni wiwa, ahimaruwa ni Baranabe, odhowa oDeribe.

Owelela oSiriya

²¹Pawulo ni Baranabe egamalile olaleyela Muselu Wapama ni osuuziha oororomela ajinji muluwani mule, yahiwelela maluwa, oLixtara, olkoniyo ni oAntiyokiya murudda wa oPiziddiya. ²²Aliwa yoolibiha mirima dha anamasuuzaga, yalobaga wi ekalegeve munroromeloni. Teto yowasuuziha, yiiraga: “Nnaavolowe mu Omwene wa Mulugu odheela mu dhoozahariwa dhijinji”. ²³Mmagarezha mwaatemwene mwaviriisu,

^k 14.12 Mandina ala yaali a amilugu aGerego. *Zhupiteri* aali musogoleli a amilugu; *Merikuriyu* aali oothukula muselu adhowagana wa athu.

yowaasakulelamo apogo. Egaalobebele aatene ni othuga, yowaapeleka wa Nabwiya oyene apogo ale yamuroromeliwa.

²⁴Vano Pawulo ni Baranabe yahivira murudda wa oPiziddiya, ofiya murudda wa oPamfiliya. ²⁵Egalaleye muselu nluwa na oPerege, yahikite-la oAtaliya. ²⁶Okuma vevale yahigwela mwanddeya, owelela oAntiyokiya oSiriya wewo vowambeela waaveleeliwiwa mwa mahala a Mulugu wi mabasa ale dhiinova ehawaakwaneliha. ²⁷Egafiyile wewule, yahitugumanya gerezha, Pawulo ni Baranabe wawaaddela dhaatedhene Mulugu dheeriliye ni aliwa. Wawaaddela mwemo Mulugu mwaafuguleliye athu oode dila ya nrromelo mwa Yesu. ²⁸Vano yahikala mudhidhi mujinji ni anamasuza a wewule.

Mutugumano mulubale wa asogoleli a oZheruzalemi

15 ¹Athu amohi yakitele murudda wa oZhudeya, yahifiya oAntiyo-kiya, yahambeela waasuuziha addibila, yiiraga: “Nyo mwahiineliwa wona munasuuzihela nlamulo na Mozezi, kadhinaandeya wi mvulumusiwe”. ²Vahikala orunihana wuulubale, Pawulo ni Baranabe kayarumeedhe aliwa dhawogiiwa. Gerezha ya oAntiyokiya yahimusakula Pawulo ni Baranabe ni amohiwa mwa aliwa wi egwelele wa arumiwi ni apogo a gerezha ya oZheruzalemi wi yeewananele muladdu ola. ³Vano gerezha yahaaruma odhowa, aliwa yahivira mirudda dha oFinisiya ni dha oSamariya ewoga-ga mooharana-harana wona mwemo athu oode mwamurumeedheliwa Mulugu. Addibila aatene yaali oohagalala ni muselu olena. ⁴Egafiyile oZheruzalemi yahaakeliwa pama ni gerezha ni arumiwi ni apogo. Oorumiwa ale yahawaaddelamo dhaatedhene Mulugu dheeriliye ni aliwa. ⁵Mbwenye athu amohi oororomela yaali aFarizi wale yahivenyaga, wiira: “Soofuneya athu oode yiineliwe, elamuliwe eharege Malamulo a Mozezi”.

⁶Arumiwi ni apogo a gerezha yahitugumana wi yoone muladdu ole. ⁷Aliwa egawogile mudhidhi mulubaleene, vano Peduru ahiimelaga, wiira: “Addibilaga, muhunona wi wale Mulugu ahigisakula vaari va nyo wi odheela vamulomoni vaaga athu oode yiiwe Muselu Wapama erumeedhe. ⁸Oliye ononile mirima dha athu ohooniha wi onowaarumeedha athu oode, vovi ohaavaha Muneba Woweela aliwa wona teto hiyo mwanivahe-liiye. ⁹Kanihiyanihile ni aliwa, mwa nrromelo oheeliha mirima dheewa. ¹⁰Ki vano, munamweehela ddi Mulugu? Munafuna waahela fingwi mukohi anamasuza, hiyo nihinandiihu, naari makolo eehu kayaandile. ¹¹Mbwenye nnororomela wi nili oovulumusiwa mwa mahala a Nabwiya Yesu Kirixtu, hiyo ni aliwa nihivulumusiwa ni mukalelo mmohive”.

¹²Aatene yaaligi vevale yahimaalaga, omvuruwanaga Baranabe ni Pawulo, yahawaaddelaga dhitoonyihedho, dhootikiniha dhaatedhene Mulugu dheeriliye ni aliwa vaari va athu oode. ¹³Baranabe ni Pawulo egamaalile, Tiyago ahaakulaga, wiira: “Alobwana, addibila, mugivuru-

wane. ¹⁴ Simiyawu (Peduru) ohunaaddelihamo wona Mulugu vowambeela ahipwatha waasakula amohiwa vaari va athu oode wi ekale nlogo naaye. ¹⁵ Madhu a anamavuhulela enowiiwanana ni ndo. Dhihilebiwa ndala:

¹⁶ “Nabwiya dinawoga:

Nda dhavira, miyo ginowela:

Gineere owelihedha Omwene wa Davidi.

Gineere owelihedha ndebe, giimelihe Omwene.

¹⁷ Wi athu aatene amohiwa yaande omusayela Nabwiya, ale gawiithaniliimi wi ekale aaga'.¹

¹⁸ Di Nabwiya onoonihile dhego dhedhi wambeela mudhidhi dhawale”.

¹⁹ Vano Tiyago aheenjedhedhaga owoga, wiira: “Gihoona wi kahuwo pama wi naarusihege athu oode enarugunuwela wa Mulugu, ²⁰ mbwenye naalebele kaarata enawoga dhowi ehijege dhooja dhooveleliwa mukutho wa amilugu oosemiwa, kayiiregena dhooraruwa, kijege nyama dhoothithikuliwa naari mwazi. ²¹ Vowi wambeela wale, mwa maluwa maatene mu nyuba dha matugumano dha aZhu-dewu, nlamulo na Mozezi nnolaleyiwa nlabo na sabuddu nili naatenene”.

Kaarata yowaalebela athu oode

²² Vevale arumiwi, apogo a gerezha ni gerezha yaatene yahiiwananela waasakula amohi vaari veewa wi yaarume oAntiyokiya ni Pawulo ni Baranabe. Yahaasakulaga asogoleli eewa abiili: Zhuda, eethaniwa teto Barasaba ni Sila. ²³ Vevale yahileba kaarata, yeera: “Hiyo arumiwi ni apogo a gerezha, addibilinyu nihilebela kaarata ela wa nyoovo athu oode, addibilihu a oAntiyokiya, a oSir-iyi ni a oSilisiya. Mwaakele malojelo eehu. ²⁴ Nihiiwa wi athu amohi ookumela mwa hiyo yahifiya wewo wuurusihagani ni wuukukumulani ni masuuziho eewa. Ayene kayarumiwe ni olamulo weehu. ²⁵ Hiyo muumohini noonile okala yapama waasakula alobwana wi naarume wa nyo vamohi ni oodhivela akwiihu Baranabe ni Pawulo, ²⁶ alobwana enaveleela dhigumi dheewa mwaha wa ndina na Nabwiya eehu Yesu Kirixtu. ²⁷ Nihaarumiha Zhuda ni Sila wi ewoge ni nyo dhego dhedhi vameentoni veenyu. ²⁸ Vowi Muneba Woweela vamohi ni hiyo, noonile wi kahuwo yapama wuunyemelihani sapo dhimohi ehili oharihamo magano oofuneya ala: ²⁹ kamujege dhooja dhooveleliwa mukutho wa amilugu, kamujege mwazi, naari nyama ya aneenyama oothithikuliwa; kamwiiregena dhooraruwa. Mweeweelagala dhaatedhene ndo, muneerana dhapama. Akelani malojelo eehu”.

Oveleeliwa wa kaarata oAntiyokiya

³⁰ Aliwa egapaganyiwe, yahikitelaga oAntiyokiya, yahaatugumanya aKirixtu aatene, oveleela kaarata ele. ³¹ Egeelengile, yahihagalalaga, olibihi-

¹ 15.17 Amosi 9.11-12

wa ni madhu a kaarata ele. ³²Zhuda ni Sila ayene teto yaali anamavuhulela, yahiwogaga ni aliwa mudhidhi woolapa, yaakurumulaga mirima addibila ni waawaraaliha. ³³Egali wewule malabo majinji, addibila yahaarumaga owelela mundduli mwa murenddele wa ale jaarumile. ³⁴[Mbwenye Sila oo-buwele wi yaali yapama ologela wewule.]^m ³⁵Pawulo ni Baranabe yahikalave oAntiyokiya, aliwa ni amohi ajinji yahisuuziha ni olaleya madhu a Nabwiya.

Olendo wa nabiili wa Pawulo

³⁶Vigavirile malabo mamohi Pawulo ahiiraga wa Baranabe: “Ndowe niwelele, waweeddela addibila aatene mmaluwani maatene mwemo mwalaleyiliihu madhu a Nabwiya. Nawoone akala eli pama”. ³⁷Baranabe afunaga amuthukule Zhuwawu eethaniwa Maruku. ³⁸Mbwenye Pawulo ahilibihedhaga wi ahimuthukule, mwaha wi oliye ahaanyanyala oPam-filiya, kaavelele aliwa ofiyedha omala olendo wowambeela woolaleya. ³⁹Pawulo ni Baranabe yahikanganaga vajinji, ofiyedha omwalana. Baranabe omuthukula Zhuwawu Maruku, ogwela mwanddeya, odhowa eliga ya oXiperi. ⁴⁰Mbwenye Pawulo amusakulege Sila. Amudhi mwa Kirixtu egaavelele aliwa mwa mahala a Nabwiya, vano yahambeelaga olendo weewa. ⁴¹Yahivira murudda wa oSiriya, murudda wa oSilisiya, alibihaga dhigerezha dhaatedhene.

Osakuliwa wa Timoteyo

16 ¹Pawulo ahifiya nluwa na Deribe, voharella oLixtara. Wewule wahikala namasuuza mmohi ndina naaye Timoteyo. Maaye aali muZhudewu ooromela, mbwenye babe aali muGerego. ²Addibila aatene a oLixtara ni a oIkoniyo yoowoga dha opama wa Timoteyo. ³Pawulo ahifuna omuthukula wi yeeddege muulenddoni vamohi. Oliye ahimwiinela mwaha wa aZhudewu yaali mburo dha wewule vovi aatene yahinona wi babe a Timoteyo aali muGerego. ⁴Maluwa maatene mwa-viriiwa Pawulo ni amohiwa, yowawaaddela dha nlamulo arumiwi ni apogo a gerezha ya oZheruzalemi nakaraatihiliwi wi aliwa eharihege. ⁵Mowindo, gerezha dhaatedhene dhoolibihwi munroromeloni, aKirixtu yoweenjedhedheya nlabo ni nlabo.

Yooroha ya Pawulo oTorowaddi.

⁶Yahivira mirudda dha oFirizhiya, oGalasiya. Muneba Woweela kawaahiyile olaleya Muselu Wapama murudda wa oAziya. ⁷Egafiyile murudda wa oMisiya, yahifuna wi edhowe oBitiniya, mbwenye Muneba wa Yesu kawaahiyile. ⁸Egavirile oMisiya, yahikitela nluwa na oTorowaddi. ⁹Mahiyu Pawulo ahimoonaga mulobwana a murudda wa oMasedoniya

^m 15.34 Madhu ala kinafwanyeya mmaniivuruni awale.

ageemelile, amulobaga, eeraga: “Ovire oMasedoniya, onikamihedhe”.

¹⁰Mowaaguva nahiisasanyedha odhowaga oMasedoniya, vowi nahikanna ebaribari wi Mulugu ononiithana wi nalaleye Muselu Wapama wa aliwa.

Ofiya wa gerezha oEropa

¹¹Nigagwelile mwanddeya oTorowaddi, naheedda mowogoola odhowa eliga ya Samotarasiya. Omenseloni wiwa nahifiya varuwoni va oNe-yapolisi. ¹²Okuma vevale nagele oFiliposi, nili nluwa nowambeela na murudda wa oMasedoniya, murudda walamuliwa ni aRoma. Nahilogela malabo majinji wewule. ¹³Nlabo na sabuddu nahikuma muluwani, okala waaddamela mwihinje woobuweliihu wi okale mburo wa malobelo. Nahikaraatigi owogaga ni ahiyana yatugumanege. ¹⁴Vahikalaga mwihiyana mmohi eethaniwa Lidiya a nluwa na oTiyatira, namaguliha a guwo dhapama dha roxa, amweebedha Mulugu. Nabwiya ahifugula murima waaye wi arumeedhe dhawoga Pawulo. ¹⁵Mwihiyana ole ni emudhi yaaye yahibathiziwa. Vano Lidiya ahiniloba, wiira: “Akala nyo munorumedha wi miyo gihimuroromela Nabwiya, mudhe mwakale vaade vaaga”. Mowindo ahiniwaddihedha okala vaade vaaye.

Okumiha muneba mu ndina na Yesu

¹⁶Nlabo nimohi nidhowaga mburo wa malobelo, nahigumanaga ni namwali mudhaari ahiddiwe ni muneba wamooniha dhoosogolo. Anyaya yowaakelela korowa dhijinji ni omapitela weeriyena. ¹⁷Namwali ole ahambeela onihara, akuwaga mowindala: “Alobwana ala amwiimeleli a Mulugu a Mudhulu-dhulu, enalaleya dila yoovulumuwela”. ¹⁸Oliye owiiresana dhedho malabo majinjeene. Voomariha Pawulo ahitakaleliwa, ahirugunuwelaga mundduli, olamula muneba ole, wiira: “Mwa owodha wa ndina na Yesu Kirixtu, miyo ginowuulamula wi we okume mwa namwali ola!” Mowaaguva muneba wahikuma. ¹⁹Anya a namwali ole egoonile wi vano kinaakalegena yowaakela okumela mwa oliye, yahimwihidda Pawulo ni Sila, waadhowana vampanddoni va othongi. ²⁰Yahaasumela wa anamathonga, yiiraga: “Alobwana ala aZhudewu enozuzumiha muluwani mweehu. ²¹Enosuuziha dhilemeelelo dhina-hiiha nlamulo dhihinarumeedheya naari wiirana hiyo nigali aRoma”. ²²Vevo mulogo teto wahitakaleliwa vajinji ni Pawulo ni Baranabe, vevo anamathonga yahaakuguula dhoowara dheewa olamula wi ewaxuliwe. ²³Egawaxuliwe vajinji, anamathonga yahaavokedha mukaambura. Yahimulamulelaga mpogo a okaambura wi awiing'anelege pama. ²⁴Mpogo a okaambura agaakele nlamulo ndda, ahaavokedha suubi aali muwari-wari mwa kaambura, waamaga meddo ni kugulu.

²⁵Vaari ni vaari va mahiyu Pawulo ni Sila yoolobelaga, emwiibela-ga jibo Mulugu, anyakaambura amohi yoovuruwanaga. ²⁶Mowaaguva,

wahidha othikeya wuulubale vati, yahithikeya matibelelo a kaambura; mowaaguva misiwu dha kaambura dhahifuguwaga, fingwi dha mmeddoni ni mmoononi mwa anyakaambura dhahimora. ²⁷Mpogo a kaambura ahirurumuwaga, wona misiwu dha kaambura dhigafuguwe. Ahiladda supaadda wi eepena, oobuwelaga wi anyakaambura ehithawa. ²⁸Mbwenye Pawulo ahikuwaga ni ndhu nootaama, wiira: “Kwiyiirele yootakala, hiyo aatene nili veva!” ²⁹Vevale mpogo a kaambura ole ahiithaniha panti, othamagela muwari, ahikonaantigi ogurumelaga vameentoni va Pawulo ni Sila. ³⁰Ageere ndo ahaakumihedha ode, waa-koha, wiira: “Anabwiya, giire havi wi gavulumusiwe?” ³¹Pawulo ni Sila yahimwaakulaga, wiira: “Omuroromele Nabwiya Yesu, oneere ovulumusiwa, we vamohi ni vaade vaawo”. ³²Pawulo ni Sila yahimulaleyela ni athu aatene a vaade vaaye madhu a Nabwiya. ³³Mudhidhi olene wa mahiyu mpogo a kaambura ahaakameela, waahuwa makwadda eewa oowaxuliwa. Mowaaguva mpogo ole ahibathiziwa ni emudhi yaaye yaatene. ³⁴Nuwindo, ahaadhowana vaade vaaye, waavaha yooja; vano mpogo ole ni emudhi yaaye yaatene yahihagalala valubale mwaha woomuroromela Mulugu.

³⁵Ode ogasile, anamathonga yahaarumaga anyakoddo ni madhu owi: “Mwaatapule alobwana ale”. ³⁶Mpogo ole ahidhowaga omwaaddela Pawulo madhu ayene, wiira: “Anamathonga ehilamula wi mutapuliwe dhiinova. Vano mmaruwe mudhowege ni murenddele”.

³⁷Pawulo ahaakulaga, wiira: “Eganiwaxulile vaari va athu, hiyo nigali anamurala a omwene wa aRoma teto onivokedha mukaambura nihithongiwe, vano enafuna enikumihe mowiipiteya? Ii, naari. Kadhikale ndo! Edhe aliweene enitapule”.

³⁸Anyakoddo yahidhowaga wawaaddela anamathonga; aliwa veewiliwa wi yaali anamurala a omwene wa aRoma, yahoova. ³⁹Vano yahidhowaga wa aliwa, oloba nlevelo. Waatapula, wiira: “Evenyemo muluwani mule”. ⁴⁰Pawulo ni Sila egakumihiwe mukaambura, yahidhowaga vaade va Lidiya. Vevale egagumanile ni aKirixtu yahaalibiha, vano aliwa omaruwa.

Waakeliwa wa Muselu Wapama oTesalonika

17 ¹Egavirile maluwa oAmfipolisi ni oApoloniya yahifiya oTesalonika waali nyuba ya matugumano ya aZhudewu. ²Mooligana ni elemelelo ya Pawulo, yahivolowaga mwemule masabuddu maraaru, aalaleyelaga aliwa dha Maleba Ootaleleya, ³awaaddelaga, awoonihaga wi yaali yoofuneya wi Kirixtu arabule ni ovenyihwa muukwani. Pawulo oowoga, eeraga: “Yesu ola ginoolalelyiimini di Kirixtu oyene anamavuhulela yamuwogiliisu wi onoodha”. ⁴AZhudewu amohi yahikwekwethaya, otaganela ni Pawulo ni Sila. AGerego ajinji yamweebedha Mulugu teto

yahimuroromela Yesu, vamohi ni ahiyana apogo ajinji. ⁵Mbwenye aZhudewu amohi yahikalana nrima, odhowa waagula athu abure, osasanya nikuru nowiirana dhoovirigana muluwani mule, vano odhowa othamagela vaade va Zhasoni, emusayelaga Pawulo ni Sila wi yaapeleke wa anamwinji. ⁶Nuwindo, vahaafwanyiligiwa, yahimburulaga Zhasoni ni aKirixtu amohi, waadhowana wa apogo a nluwa, ekuwaga, yiiraga: “Ala ba ayene ya-tatamule ohiwanana elabo yaatene, ehifiya teto wuno. ⁷Vano Zhasoni ola ahawaakela vaade vaaye. Aatene ala yahithagela nlamulo na Kingi Sezari, evuwihaga wi ohukalawo kingi mmohi, oneeriwa Yesu”. ⁸Madhu alena yahitatamula nlogo ni apogo yeewile ndo. ⁹Aliwa yahimuwaddihedhaga Zhasoni ni amohi wi elive korowa, egalivile yahaahiyaga odhowa.

Waakeliwa wa Muselu Wapama oBereya

¹⁰Mowaaguva ode oribaga aKirixtu yahaapoothowihaga Pawulo ni Sila wi ethawele oBereya. Egafiyile yahidhowaga nyuba ya matugumano ya aZhudewu. ¹¹AZhudewu ale yoofuna wiiwelela waakwaranya aZhudewu a oTesalonika, yahaakela Muselu Wapama ni madada meenddi; mala-bo maatene yootugumana esuuzaga wi yoone akala Maleba Ootaleleya yowiiwanana. ¹²Mowindo athu ale ajinji vamohi ni apogo ajinji aGerego ahiyana ni alobwana yahimuroromela Yesu.

¹³Mbwenye aZhudewu a oTesalonika veewiliisu wi Pawulo onolaleya madhu a Mulugu oBereya, aliwa teto yahithamagelagawo, oligawo dhoo-rusa. ¹⁴Mowaaguva aKirixtu yahimpoothowihaga Pawulo, omudhowana seresere ya nyaza; mbwenye Sila ni Timoteyo yahihalaga oBereya wewo. ¹⁵Ale yamveleelege Pawulo, yahidhowaga ni oliye oAtena. Nuwindo, yahiiwelela oBereya ni mpaganyo wi Sila ni Timoteyo edhowe mowaagu-va wa Pawulo.

Ofiya wa Muselu Wapama oAtena

¹⁶OAtena Pawulo aajejihaga akwaaye, ahukuuwaga vowoona wi muluwani mule mwahidhaala dhingamuthu dhoosema. ¹⁷Malabo maatene mu nyuba ya matugumano ya aZhudewu teto ni mmusika, Pawulo oo-woga ni aZhudewu, vamohi ni aGerego yamweebedha Mulugu teto ni kadda muthu amfwanyiiye mwemo. ¹⁸Oononelamo a nikuru na aEpiku-rewu ni amohiwa a nikuru na Esitoyiko teto yoowogaga ni Pawulo. Amohiwa vevale yookoha, yiiraga: “Muddabwareya ola onawoga ddi?” Amohi yowiiiraga: “Onakalahi namalaleya a amilugu oode”. Yoowoga nda mwaha wi Pawulo oolaleya Muselu Wapama wa Yesu ni ovenyi-hiwa muukwani. ¹⁹Vevale oononelamo ala yahimuthukulela o nikuru na asogoleli a nluwa othuthumani ya Areyopago, wiira: “Nnafuna nnone masuuziho maxa enaalaleyiiwe. ²⁰Vowi weevo ononiiwiha dhego dhoo-tikiniha, nnafuna nnone dhedho dhinatapulela ddi?” ²¹(Vowi akadda

Atena ni anaweendda yakala wewule yooviriha mudhidhi weewa waatene ewogaga ni wiiwa dhixa.)

²²Vano Pawulo ahiimelaga va nikuru na Areyopago, wiira: “Nyo athu oAtena, miyo ginooona wi munaweedbha amilugu ajinji. ²³Vowi giviraga muluwani mweenyu gihisuuzela mule ni mule dhingamuthu dhoosema dheenyu. Gihifwanya emohi egalebiwe ayi: ‘Eheleliwe mulugu oohuno-niwa’. Ndala muluguya onamweebdhiinyu muhumunonile, duuyeene ginoolaleyeliimini dhiinova. ²⁴Mulugu opaddusile odhulu ni vati ni dhaatedhene dhilimo; oli Nabwiya a odhulu ni a vati, kanakala nyuba dha dhoweedbha dhoomagiwa ni madada a athu. ²⁵Naari kaneemeleliwa ni madada a athu, vowi kanahaleliwa yego; oliyeene dinavaha egumi ni ovuma dhoopaddusiwa dhaatedhene. ²⁶Mwa muthu mmohi baahi Mulugu ohupaddusamo malogo maatene wi ekale mwiilaboni mwaatemwene, aapimelaga mudhidhiya ni mburo mweeriisu ekalegemo. ²⁷Eeragana nda afunaga wi athu emusayelege naari emwaababelaga, emfwanye, vowi oliye kalapelane mwa mmohi mwa hiyo. ²⁸Hiyo nnakala mwa oliye, nneedda mwa oliye, nilive mwa oliye. Naari anamaleba eenyu a musibe yiiraga: ‘Hiyo nili teto athu a nlogo naaye’. ²⁹Vowi nili anamabaliwelamo a Mulugu, nuhuubuwelege wi makalelo aaye eli oofwanafwana ni dhingamuthu dhoosemiwa dha oro, naari dha parata, naari dha mabwe; dhi dhisasanyiwe ni madada ni moobuwelelo a athu. ³⁰Naari wona mudhidhi ovirile Mulugu ahilevelela ohunonelamo wa athu, dhiinova onowaalaleyela athu aatene, a mburo dhaatedhene wi etthwaruwe, ³¹mwaha wi ahithoma nlabo nimohi nneeriye athonge elabo yaatene ni oharihamo odheela mwa muthu mmohi omusakuliye, vano ola aheehiwa vameentoni va aatene, voomvenyiha muukwani”.

³²Alobwana ale a oAtena egeewile dha ovenya muukwani, amohi yoombeddaga, mbwenye amohi yowiiiraga: “Nneere wuwiiwa owogaga ndo nlabo nimohi”. ³³Mowindo Pawulo ahivenyagavo vaari veewa. ³⁴Vano athu amohi yahimuharaga Pawulo eroromelaga madhu aaye; mwa ala aali Diyonziziyu a nikuru na Areyopago ni mwihiyana eeriwa Damarizi teto amohi ni aliwa.

Ofiya wa Muselu Wapama oKorintu

18 ¹Dhigavirile dhoopadduwa nda, Pawulo ahivenyaga oAtena, odhowa oKorintu. ²Wewo ahimfwanyaga muZhudewu eeriwa Akwila ni mwihiyanaaye eeriwa Pisisila. Akwila aali a murudda wa oPonto. Ala yoofiyawene okuma wItaliya mwaha wi wewule Kingi Kalawudiyu ahilamula wi aZhudewu aatene evenyewo oRoma. Pawulo ahidhowa waweeddela, ³mwaha wowi mabasa aaye yaali mamohive, ookala ni aliwa wewule olabaga. Mabasa eewa yaali oosona misasa dha mooya a mbuzi. ⁴Masabuddu maatene oovaanyihanesa mu nyuba ya matugumano,

aakwekwethaga aZhudewu ni aGerego. ⁵Vano Sila ni Timoteyo egadhiile oMasedoniya, Pawulo ahiivelela olaleyela madhu, eerelaga onamoona wa aZhudewu wi Kirixtu ole Maleba Ootaleleya yaaroromelihiwa di mulobwana ola Yesu. ⁶AZhudewu yoomvaanya Pawulo, emunyemulaga, mwaha wa ela ahitata guwo dhaaye, wiira: “Mwazi weenyu okale vamuru veenyu, ovenya peeno odhowa osogolo ginaalaleyelege athu oode”.

⁷Pawulo agavenyile vevale, ahidhowaga vaade va mulobwana eeriwa Tisiyu Zhuxtu, oomweebedha Mulugu. Vaade vaaye vaaddamele ni nyuba ya matugumano. ⁸Vano Kirixpu, musogoleli a nyuba ya matugumano, ahimuroromela Nabwiya ni emudhi yaaye yaatene; teto aKorintu ajinji egamwiiwile Pawulo, yahiroromela, obathiziwa.

⁹Omahiyuni Nabwiya ahooneyelaga wa Pawulo, wiira: “Ohoove, olaleyegeve, ohumaale. ¹⁰Vowi miyo gili ni weevo, kalivo onowiirele yowoopiha, vovi gihikanna athu ajinji muluwani mu”. ¹¹Nuwindo, Pawulo ahikalave wewule yaaka ni mweeri mitanu ni mmohi, aasuuzihaga madhu a Mulugu.

Osumeliwa wa Pawulo

¹²Vano Galiyu agahabile vampanddoni va kuminadori a oAkaya, aZhudewu yahimwihidda Pawulo, omudhowana omuthegoni wa othonga muladdu, omusumela, ¹³wiira: “Mulobwana ola onowaakwekwetha athu wi emweebedhege Mulugu ni mukalelo ohuneewanana ni nlamulo”.

¹⁴Mbwenye Pawulo afunaga waakula, Galiyu ahimmaalihaga, wa-waaddela aZhudewu, wiira: “Mvuruwane, mwahaadhena muladdu wa ogwalagwambi, naari muladdu mmohi wowoopiha, miyo gowuuvuruwanani, githonge muladdu weenyu. ¹⁵Vano nyoovo munawanela madhu, mandina ni malamulo eenyu-eenyu; ndo dhikale ni nyo mwaanya, kaginafuna okala namathonga a dhego ndo!” ¹⁶Nuwindo, ahawiiagaraga mmuthegoni mwa othongi. ¹⁷Vevale anamwinji yahimwihiddaga Soxteni, musogoleli a nyuba ya matugumano, omuddwadhaga waaddamela vampanddoni voothonga vevale; mbwenye Galiyu kaapwathile dhowiireya nde.

Owelela wa Pawulo oAntiyokiya

¹⁸Pawulo ahikalave oKorintu malabo majinji, omamalelo wiwa, ahaapaganya aKirixtu a wewule, ogwela mmwanddeyani odhowaga oSiriya, vamohi ni Pisisila ni Akwila. Vano ahinamaruwe ahiiga mpala varuwoni va oSenkereya wi aakwanelihe yoororomeliha yeeriliye ni Mulugu. ¹⁹Egafiyile oEfeso, Pawulo ahimwihiya Pisisila ni Akwila wewule, odhowa nyuba ya matugumano wi agumane ni aZhudewu. ²⁰Aliwa yahimuloba Pawulo wi akale wewule mudhidhi mujinji, vano oliye kaarumeedhe; ²¹mbwenye ahaapaganyaga, wiira: “Nabwiya afuna, ginoodha giwele”. Nuwindo, ahigwelaga mmwanddeyani, ovenyawo oEfeso. ²²Agalabuwele oSezareya,

ahigwelelaga oZheruzalemi olojela gerezha; nuwindo ahikitela oAntiyokiya. ²³Ahikala wewule mudhidhi vang'ono, ovenyawo, ovira dhilabo dha oGalasiya ni oFirizhiya, aalibihaga aKirixtu aatene.

Masuuziho a Apolo

²⁴Mudhidhi olene ahifiya oEfeso muZhudewu mmohi eeriwa Apolo, mukadda Alixandiriya. Ola aali muthu ooyesa awogaga ni oonona Maleba. ²⁵Oliye ahisuuzihiwa dila ya Nabwiya; teto owaaguva mmunebani owoga ni osuuziha dha Yesu ni ononelamo, mbwenye anonile obathizo wa Zhuwawu baahi. ²⁶Vano oliye ahambeela owoga ahoovaga yego mu nyuba ya matugumano. Vevo Pirisila ni Akwila yahikala ni oliye okwibi, omutapulela mowaakwanela dila ya Mulugu.

²⁷Apolo afunaga olabuwela oAkaya, aKirixtu yahimulibiha, yaalebelaga kaarata anamasuuzi a wewule wi emwaakele ni madada meenddi. Apolo agafiyile, ahaakamihedha ale yaroromele odheela mwa mahala, ²⁸vowi ni kopolo dhuulubale oliye owavaanya aZhudewu vathaddo, awoonihaga mMalebani wi Kirixtu aroromelihiwe di mulobwana ola Yesu.

Masuuziho a Pawulo

19 ¹Apolo agali oKorintu, Pawulo ahivira mirudda dha omwaangoni, ofiya oEfeso. Ahaafwanyaga wewule anamasuuzi amohi, ²ahaakohaga, wiira: “Vambeeliinyu ororomela muhaakela Muneba Woweela?”

Aliwa yahimwaakulaga, wiira: “Naari, kanneewege wi ohukalawo Muneba Woweela”.

³Vano Pawulo ahaakohaga, wiira: “Ki vano, obathizo baani mwaakeliliinyu?”

Aliwa yahaakulaga, wiira: “Obathizo wa Zhuwawu”.

⁴Vevale Pawulo ahiwogaga, wiira: “Zhuwawu aabathiza ale yatthwaruwe mwa dhoothega dheewa. Owawaaddela wi emuroromele ole aadheege, oliye amuwogaga Yesu”. ⁵Aliwa egeewile ndo, yahibathiziwa mu ndina na Nabwiya Yesu. ⁶Vano Pawulo agaahelile madada Muneba Woweela wahaadheela; aliwa wambeela owoga dhiwogelo ni ovuwiha mutheenga wa Mulugu. ⁷Alobwana ala yaali vakukuuve kumi ni abiili.

⁸Ofiyedha mweeri miraaru Pawulo oodhowa mu nyuba ya matugumano, oowogaga moohoova, oolaleyaga aakwekwethelaga athu dha Omwene wa Mulugu. ⁹Mbwenye amohi mwa athu ayo yoomvaanyaga kayarumeedha, yoovevusa Dilaⁿ vaari va anamwinji, mwa ela Pawulo ahaathukula anamasuuzi waadhowana suubi mulubale a masuuziho a Tiraano, owaasuuziha wewo malabo maatene. ¹⁰Owaasuuziha mwemo yaaka biili, ofiyedha athu aatene a oAziya, aZhudewu teto ni aGerego, wiwa madhu a Nabwiya.

ⁿ 19.9 Dila naali ndina navahiwe masuuziho a Yesu.

Otthwaruwa wa akwiri

¹¹ Mulugu ahiirana dhootikiniha dhihineereyege odheela madada a Pawulo. ¹² Mwa ela athu yoothukula maleeso dhoowara dha mmwiilini mwa Pawulo, yadhowana wa aredda mareddaya yoovenyamo, mi-neba dhootakala dhookuma. ¹³ Vano aZhudewu amohi yaali anamugu oweeddedda yahixixa okopola mineba dhabure eromolaga ndina na Nabwiya Yesu, yooddodobela, yiiraga: “Ginowuuruma okumemo odheela mu ndina na Yesu onamulaleya Pawulo!” ¹⁴ Amohi yeerana ndo yaali ahima atanu ni abiili a Seva, musogoleli a anamakutha a aZhudewu. ¹⁵ Mbwenye muneba wabure wahawaakulaga, wiira: “Miyo gihimunona Yesu teto gihimunona Pawulo, mbwenye nyo kaguunonileni; muli aani?” ¹⁶ Vevale mulobwana ole ahiddiwe ni muneba wabure ahaalupelaga waahidda. Waagonjiha, nuwindo yahithawaga mba mule egali madave, egaporeyile. ¹⁷ Nda dhiganoneye ni athu, yakala oEfeso, aZhudewu ni aGerego, aatene yahidhaaleliwaga woova. Vano ndina na Nabwiya Yesu nowunnuwihiwa. ¹⁸ Vevo oororomela ajinji yoodha obwekaga, yoononiha vathaddo mabasa eewa. ¹⁹ Teto ajinji yeerana dha okwiri yahidhana maniivuru eewa yahiddiisuna mabasa eewa, waapaha vathaddo. Mutheengoya waaligi macikwi mazana makumi matanu (50.000) a parata.^o ²⁰ Mowindo ndhu na Nabwiya noomwadheyave, nookalave ni kopolo moweenjedhedheya.

²¹ Egavirile mapadduwo ala Pawulo ahuubuwela odhowa oZheruzalemi adheelaga oMasedoniya ni oAkaya. Ahiira: “Vano gafiya oZheruzalemi enofuneya geddeedde oRoma”. ²² Nuwindo, ahimuruma Timoteyo ni Eraaxtu, oomukamihedha aaye, oMasedoniya, mbwenye oliye ahihala murudda wa oAziya mudhidhi vang'ono.

Otatamula ohiiwanana wa Demetiriyu

²³ Mudhidhi wankeene wahitatamuwa ohiiwanana wuulubale wa anamwinji mwaha wa Dila. ²⁴ Ahikalawo mulobwana mmohi ndina naaye eeriwa Demetiriyu, aali namahana a parata. Oosasanya dhoohadhihela dha parata dha nyuba yoweebedha ya Aritimi.^p Ohana parata mukalelo olena yaali mabasa yavaha mpurelo mujinji wa ale yahidda mabasa ayo. ²⁵ Demetiriyu ola ahaatugumanya anamalaba yalaba mabasa mamohive, waawogana, wiira: “Alobwana, muhunona wi oreela weehu onadheela mwa mabasa alena. ²⁶ Vano munowoona, munowiiwa dhineera Pawulo ola ohuli oEfesove, mbwenye teto ni elabo yaatene ya oAziya. Oliye onowaakwekwe-

^o 19.19 Korowa emohi ya parata waali mutheengo waliveleliwa muthu alaba nlabo nimohi.
^p 19.24 *Aritimi* aali mulugu eewa a mwihiyana. Athu yaroromela wi oliye dadhiha dhilo, aneenyama, muzongwe mwiilaboni mule.

tha athu ajinji aaholosaga, eeraga: ‘Amilugu enasasanyiwa ni madada a athu kahuwo a ebaribari’. ²⁷Ehikalavo yowoopiha ehinaavahege thima ya mabasa eehu teto yowoopiha emohi eliwo sowi nyuba yoweebedha ya Aritimi athu kineerege yego. Teto nneere obwanyuwa nthithimiho na Aritimi, oyene athu aatene a oAziya ni a elabo yaatene ya vati enamweebedhiwa”.

²⁸Athu egeewile madhu alena yahitakaleliwaga vajinji; yahambeelaga okuwa, yiiraga: “Aritimi a aEfeso dili mpogo!” ²⁹Muluwani mwaate-mwene mwahidhaalaga nthapa. Aatene yoothamagelaga obwalo^q na dhowoonihedha, yahimuthukulaga Gayu ni Arixtariku a oMasedoniya, yadhiilege ni Pawulo. ³⁰Pawulo afunaga ovolowa vatugumanega nlogo, aKirixtu yahimukooddihaga. ³¹Teto apogo amohi a murudda ole yaali akwaaye, yahimurumihedhaga mpaganyo, emulobaga wi ahivolowe mbwalo na dhowoonihedha.

³²Amohi yakuwelaga yego emohi, amohiwa yakuwelaga emoheene, athu ale kayeewananaga, ajinji kayanonaga yatugumaneligiisu. ³³Amohi mwa anamwinji yoobuwelaga wi mutugumano ole waali wa muladdu wa Alixandere, mwaha wowi aZhudewu yoomukakelaga osogolo. Alixandere ahigwelihaga ndada wi aamaalihe, afunaga wiyaakihedha vameentoni va mutugumano. ³⁴Mbwenye athu ale vamudideligiwi wi oliye muZhudewu, aatene ni madhu mamohi yahikuwaga wora bili, yiiraga: “Aritimi a aEfeso dili pogo!”

³⁵Vevale namaleba a muluwani mule, agamaalihile nlogo, ahiiraga: “AEfeso, baani ohunonile wi nluwa na aEfeso thili namaang'anela nyuba yoweebedha ya Aritimi ni namaang'anela a nifwanafwaniho naaye ni-morile odhulu? ³⁶Mwaha wowi dhego dhi kahuwo dhovaanyiwa, mmaale, kamwiirena yego moohuubuwelela. ³⁷Vowi mwaadhiilena va athu ala, ehili ambava a nyuba yoweebedha, naari anamanyemula a mulugu eehu. ³⁸Vano akala Demetiriyu ni ameesili akwaaye ehikalana muladdu ni muthu di muthu, dhihikalawo mburo dha othongi, ehikalawo teto anameesesula miladdu. Mwaahiye aliweene esumelanega wewo. ³⁹Mbwenye mwakanna yego emohi wi yeesesuliwe mudhegena vamutugumano woononeya ni athu aatene. ⁴⁰Vowi ehikalavo yowoopiha, enaadhe enivahe muladdu wona anamatatamula ovaanyihana wula. Mwa mwaha ola kannaakwanihe oruna ovaanyihana wula, vovi kavili mwaha wofwanelela wi nivaanyihanega”. ⁴¹Agawogile nda, ahaabalalesaga aatene.

Olendo wa Pawulo wa oMasedoniya ni oGeresiya

20 ¹Ovaanyihana wule ogamalile, Pawulo ahawiithanaga anamasuuzale, waalibiha, waapaganya, omaruwa odhowaga

^q 19.29 *Bwalo* waali mburo mulubale wa dhowoonihedha. Wahikala dhittengu dhamagiwe muddibani mwa mwaango mwakaraati athu yoonelaga dhowoonihedha.

oMasedoniya. ²Vafiyiliye oweedda mirudda daatedhene aalibihaga aKirixtu ni madhu majinjeene, nuwindo ahifiya oGeresiya, ³walogeliye mweeri miraaru. Pawulo agahalile vang'ono wi agwele mwanddeya wooldhowa oSiriya, ahoona wi aZhudewu yahimureyela musapa, mowindo ahuubuwelela owelela mundduli avirelaga oMasedoniya. ⁴Pawulo aveleliwe ni: Sopatoru muBereya, mwaana a Piru, Arixtariku ni Sekundu a oTesalonika, Gayu muDeribe, Timoteyo vamohi teto Tikiku ni Torofimu a oAziya. ⁵Ala yahisogola, onijehaga^r oTorowaddi. ⁶Ogavirile mudhidhi wa Mathanga a Mikathe Dhoohuheliwa Emela, nahigwelaga mwanddeya oFiliposi voovira malabo matanu nahifiya oTorowaddi. Wewule nahigumanaga ni aliwa, okala malabo matanu ni meenddi.

Ovenyihwa wa mulobwana ookwa

⁷Nlabo nowambeela na sumaana nahitugumanaga wi nigwaddanye mukaathe. Pawulo oojehihaga odhowa obebehini wiwa, mowindo ahiwogaga ni athu moolapeliha ofiyedha vaari ni vaari va mahiyu. ⁸(Suubi a mudhulu watugumaniligiihu mwahikalaga panti dhijinji dhoomoneya.) ⁹Muzombwe mmohi eethaniwa Ewutiku akaraatilege vazhanee-lani, dhahimudheelaga kove ogonaga. Pawulo owogagave mudhidhi mujinjeene. Muzombwe ole agonaga ahimoraga, okuma wootandaa-nyihedheya wa neethaaru, yamfwanyilege ookweene. ¹⁰Vevale Pawulo ahikitaga, omukonaantela, omukubaarela mulobwana ole, wiira: “Muhukubanye! Ola ohukanna egumi”. ¹¹Agagwelile odhulu wa nyuba elene ahigwaddanyaga mukaathe oja, nuwindo ahiwelelaga owoga mudhidhi woolapeleene ofiyedha ode osa. Vano omaruwa. ¹²Nuwindo, akwaaye yahimudhowagana mulobwana ole agali mugumi, aatene yahilibihwaga vajinji.

Olendo wa Pawulo okuma oTorowaddi odhowa oMileto

¹³Nahimwihiyaga Pawulo wewule, hiyo ogwela mmwanddeyani odhowa oAsosi, wewo wamwaakelelihu Pawulo vovi anilamule ndo, mwaha afunile weedda ode. ¹⁴Pawulo aganifwanyile oAsosi, nahimwaakelelaga mmwanddeyani, hiyo odhowa vamohi oMitileni. ¹⁵Vevale omenseloni wiwa nahigwelaga mwanddeya nahifiyaga vakukuuve ni oKiyo. Nlabo nooharela nahifiya oSamo, nuwindo nlabo nooharela nahifiyaga oMileto. ¹⁶Vovi Pawulo ahimaruwela wi akwaranye oEfeso wi onaadhe athathile mudhidhi oAziya, aaguvelaga wi nlabo na Pentekoxte nimwiireyele oZheruzalemi dhakala dhowaandeya.

¹⁷O Mileto Pawulo ahirumihaga mpaganyo oEfeso wawiithaniha apogo a gerezha. ¹⁸Egafiyile ahawiirelaga: “Muhunona meeddelo aaga

^r 20.5 *Onijehaga* enatapulela wi namaleba a kaarata ela, Luka, aaligi vamohi ni Pawulo.

mudhidhi waatene okaliliimi ni nyo, okuma nlabo nowambeela givowiliimi oAziya wuno, ¹⁹ gimwiimelelaga Nabwiya moowiiyeviha waatewene, mitori ni dhooweewa dhagipadduwela mwaha wa misapa dha aZhudewu. ²⁰ Vowi kagilogohile dhego dhoofuneya, wuulaleyelani ni wusuuzihani dhaatedhene voweela teto nyuba ni nyuba ²¹ giirelaga onamoona wa aZhudewu teto wa aGerego wi etthwaruwe, emuharege Mulugu, emuroromelaga Nabwiya eehu Yesu.

²² “Dhiinova gihisogoleliwa ni Muneba ginadhowa oZheruzalemi gihinonaga dhinafuna ogiireyela wewo. ²³ Dhinoniliimi sowi Muneba Woweela woogiwa-raaliha nluwa ni nluwa wi omagiwa ni orabula dhili osogolo waaga dhinogjijiha. ²⁴ Naari ndo miyo ginodhowawo, wovi kagineelengela egumi yaaga wona yoo-funeya, eli yoofuneyesesa sowi gaakwanihela dhirumiwiimi wiirana ni ohidda mabasa egivahile Nabwiya Yesu. Ela sowi giirele onamoona Muselu Wapama wa mahala a Mulugu. ²⁵ Vano gihinona nyo mwaatene a mirudda mweeddiimi guulaleyelagani Omwene kamudha moonave kove yaaga. ²⁶ Mowindo ginowiirela onamoona peeno wi miyo kaginna muladdu ni mmohi a mwa nyo aarimeelaga, ²⁷ mwaha wi kaguulogohedheni yego, guhuulaleyelani dhaatedhene dha dila ya Mulugu. ²⁸ Mwiying'anele teto wiing'anela nikwedda nenddo Muneba Woweela wuuheliliwani wi mukale anamaang'anela wi mukameelege gerezha ya Mulugu, eyene eguliliye ni mwazi waaye-waaye. ²⁹ Miyo gihinona wi gavenyavo eneere ovolowa mugerezha amagaaddi enaakale wona miji dhooguwa vaari va nyo, kidha ebebedhela mabila. ³⁰ Naari mwa nyeeneve eneere oovenya amohiwa enasuuzihege dhoovirigana wi yaaburulele anamasuuzi mundduli mweewa. ³¹ Mowindo mukale owiyaang'anela, muubuwelelaga wi va yaaka thaaru, mahiyu ni mutana, kagimalile wuwaraalihani kadda muthu ni mitori.

³² “Dhiinova ginowuupelekani mmadani mwa Mulugu, mwa mutheenga wa mahala aaye. Mutheenga oyo ohukanna owodha woowaraaliha murroromeloni ni wuvahani mareeliho oliye yinniyena wa aatene ayene eli oweelihiwa. ³³ Kagikalele nrima parata, naari oro, naari dhoowara dha muthu mmohi. ³⁴ Nyo muhunona wi madada aaga ala ehidda mabasa wi gifwanye nde dhagihaleela ni dhaahaleela ale yaali ni miyo. ³⁵ Mwa dhego dhaatedhene nda guhuwoonihani wi voohidda mabasa moolibihedha ndala soofuneya wi mwaakamihedhege oohaleeliwa, muubuwelelaga madhu a Nabwiya Yesu oliyeene yiiriliye: ‘Ovaha onodhana ohagalala vajinji, ohiya waakela’ ”.

³⁶ Pawulo agawogile dhego nda, ahikokoraga ni aatene ayene, olobela. ³⁷ Vevale aatene yahiindda vajinji, omukubaarela, ombezharigi. ³⁸ Ali-wa yahukuuwaga vajinji mwaha wa madhu ale yawogiligiiye owi kidha yoonave kove yaaye. Nuwindo, yahimvelelaga omwanddeyani.

Olenddo wa Pawulo wa oZheruzalemi

21 ¹ Nigamwalane nahimaruwaga ni mwanddeya, weedda mowogoola ofiya oKosi, nlabo nooharela nahifiyaga oRoddi, okuma vevo nahi-

fiyaga oPatara. ²Nahifwanyaga mwanddeya wadhowaga oFinisiya, hiyo ogwela omaruwa. ³Naang'anaga eliga eneeriwa Xiperi nahikakelaga moonoo woong'oto, nahicapaga mwanddeya ofiya murudda wa oSiriya, wiimeliha mwanddeya oTiru, wewule anya a sapo pwafunigiwa okitiha. ⁴Nigaafwanyile amudhi mwa Kirixtu awewule nahikalaga ni aliwa malabo matanu nameendi. Aliwa, mwa Muneba Woweela, yahimulobaga Pawulo wi ahixixe odhowa oZheruzalemi. ⁵Nigaakwanihile waweedela nahimaruwaga olenddo weehu. Alobwana aatene ni ahiyaniwa ni aniiwa yahiniveelaga ofiyedha ode wa nluwa. Nahikororaga seresere ya nyaza, olobela. ⁶Vevale nahipaganyanaga, hiyo ogwela mwanddeya, aliwa owelelaga mmavade mweewa. ⁷Nigamalile olenddo weehu wa oTiru, nahifiyaga oPetolomayida. Wewo nahaalojela amudhi amohi mwa Kirixtu, okala ni aliwa nlabo nimohi. ⁸Nlabo nooharela nahimaruwaga odhowa oSezareya, ofiya vaade va Filipi, namalaleya a Muselu Wapama, mmohi mwa atanu ni abiili,^s okala vevale. ⁹Ola ahikalana ahima anamwali annayi yaali anamavuhulela, kayateliwe.

¹⁰Nigali wewule malabo majinjeene, ahidhaaga namavuhulela akumelaga oZhudeya, eethaniwa Agabu. ¹¹Vadhiligiye, ahithukulaga sintu na Pawulo, Agabu omagana madada ni manyalo aaye, wiira: “Nda sinawoga Muneba Woweela: ‘Mwiinya a sintu ndda, aZhudewu a oZheruzalemi enoommaga ndala vano empeleke mmadani mwa athu oode’”. ¹²Nigeewile madhu alena hiyo ni athu a niburo ndde, nahimulobaga Pawulo wi ahigwelele oZheruzalemi. ¹³Nuwindo, ahaakulaga, wiira: “Munanddela ddi, mugivoreyihaga murima? Vowi ginorumeedha ohuli ofugeliwave baahi, mbwenye ofiyedha okwa mwaha wa ndina na Nabwiya Yesu oZheruzalemi”. ¹⁴Voonilihu wi kannanda omukwekwetha, nahimaalaga, hiyo wiira: “Ofuna wa Nabwiya wiireye!”

¹⁵Egavirile malabo alene, nahisasanyedhaga olenddo weehu, omaruwa, ogwelela oZheruzalemi. ¹⁶Anamasuuzwa amohi a oSezareya yahiniveelaga teto, onifiyiha oZheruzalemi, vaade va Menasawu, mukadda Xiperi. Ola aali mmohi mwa aKirixtu owambeela, nahayile vevo.

Weelihiwa wa Pawulo

¹⁷Nigafiyile oZheruzalemi, addibila ni arogora yahinaakelelaga ni ohagalala. ¹⁸Nlabo nooharela Pawulo ahivenyaga vamohi ni hiyo wi agumane ni Tiyago ni apogo aatene a gerezha yatugumanenge wewule. ¹⁹Egalojelane, Pawulo aha-waaddelihagama mooharana-harana dhaatedhene dhedho Mulugu dhiiriliye vaari va athu oode odheela mwa meerelo a orumiwi waaye. ²⁰Vevale egeewile dhedhi yahimuthithimihaga Mulugu. Vano yahimwaaddelaga Pawulo, wiira: “We ddibilihu, onowoona pamadhene wi vihikala aZhudewu macikwi ni macikwi emuroromele Kirixtu, aliwa aatene enoharihamo moodidela Malamulo.

^s 21.8 Mmohi mwa atanu ni abiili enaagiwana ale yasakuliwe oZheruzalemi wi yawiimelelege amaamukwele vovaagawela dhooja. Moone Meerelo a Arumiwi 6.1-7.

²¹ Athu ehawaaddela dha nyo wi munowasuuziha aZhudewu aatene eli dhilabo dha ode wi ehiiwelelege Malamulo a Mozezi, wiiraga kayawiinelege aniiwa, naari oharaha meeddelo a aZhudewu. ²² Ki veva nneere avi? Ebaribareene aliwa enowiwa wi muhufiya. ²³ Vano wiirena enowaaddeliihu: Ehikalavo veva athu annayi elibele wa Mulugu. ²⁴ Mudhowe ni aliwa, mweyeelihe vamohi, olive mutheengo wa weelihiwa weewa wi yaande ojema miru dheewa. Ndo aatene enoonona wi kahuwo ebaribari dhinawogiwa dha we, enerege woona wi onowiiwelela Malamulo. ²⁵ Mbwenye nihaalebela kaarata wa athu emuromele Yesu ehili aZhudewu wi ehijege nyama ya aneenyama ookutheliwa a milugu eebeweene, ehijege mwazi, naari mwaneenyama oohogiwa wi ehikale ajeberuwe, anamararuwa”. ²⁶ Nuwindo, omenseloni wiwa Pawulo ahikala vamohi ni alobwana ale aatene, wiyeeliha, oliye ovolowa mu nyuba ya Mulugu wi awaaddelihemo anamakutha omala wa malabo owiyeeliha weewa, waakuthiwe alini mukutho wa kadda muthu.

Omagiwa wa Pawulo

²⁷ Ehalaga vang'ono omala malabo matanu nameendi owiyeeliha, aZhudewu a oAziya egamoonile Pawulo mu nyuba ya Mulugu, yahituzhaga nlogo naatenene, omwihidda Pawulo. ²⁸ Yookuwaga, yiiraga: “Nyo aEzarayeli, munikamihedhe! Mulobwana ola di oyene onaasuuziha athu dhipaddi dhaatedhene dhoonyemula nlogo neehu, dhoonyemula Malamulo, dhoonyemula mburo ola. Ohiya ndo ohaavolosiha teto aGerego mu nyuba ya Mulugu, anoongaga weela wa mburo ola”. ²⁹ Yawogele dhedhi vovi yahimoonaga Torofimu muEfeso vamohi ni Pawulo muluwani, vano yoobuwelaga wi Pawulo ahimvolosiha nyuba ya Mulugu.

³⁰ Athu aatene a muluwani mule yahitakaleliwaga, yahithamagaga, ogumanela, omwihidda Pawulo, omburulelaga ode wa nyuba ya Mulugu, mowaaguva misiwu dhahifugiwaga. ³¹ Vevale athu ale efunaga ompa Pawulo, musogoleli a nikuru naatenene na anyakoddo a oRoma ahaaddeliwaga wi mu Zheruzalemi mwaatemwene mwahikala mbigiddi. ³² Mowaaguva oliye ahaathukula anyakoddo ni asinturiyawu,^t waathamagela anamwinji ale. Vevale athu ale vamooniigiisu musogoleli ole ni anyakoddoya yahimwihiyaga omuddwadha Pawulo.

³³ Musogoleli a anyakoddo ahimwaaddamelaga Pawulo, omwihidda, olamula wi emmage ni fingwi biili, vevale ahikohaga, wiira: “Muthu ola baani? Okalile addi?” ³⁴ Amohi mwa anamwinji yookuwaga ni mukalelo mmohi, amohiwa yookuwaga ni mukalelo mmoheene. Mwaha wa nthapa musogoleli a anyakoddo ole kaandile onona ebaribari, mowindo ahilamulaga wi Pawulo athukuleliwe mburo wa anyakoddo. ³⁵ Yaaddamelaga sikaadda ya vamaivolowelo, anyakoddo ale yeerege omuthukula ni

^t 21.32 *Asinturiyawu* yaali asogoleli a anyakoddo zana (100) a aRoma.

mwaha wootukumiwa ni anamwinji, ³⁶vowi anamwinji aatene yowaaharaga ekuwaga, yiiraga: “Mumpel!” ³⁷Vevale Pawulo agahalile vang'ono wi avolosihawe, ahiwogaga ni musogoleli a anyakoddo, wiira: “Ginorumeedhiwa wi giwoje ni nyo?”

Oliye ahaakulaga, wiira: “We onowoga eGerego? ³⁸We kuli mwEgubuddu ole atatamule wiinyuwela malabo amundduli, ole aathukulele okokolani mapanga macikwi mannayi (4.000)?”

³⁹Nuwindo, Pawulo ahaakulaga, wiira: “Miyo gili muZhudewu, mwanamurala a oTarusu, nluwa noovuweya na murudda wa oSilisiya. Ginowuulobani wi mugirumeedhihe owoga ni athu ala”.

⁴⁰Ahimurumeedhihaga, vano Pawulo wiimela musikaaddani, ovenyiha ndada naaye wiirana etoonyihedho wi emaale. Vano athu yahimaalaga pee, oliye owoga ni eHeberi, wiira:

Wiyaakihedha wa Pawulo

22 ¹“Addibilaga ni abaabi, vuruwanani madhu owiyaakihedha waaga vameentoni veenyu”. ²Vevo egamwiiwile wi onawogana eHeberi yahimaalaga pee. Vano Pawulo ahiiraga: ³“Miyo gili muZhudewu, gibaliwe nluwa na oTarusu a oSilisiya, mbwenye gunnulele va nluwa nendda. Gisuuzihiwe mwemu ni Gamaliyeli, ohugisuuziha mootibesesa Malamulo a makolo eehu, gididelaga dha Mulugu wona nyo malabo a peeno. ⁴Miyo gowaaharahara athu a Dila ela ofiyedha amohi opiwa. Gaamagihaga alobwana ni ahiyana, gaafugelaga mukaambura. ⁵Musogoleli a anamakutha ni asogoleli aatene a aZhudewu anamooni a dhedho. Aliwa yahigiinkelela makaarata wi gidhowena wa addibilihi aZhudewu a oDamasiku, gahivenya odhowaga wewo wi gaamage aKirixtu a wewule gaadhena oZheruzalemi wi yoonihiwe goyi.

⁶“Vano ngali voolenddoni gaaddamelaga ofiya oDamasiku, wora vakukuuve ya kumi ni biili ya mutana, mowaaguva waara wookwaranya woodheela odhulu wahigimoneya mogaapelela. ⁷Nuwindo, gahitongwelaga vati, gahiiwaga ndhu, niiraga: ‘Sawuli, Sawuli, onagiharaharela ddi?’

⁸“Gahikohaga, wiira: ‘Muli aani, Nabwiya?’

“Vano oliye wiira: ‘Miyo gili Yesu, muNazarethi, onamuharahariwe’. ⁹Akwaaga yaaligi ni miyo voolenddoni yahoona waara, yahiiwaga ndhu ndde mbwenye kayeewelegemo.

¹⁰“Vevele gahikohaga, wiira: ‘Gineere ddi, Nabwiya?’

“Oliye ahiiraga: ‘Ovenye, odhowe oDamasiku, wewo eneere wuwaaddele dhaatedhene dhedho dhithomeliwiiwe wiirana’. ¹¹Vowi kagoonaga ni mwaha wowaara wule wa nthithimiho, akwaaga yaaligi ni miyo bagihi-ddelege mooni ogikogodhihaga ogifiyiha oDamasiku.

¹²“Wewo wahikala muthu mmohi eeriwa Ananiya, owiivelela mMalamuloni, ootthetheeliwa ni aZhudewu aatene yamagile wewule,

¹³ ahidhaaga, wiimela vowaaddamela ni miyo, wiira: ‘Ddibilaaga Sawuli, owelele woonege’. Mudhidhi olene ngathukule meento, gahimoonaga oliye.

¹⁴ “Nuwindo, oliye ahiiraga: ‘Mulugu a makolo eehu ohuusakula wi onone ofuna waaye, omoone Owogoowa,” teto wiiwe madhu a muwano mwaaye, ¹⁵ mwaha wi onakale namoona aaye vameentoni va athu aatene wa dhego dhooniliwe ni dhiiwiliwe. ¹⁶ Ki dhiinova onajejiha ddi? Ovenye, obathiziwe, ohuwihe dhoothege dhaawo, wiithanaga mwa ndina naaye’.

¹⁷ “Ngawelele oZheruzalemi, gilobelaga mu nyuba ya Mulugu, gahoona-ga yootikiniha, ¹⁸ gahimoonaga Nabwiya, oliye ogiirela: ‘Ovenyemo mu Zheruzalemi mowaaguva, mwaha wi athu kinaakele onamoona waawo onawoga dha miyo’.

¹⁹ “Gahaakula, giira: ‘Nabwiya, aliweneene ehinona wi mu nyuba mwaatemwene dha matugumano gowaafugela mukaambura, gowaawaxula ale yoororomelani. ²⁰ Vevale apiwaga namoona eenyu Extewawu, miyo gahikalagavo gowaakulelaga teto miyo dalogolege dhoowara dha anamapaya’.

²¹ “Mbwenye Nabwiya ahigaaddelaga, wiira: ‘Odhowe, ginowuuruma woolapelawene wa athu oode’ ”.

Omagiwa wa Pawulo

²² Nlogo nahimwiiwa Pawulo ofiyedha owoga madhu ayene. Nuwindo, nahikuwaga, niiraga: “Muthu ola avenyihivevo veelaboni va, kafwaneelele wi akalena egumi!”

²³ Ekuwagave, yooburulaga maleya eewa, etatelaga nthubi odhulu, ²⁴ Musogoleli a anyakoddo ahilamulaga wi Pawulo adhowiwena muwari mwa mburo wa anyakoddo. Wawiirela wi emuwaxulege, emukohaga wi musogoleli ole anone mwahaya wamukuweleliisu. ²⁵ Emurunddumulaga ni mingoyi wi emuwaxulege, Pawulo ahimukohaga sinturiyawu aaligi vevale, wiira: “Dhinorumeedheya omuwaxula mwanamurala a omwene wa oRoma, ahinathongiwe?”

²⁶ Sinturiyawu veewiligiye dhedhi, ahidhowaga wa musogoleli a anyakoddo, omwaaddela, wiira: “Onafuna wiire ddi? Vowi muthu ola mwanamurala a omwene wa oRoma”.

²⁷ Musogoleli ole ahidhaaga, omukoha Pawulo: “Ogaaddele, we oli muRoma?”

Oliye waakula, wiira: “Ee, gili”.

²⁸ Vevale musogoleli ole ahiwogaga, wiira: “Miyo oRoma waaga boogula ni korowa dhijinji”.

^u 22.14 *Owogoowa* onaagiwana Yesu Kirixtu.

Pawulo ahimwaakulaga, wiira: “Mbwenye oRoma waaga boobaliwana”.
²⁹Mowaaguva ale yaaligi vevale wi emukohege Pawulo yahivenyagavo. Musogoleli a anyakoddo ahoova voonona wi ammagile mwanamurala a omwene wa oRoma.

Otongiwa wa Pawulo ni apogo a aZhudewu

³⁰Nlabo nooharela musogoleli a anyakoddo ole oofunaga onona mwaha wa ebaribari aZhudewu wamusumeleliwa Pawulo. Ahilamulaga wi etugumane apogo a anamakutha, Nikuru nuulubale na apogo a aZhudewu, oliye ahimutapulihaga Pawulo, ahirumiha omudhana, omwiimeliha vaari veewa.

23 ¹Pawulo ahisugwaga Nikuru nuulubale na apogo a aZhudewu, wiira: “Addibilaga, ofiyedha peeno ginoweeddave ni murima woweela vameentoni va Mulugu”. ²Vevale musogoleli a anamakutha Ananiya ahaarumaga yamwaaddamelege Pawulo wi emuddwadhe owano ni. ³Vano Pawulo ahiwogaga ni oliye, wiira: “Mulugu onowuuddwadha, we nsiri noweelihiwa! We kukaraatile wi ogithonge moohara Malamulo? Mbwenye we kunahariha Malamuloya, onalamula wi giddwadihiwe”.

⁴Ale yaaligi vakukuuve va oliye yahiiraga: “Onamuruwana musogoleli a anamakutha a Mulugu?”

⁵Pawulo ahaakulaga, wiira: “Addibilaga, kaganonile wi oliye musogoleli a anamakutha; vovi dhihilebiwa: ‘Ohumuruwane ole oli musogoleli a nlogo naawo’ ”.

⁶Vano Pawulo vooniligiye wi amohi mwa aliwa ba nikuru na aSaduseyi, amohi ba nikuru na aFarizi, ahikuwaga, wiira: “Addibilaga, miyo teto gili mFarizi, mwaana mFarizi! Ginothongiwa mwaha wi ginojehedha ovenyihwa muukwani!” ⁷Agawogile madhu alena aSaduseyi ni aFarizi wambeela okangana, ogawanyeya. ⁸Vovi aSaduseyi kinaroromela wi ohukalawo ovenyihwa muukwani teto kaliwo mungero naari muneba, mbwenye aFarizi enororomela dhaatedhene dhedhi. ⁹Ndala vahikalaga nthapa nuulubale. Vano yahivenyaga anamasuuziha amohi a Malamulo a nikuru na aFarizi wambeela opambihana, wiira: “Kanifwanyile yoovirigana naari yovi emohi mwa muthu ola. Akala muneba naari mungero diwogile ni oliye?” ¹⁰Ovaanyihana wahitthabwaga musogoleli a anyakoddo ofiyedha woova wi eneere omvarula Pawulo. Ahaalamulaga anyakoddo wi ekite, emwaakihedhe mwa aliwa, emudhowena omburoni wa anyakoddo.

¹¹Mahiyu ooharela Nabwiya ahimooneyela Pawulo, omwiirela: “Muri-ma waawo olibe. Wona ogiireliiwe onamoona wuno oZheruzalemi, soofuneya wi teto ogiirele onamoona oRoma”.

Opanganela dha ompa Pawulo

¹²Ogasile, Azhudewu yahipanganela dhabure, olibeleda vamohi, yiiraga: “Kannaja, naari ong'wa ofiyedha nimpe Pawulo”. ¹³Yaali okwaranya athu makumi manayi yavolowile mmawujeni. ¹⁴Aliwa yahidhowaga wa apogo a anamakutha ni apogo a nlogo, wiira: “Hiyo nihiiwanana olibela mmirimani mweehu wi kannaja yego naari ong'wa ofiyedha nimpe Pawulo. ¹⁵Vano nyo vamohi ni Nikuru naatenene mmulobe musogoleli a anyakoddo wi amudhena Pawulo wa nyo, mukalegehi munafuna muwelelele osuuzela muladdu waaye ofiyedha othongiwa. Vano hiyo nnakala owiisasanyedheene nimpe ahinafiye wa nyo”.

¹⁶Mbwenye mwaana-mulobwana a murogoriye Pawulo ageewile dha mawuje ale, ahidhaaga, ovolowa mburo wa anyakoddo, omwaaddela Pawulo dhaatedhene. ¹⁷Vevale Pawulo ahimwiithanaga sinturiyawu^w mmohi, wiira: “Mumvelele muzombwe ola wa musogoleli a anyakoddo. Ohukanna madhu enafuniye omwaaddela”.

¹⁸Sinturiyawu ahimuthukulaga muzombwe ole, omudhowana wa musogoleli a anyakoddo, wiira: “Munyakaambura Pawulo ohugiithana, ogiloba wi gimudhena muzombwe ola vameentoni veenyu. Pawulo wiire ola ohukanna madhu wi owaaddeleni”.

¹⁹Musogoleli a anyakoddo ahimwihiddeelaga ndada muzombwe ole, omudhowana nikukuru, omukoha, wiira: “Onafuna ogaaddele ddi?”

²⁰Oliye ahimwaakulaga, wiira: “AZhudewu ehipanganela wi yuulobeni mmudhowena menselo Pawulo wa Nikuru neewa na apogo, mukalegehi munafuna musuuzele muladdu waaye. ²¹Kwaahiye wi yuukwekwethe wiirana ndo, vovi eli okwaranya athu makumi manayi ayene yiisasa-nyedhe omwiipiteleda Pawulo. Ehiwanana olibela wi kinaaje yego naari ong'wa ehimpile Pawulo. Dhiinova ehiisasanyedhela, ejijihedhelaga yoorumeedha yeenyu wa yoolobiiwa”.

²²Vevale musogoleli a anyakoddo ahimpaganyaga muzombwe ole, omusumulula, wiira: “Ohumwaaddele muthu mmohi wi ohugaaddela dhego dhedhi”.

²³Nuwindo, ahawiithanaga asinturiyawu abiili, waalamula, wiira: “Ehinafiye wora tanu ni nnayi ya mahiyu alena mwaasanyedhe anyakoddo mazana meenddi edhowe oSezareya teto anyakoddo makumi matanu ni meenddi owaagwela akavalo teto mazana meenddi aliba mwaalago. ²⁴Mmusasanyedhe kavalo Pawulo amugwele wi afiye pama wa Kuminadori Felixi”.

²⁵Vano musogoleli a anyakoddo ole ahilebaga kaarata, wiira:

²⁶“Ooriiheya Kuminadori Felixi, ginowuulojelani. Di miyo, Kalawudiyu Lisiyasi ginaleba. ²⁷Mulobwana oyo aZhudewu

^w 23.17 *Asinturiyawu* yaali asogoleli a anyakoddo zana (100) a aRoma.

bamwihiddile, yeera wi empe gigafiyile ni anyakoddo aaga gihi-mwaakihedha, mwaha gihiiwa wi oliye muRoma. ²⁸Gifunaga onona mwahaya wamusumeleliisu, gahimudhowana muddibani mwa Nikuru neewa na apogo a aZhudewu. ²⁹Gahoono wi emusumelele mwaha wa dhego dha Malamulo eewa, mbwenye kavili muladdu wofwanelela okwa, naari mukaambura. ³⁰Gigeewile wi vahikala owogiwa mawuje odheela wa muthu oyo, mowaaguva gihimurumiha wa nyooovo. Gihawaaddela aliba omusumela ayo wi edhe ewoge muladduya vameentoni veenyu”.

³¹Vevale anyakoddo ale yahimuthukulaga Pawulo wona mwalamulieliwiwa, omudhowana ni mahiyu ofiyedha oAntipatiride. ³²Nlabo nooharela nikuru nimohi na anyakoddo yahiwelelaga omburoni weewa, waahiya aliba waagwela akavalo emvelelaga Pawulo. ³³Aliba akavalo egafiyile oSezareya, egapelekile kaarata wa Kuminadori teto yahimpelekaga Pawulo. ³⁴Kuminadori ageelengile kaarata ele, ahimukohaga Pawulo, wiira: “Oli a murudda baani?” Vano aganonile wi muSilisiya, ³⁵ahimwaaddelaga, wiira: “Ginowiiwa muladdu waawo yadha teto aliba wuusumela”. Nuwindo, ahilamulaga wi aang'aneliwege munyuba yooli-bihiwa yamagiwe ni Heroddi.

Osumeliwa wa Pawulo vameentoni va Felixi

24 ¹Egavirile malabo matanu Ananiya, musogoleli a anamakutha, ahiveleliwa ni apogo a aZhudewu, vamohi ni oononelamo nlamulo, eeriwa Teritulo, ala yahikitaga, ofiya vameentoni va Kuminadori, vevale omusumela Pawulo. ²Nuwindo, egamwiithanile, Teritulo ahambeelaga omusumela, eeraga: “Ooriiheya Felixi, voovira malabo majinji hiyo nnakala mmurenddeleni onadheela mmathongelo mweenyu. Mwiilaboni mu nnowoona ocenjeya oneereya odheela mmoobuweleloni mweenyu. ³Mwa dhipaddi dhaatedhene ninowuutthettheelani mwaha wa dhapama dhedhi dhinaniireliinyu. ⁴Kamwiirena, kaginafuna wuwiiyelani mudhidhi, mbwenye ginowuulobani munivuruwane vang'ono moovilela mweenyu.

⁵“Mwaha bowi muthu ola mulili, onodhiha wiinyuwelana mwa aZhudewu aatene a elabo yaatene. Oliye musogoleli a nikuru noholosa na aNazarethi. ⁶Ola teto ahixixa onoonga weela wa nyuba ya Mulugu, mwaha wa eyo nihimmaga [ni efunelo yowi nimuthonge wona mwa nlamulo neehu. ⁷Mbwenye agadhiile musogoleli a anyakoddo Lisiyasi ohunaaka mmadadani mweehu ni kopolo dhijinji, ⁸olamula wi aliba omusumela edhe vameentoni veenyu.]^x Mwamukoha munonona weekiinyu dhaatedhene dhinamusumeliuhuna”.

^x 24.8 Madhu ala kinafwanyeya mmaniivuruni awale.

⁹AZhudewu teto yahitugumanya madhu eewa oomugunddana, yaakwanelihaga dhaatedhene wi seebaribari.

¹⁰Kuminadori ahimvahaga Pawulo etoonyihedho wi awoge. Vevale oliye ahiiraga: “Gihinona wi muhukala yaaka dhijinji muthongaga nlogo ndda, mwa ela ginowiyaakihedha ni oromela. ¹¹Munowaanda waakwaneliha wi kavivirile malabo kumi ni meenddi gigweliliimi oZheruzalemi wi gamweebedhe Mulugu. ¹²Aliba ogisumela kigifwanyile gikanganaga ni athu naari gaaholosaga athu mu nyuba ya Mulugu, naari mu nyuba dha matugumano, naari muluwani. ¹³Ala kinaanda wooniha ebaribari wa nda dhinagisumeliisuna. ¹⁴Vano miyo mwa yego emohi ginorumeedhela vameentoni veenyu wi ginomweebedha Mulugu a makolo eehu mooligana Dila eyene aliwa eneeriisu sa nikuru nooholosa. Ginororomela dhaatedhene dha Malamulo teto ni dhilebiwe dha anamavuhulela. ¹⁵Gihikalana ojejihedha mwa Mulugu wona teto ojejihedha winna aliwa wi onoodha okalewo ovenyihiwa muukwani wa ale owogoowa mirima teto ni ootakala mirima. ¹⁶Mwaha wa dhedho ginowiilibihedha mudhidhi dhaatedhene weedda ni murima woweela vameentoni va Mulugu ni athu.

¹⁷“Ngamalile yaaka dhijinji ode wa Zheruzalemi gihidha wi gidhena mvahi wa athu oorabula a nlogo naaga ni okutha mikutho. ¹⁸Giiragana dhedhi, aZhudewu yahigifwanya mu nyuba ya Mulugu ngali oweelihiweene, kawaatugumane athu, naari nthapa. ¹⁹Mbwenye ehikalawo aZhudewu amohiwa a oAziya, aliwa bafwaneelele okala va wi egisumele vameentoni veenyu akala ehikanna mwaha ni miyo. ²⁰Naari alena eli va ewoge mwaha wootakala ogifwanyiliisuna, vaaliimi va Nikuru neewa na apogo a aZhudewu. ²¹Mbwenye gihiira yego emohi, gahikuwa vameentoni veewa, giira: ‘Peeno ginonthongiwa mwaha wowi ginovejihedha ovenyihiwa muukwani’ ”.

²²Felixi anonelemo pama dha Dila ele, ahihiyedhedha muladdu ole, wiira: “Afiya musogoleli a anyakoddo, Lisiyasi, gineere othonga muladdu waawo”. ²³Vevale ahimulamulaga sinturiyawu^y wi amwiing'anelege Pawulo, mbwenye amvahege otapuwa omohi, aahiyege akwaaye edheege omukamihedha.

²⁴Egavirile malabo vang'ono, ahidha Felixi ni mwihiyanaaye, Dirusila, aali muZhudewu. Ahimwiithanahaga Pawulo, ovuruwana dhawogigiiye dha omuroromela Yesu Kirixtu. ²⁵Pawulo awogagave dha egumi yowogoowa teto oowogaga dhowihiiha weeka oli okoodda dhootakala ni dhowi Mulugu onoodha aathonge athu, Felixi ahoova, omwaaddela, wiira: “Dhiinova baahi! Odhowe, gafwanya mudhidhi ginowuwiithana”. ²⁶Oojjihesa wi Pawulo eere omvaha korowa oomwiithanesa wiinddi-wiinddi, ethapanyaga.

^y 24.23 *Asinturiyawu* yaali asogoleli a anyakoddo zana (100) a aRoma.

²⁷Dhigavirile yaaka biili, Porosiyo Fexto ahihaba omwene wa Felixi. Vano oliye afunaga waahagalaliha aZhudewu, ahimwihya Pawulo mu-kaambura.

Osumeliwa wa Pawulo vameentoni va Fexto

25 ¹Egavirile malabo maraaru Fexto ahifiya murudda ole, ahivenya nluwa na oSezareya, ogwelela^z oZheruzalemi. ²Wewo apogo a anamakutha ni apogo a aZhudewu yahidhaaga wa oliye osuma miladdu dha Pawulo. ³Yahimulobaga wi aawomele murima aarumihedhe Pawulo oZheruzalemi, vowi yahimureyela musapa wi empe mundila. ⁴Fexto aha-waaddelaga, wiira: “Pawulo onowaang’aneliwa oSezareya, miyo ginaya wewo voohulogela. ⁵Asogoleli eenyu edhowe vamohi ni miyo, akala oliye ohiirana yoothega, yamusumele wewo”.

⁶Ahikala ni aliwa oZheruzalemi malabo matanu ni maraaru naari kumi, vano yahikelaga oSezareya. Obebehini wiwa ahikaraatigi vamppanddoni va othongi, olamula wi adhiwena Pawulo. ⁷Agadhiiwena, aZhudewu yakitile oZheruzalemi yahimurijaga, wambeela omusumela ni dhego dhowoopiha dhijinji, dhedho aliwa dhahandigiwa wooniha wi seebaribari.

⁸Nuwindo, Pawulo ahiyaakihedhaga ni madhu ala, wiira: “Miyo kagithegele Malamulo a aZhudewu, naari nyuba ya Mulugu, naari kagimuthegele Sezari”.

⁹Mbwenye Fexto voofuna waahagalasa aZhudewu, ahimukohaga Pawulo, wiira: “Oneere odhiveliwa ogwela oZheruzalemi wi muladdu waawo wathongiwe wewo vameentoni vaaga?”

¹⁰Pawulo, ahiiraga: “Miyo gili vameentoni va othongi va Kingi Sezari, fiveva vifwaneeliimi othongiwa. Miyo kagaathegele aZhudewu mwa yego eli yaatene wona nyo munoneliinyu pamadhene. ¹¹Akala gihikanna yoothega teto akala gihiira yego yoofwanelela opiwa, kaginakoooda opiwa, naari. Mbwenye akala ndo dhinagisumeliisuna kahuwo dha ebaribari, kalivo muthu onakwanihe ogipeleka wa aliwa. Miyo ginafuna gathongiwe ni Sezari”.

¹²Vevale Fexto agathapanyile ni nikuru na asamasowa aaye, ahimwaa-kulaga Pawulo, wiira: “Vowi onafuna wathongiwe ni Sezari, wa Sezari onodhowa”.

Osumeliwa wa Pawulo vameentoni va Agiripa

¹³Egavirile malabo vang’ono mwene Agiripa ni murogoriye Berinise, yahifiyaga oSezareya wi yamulojele Fexto. ¹⁴Agaloglewo malabo

^z 25.1 *Sezareya* oli seresere ya Nyaza Mediteranayo; Zheruzalemi oli omwaangoni, bu mwahaya eneereeliisu onadhowa oZheruzalemi onooewelega.

majinji Fexto ahimwaaddelaga mwene ole mwaha wa Pawulo. Fexto ahimulobaga Agiripa wi amukamihedhe mmoobuweleloni mwaaye, wiira: “Mulobwana mmohi ohuhiyiwa mukaambura ni Felixi. ¹⁵Ngadhowile oZheruzalemi, apogo a anamakutha ni apogo a mutugumano dha aZhudewu yahimusumela, elobaga wi Pawulo akoniwe ni opiwa.

¹⁶“Miyo gahawaakulaga, giiraga: ‘ARoma kilemeelele omukona muthu ahinagumane vamohi ni aliba omusumelaya wi akalena mpatha wowi-yaakihedha enamusumeliisuna’. ¹⁷Nuwindo, aliwa egadhiile wuno, nlabo nooharela, voohulogela, ngakaraatile vampanddoni va othongi, gahilamulaga wi adhiiwena Pawulo. ¹⁸Vano aliba omusumelaya egavenyile, kayaamusumelena dhego dhowoopiha nde dhajehiimi wiiwa. ¹⁹Mbwenye yawogile ya dhilemeelelo dha aZhudewu teto dha muthu oneeriwa Yesu okwile, Pawulo amuwogiiye wi ohukalawo. ²⁰Vowi miyo kaganonile masayeleyo mwaha ola, gahimukohaga akala oofuna odhowa oZheruzalemi wi muladdu waaye wathongiwe wewo. ²¹Mbwenye Pawulo ahilobaga wi afugeliwe mukaambura wi athongiwe ni Kingi Sezari. Vevo gahilamulaga wi aang'aneliwege ofiyedha gaande omurumiha wa Sezari”.

²²Nuwindo, Agiripa ahimwaaddela Fexto, wiira: “Miyo teto ginofuna omwiiwa mulobwana oyo”. Fexto ahimwaakulaga, wiira: “Menselo onoomwiiwa”.

²³Nlabo nooharela ahidha Agiripa ni Berinise ni wiigayiha, yahivolowaga muthego mulubale vamohi ni asogoleli a anyakoddo ni alobwana oovuwa a muluwani. Fexto ahilamulaga wi adhiiwena Pawulo. ²⁴Vevale Fexto ahiiraga: “Mwene Agiripa ni nyo mwaatene muli veva ni hiyo, munomooni mulobwana ola. AZhudewu aatene a oZheruzalemi ni a wewuno yahiniloba mookuwa wi ola kafwaneelele okalawo. ²⁵Mbwenye miyo goonile wi keerilena yego yoofwanelela opiwa. Mwiinya afunaga wi athongiwe ni mwene a oRoma, gahuubuwelela wi gimurumihe. ²⁶Mbwenye wa oliye kaginna yego yoofwanelela omulebela nabwiya aaga. Mowindala gihimudhana wa nyo, tthabwa-tthabwa wa nyo mwene Agiripa wi namukohesesa, gikalena yoofwanelela oleba. ²⁷Miyo ginwoona wi kahuwo yapama omurumiha munyakaambura ohuwogiwe muladduya osumeleliwiiye”.

Wiyaakihedha wa Pawulo

26 ¹Agiripa ahimwaaddelaga Pawulo, wiira: “Nnowuurumeedhiha wi owoge madhu owiyaakihedhana”. Nuwindo, Pawulo ahivenyihaga ndada naaye, wambeela owoga dhowiyaakihedhana, wiira: ²“Nyo mwene Agiripa, miyo ginowuubuwela wi gihireelihiwa okala vameentoni veenyu peeno wi giyaakihedhe dhaatedhene aZhudewu dhinagisumeliisuna, ³mwaha wowi miyo gihinona wi nyoovo muhunona pama

meeddelo maatene a aZhudewu teto muhunona mwaha wa dhoovaanyi-hana dheehu. Mwa ela ginowuulobani wi mugivuruwane ni ovilela.

⁴“AZhudewu aatene ehinona dha meeddelo aaga wambeela wihihmani waaga, naari elabo yaaga yoobaliwela, naari oZheruzalemi. ⁵Aliwa ehiginona wale. Yafuna enowiirela onamoono wi gaali mFarizi, goweeddelo magano maatene a nikuru noolibihedha ndda. ⁶Peeno ginothongiwa mwaha woojijhedha Mulugu waaroromelihiye makolo eehu. ⁷Mahimo kumi ni meenddi a nlogo neehu enojijha waakwanelihiwa poororomeliha emohive, emweebedhaga Mulugu mwa ntidi mutana ni mahiyu. Mwene Agiripa, bu mwaha woojijhedha wula onagisumelela aZhudewu. ⁸Nyo aZhudewu, mwaha bwaddi munoobuweleliinyu wi kadhinaandeya Mulugu waavenyiha athu muukwani?

⁹“Vowambeela ebaribareene miyo goobuwela wi yaali yoofuneya wi giirena dhego dhijinji gihihe ndina na Yesu muNazarethi. ¹⁰Mowindo gahiirana dhego nda oZheruzalemi. Ngaakelile owodha wa apogo a anamakutha, gowaafugela mukaambura aKirixtu ajinji, goorumeedhela yaakoniwaga ni opiwa. ¹¹Dila dhijinji mu nyuba dha matugumano dhaatedhene gowaarabuliha, gooxixa wawiriha wi emunyemulege Yesu. Mwaha wa owali waaga goovenya waaharaharaga aliwa naari mmaluwani oode.

¹²“Mwaha wa mabasa alena gahimaruwa odhowaga oDamasiku ni othongi wa apogo a anamakutha. ¹³Mbwenye, Mwene, gidhowaga mundila, yaakwanaga wora neekumi nabili, gahoono waara woodheela odhulu, waara wule waali wookwaranya nduwa, wahigaapelela ni alobwana yadhowaga ni miyo. ¹⁴Aatene nahitongwelaga vati, vano gahiwwaga ndhu nigaaddelaga ni mu ewogelo ya eHeberi, niiraga: ‘Sawuli, Sawuli, onagiharaharela ddi? Ndo oneeporosa weeka wona ng’ombe enaddwadha mukumbuzo wa makambuzi aaye’.

¹⁵“Nuwindo, miyo gahikohaga, wiira: ‘Muli aani, nabwiya?’ Vano ahigaakula, wiira: ‘Miyo gili Yesu, oyene onamuharahariwe. ¹⁶Ovenye wiimele, miyo guhuwooneyela wi guusakule okale mwiimeleli aaga ni namoono wa dhedho dhooniliwe naari dhedho dhinadhiimi guwoonihe. ¹⁷Gineere wuuvulumusa wa athu aawo ni wa athu oode, wa ayene ginoorumiimi ¹⁸wi waafugule meento eewa wi erugunuwe oyiihini, ekale mowaara, erugunuwe mu othongi wa Sathana, yiipeleke mu othongi wa Mulugu wi yaakele oleveleliwa wa dhoothega dheewa, yaakele mburo vamohi ni athu aatene eli oweelihiwa odheela mwa nrromelo na miyo’.

¹⁹“Mwene Agiripa, miyo kagavaanyile dhego Mulugu dhagoonihiliye. ²⁰Mbwenye gahilaleyela, vowambeela a oDamasiku, a oZheruzalemi, a mirudda dhaatedhene dha oZhudewa ni athu oode wi etthwaruwe, erugunuwele wa Mulugu, yiiregena mabasa enooniha wi ehithwaruwa. ²¹Mwaha wa dhedhi aZhudewu amohi yahigihidda ngali mu nyuba ya Mulugu oxixa wi egipe. ²²Mbwenye mwaha wa okamihedhiwa ni

Mulugu, gihikalawo ofiyedha peeno, siyeene giimeleliimi giirelaga onamoonna wa ang'onong'ono ni alubale, gihiwogaga dhego dhimohi, dhihili dhedho dhawogile anamavuhulela ni Mozezi wi dheere opadduwa: ²³Soofuneya wi Kirixtu arabulihwiwe, akale muraaji ovenyihwiwa muukwani wi alaleyele waara wa nlogo naaye ni athu oode”.

²⁴Vevo Pawulo awogagave madhu owiyaakihedhana ndale, Fexto ahigwelihaga madhu, wiira: “Ohukalana aneba, Pawulo! Osuuzesesa waawo ohuutatamula aneba!”

²⁵Vano Pawulo ahimwaakulaga, wiira: “Fexto ooriiheya, kaginna aneba! Moohiyaniha, ginawoga madhu a ebaribari atthotho. ²⁶Dhaatedhene dhedhi soononeya wa mwene Agiripa ginoowoganaani mochoova, gihinona wi kavili yego yahinoniliye, kilivo yiireyile mburo wooviteya. ²⁷Mwene Agiripa, munorumeedhela dha anamavuhulela? Gihinona wi munorumeedhela”.

²⁸Vano mwene Agiripa ahimwiirelaga Pawulo: “Onoobuwela wi mwa mudhidhi wooyeva ola onogikwekwetha wi gikale muKirixtu?”

²⁹Pawulo ahimwaakulaga, wiira: “Ginomuloba Mulugu wi mwa mudhidhi wooyeva, naari mudhidhi woolapela, ahili nyeeneve mbwenye athu aatene enagiwa peeno ekale wona miyo, nihiyane fingwi dhi”.

³⁰Mwene Agiripa ni kuminadori Fexto teto Berinise ni aatene yakaraatilege ni aliwa yahivenyagavo, ³¹ekumaga yoowogaga kadda muthu ni mukwaaye, yiiraga: “Muthu ole kaneera yootakala yoofwanelela opiwa naari omuhela mukaambura”.

³²Vano mwene Agiripa ahiwogaga ni Fexto, wiira: “Mulobwana ola neere omutapula aheere ahiloba wi athongiwe ni Sezari”.

Wambeela wa olendo wa oRoma

27 ¹Dhigeevananeliwe wi nidhowe wItaliya ni mwanddeya, Pawulo ni anyakaambura amohi yahipelekiwa mmadani mwa sinturiyawu,^a ndina naaye eeriwa Zhuliyu, a nikuru na anyakoddo neeriwa Aguxtu. ²Nahigwelaga mmwanddeyani wa oAdaramatinu, wafunaga ovira seresere ya oAziya, nahimaruwaga, oveleliwa ni Arixtariku, mMasedoniya a murudda wa oTesalonika.

³Nlabo nooharela nahifiyaga oSidoni, vevale Zhuliyu ahimuwomela murima Pawulo, ahimurumeedhihaga wi awoone akwaaye wi emvahe dhamuhaleela. ⁴Nigamaruwe wewule, nahiwereweraga seresere ya moonoo wooja wa eliga ya Xiperi, nithawaga pevo yadheelaga wafunigiihu odhowa. ⁵Nigakwaranye seresere ya oSilisiya ni oPamfiliya, nahiimelaga nluwa na oMira, murudda wa oLisiya. ⁶Wewule sinturiyawu ole ahifwanyaga mwanddeya wa oAlixandiriya wadhawaga wItaliya, nuwi-

^a 27.1 *Asinturiyawu* yaali asogoleli a anyakoddo zana (100) a Roma.

ndo oliye ahinigwelihaga. ⁷Malabo majinji needdaga vang'ono-vang'ono, nafiyile moorusa waaddamela oKiniddo. Pevo kayanihiyile odhowave, mowindo nagelege eliga ya oKereta, nahiviraga seresere wahaadheela pevo, waaddamela oSalimona. ⁸Naheeddaga seresere ya Kereta moora-bula, nahifiyaga mburo oneeriwa Nruwo Napama, waaddamela nluwa na oLaseya.

⁹Mwaha woovira mudhidhi mujinjeene teto Nlabo Noothuga^b nahiviraga, olenddo waali wowoopiha, mwaha wa ela Pawulo ahawaaddelaga, wiira: ¹⁰“Alobwana, miyo ginwoona wi olenddo weehu onaakale wowoopiha, mwanddeya ni dhoobodha teto dhigumi dheehudha dhinaakale mwa dhowoopiha”. ¹¹Mbwenye sinturiyawu ole ahikwekwethiwaga ni nameeddiha mwanddeya ni mwinyaya wi ehiimele, okoodda dhawogile Pawulo. ¹²Mwaha wi nruwo ndde kanaali napama wi elogelevu mudhidhi wooddiddila, ajinji yahiiwananelaga dhookwaranyavo wi yoone akala yaafiye nruwo na oFenisi wi evireliwe wewo mudhidhi wooddiddila. Fenisi naali nruwo na oKereta nathiithihedhiwa pevo yuulubale ya mudhidhi wooddiddila.

Pevo yowoopiha munyaza

¹³Pevo yafunigiwa egambeele wooba vang'ono-vang'ono, aliwa yoobuwelaga wi ehifwanya mpatha wowiirana dhoofuna dheewa, mowindo yahimaruwaga varuwoni vale, oharaga seresere ya eliga ya oKereta. ¹⁴Mbwenye vihinavire mudhidhi mwijinji, yahidhaaga mowaaguva pevo yuulubale, pevo eyo eneeriwa Yurakiloni. ¹⁵Mwanddeya ole wahithukuliwaga ni pevo, vowi kanaandile wang'anana ni pevo, nahihiyaga owana, nahirumeedhela wi mwanddeya othukuliwe ni pevo. ¹⁶Nigathiithihedhiwe ni eliga emohi yeethaniwa Kawuda, nahaakwanihaga moorusa omaga mwanddeya weehu mung'onong'ono.^c ¹⁷Nuwindo, yahithukulaga mung'onong'ono ole, ohela mmwanddeyani mulubale, oranddela mulubale ni mingoyi wapeeleliha wi olibe, yoovaga wi pevo enaatukumele seresere ya oLibiya. Vano yahikithedha aankora^d munyaza, mwanddeya weeddaga ni pevo. ¹⁸Wona noorabulihwi vajiinji ni pevo yuulubale, nlabo nooharela yahambeelaga ovokedha dhoobo mu nyaza. ¹⁹Nlabo na neethaaruu aliwa ni madada eewa yahivokedhaga mu nyaza yeela dheeddihiwana mwanddeya. ²⁰Vano nigali malabo majinji nihoonaga nduwa naari ttenderi, pevo yahididelave nahifiyedha ohiya ojejihedha wi nneere ovuluwa. ²¹Vigavirile malabo majinji aatene ehijaga, Pawulo ahiimelaga vaari veewa, wiira: “Alobwana, mwaheeweleele dhawogiimi nde wi nihivenye-

^b 27.9 *Nlabo Noothuga* Ndda nnatapulela nlabo nddo wakala mathanga aZhudewu neereya mweeri wa Owutuburu. Athu yahinona wi nddo navira weedda mu nyaza wakala wowoopiha mwaha wa pevo yuulubale. ^c 27.16 *Mwanddeya dhing'onong'ono* dhamageleliwa ni mwanddeya dhili dhaatene dhuulubale. Dhaali dhedho dhaakamihedha athu wi evulumuwe vakala dhoorusa vaari va nyaza. ^d 27.17 *Aankora* waali mugogo woonyemela onalibihwana mwanddeya weemela wi oheede.

wo oKereta, dhego kadhanoongeye dhithathiya mowinda. ²²Mbwenye vano ginowuwaaddelani: Mulibe mirima mwaha wi kalivo mmohi mwa nyo onaathathile egumi, mbwenye mwanddeya ononoongeya. ²³Mwaha wi mahiyu a peeno alena, ohugooneyela mungero a Mulugu oli mwiinya a miyo, ginamweebedhiimi, ²⁴wiira: ‘Pawulo, ohoove! Soofuneya wi wafiye vameentoni va Kingi Sezari. Mwaha woowoma murima waaye, Mulugu ohaavaha egumi aatene eli ni we’. ²⁵Alobwana, mwa ela mulibe mirima! Miyo ginomuroromela Mulugu wi dhineere wiireya dhedho dhigaaddeliye. ²⁶Mbwenye enofuneya wi niburuleliwe veeligani”.

Ovuluwa wa aatene yaali mmwanddeyani

²⁷Vaari ni vaari va mahiyu va nlabo na neekumi ni mannayi, ntuku-miwaga ni pevo munyaza ya oAdiriyatiku, anamalaba a mmwanddeyani yahuubuvelaga wi nnowaaddamela epaddi ya ode. ²⁸Vano egapimile oddiha wa nyaza yafwanyilege ogali meeturu makumi maraaru ni matanu ni nimohi. Nigeeddile vang'ono, yahipimaga teto ofwanya egali meeturu makumi meenddi ni meeturu matanu ni meenddi. ²⁹Aliwa yahidhaaliwaga woova, yuubuvelaga wi mwanddeya onogumana ni mabwe a seresere. Yahaavokedhaga mahaankora mannayi mundduli mwa mwanddeya, olobela wi ode ose. ³⁰Mowindo anamalaba ale yuubuvelaga othawa mmwanddeyani, yahikitelihaga mwanddeya mung'onong'ono munyaza, okalagahi enafuna yaavokedhe mahaankora osogolo wa mwanddeya mulubale ole, ³¹mbwenye Pawulo ahimwaaddelaga sinturiyawu ni anyakoddoya, wiira: “Athu ala yahiikala mmwanddeyani mu, nyo kamunavuluwa”. ³²Mowindo anyakoddo yahipadhaga mingoyi dha mwanddeya mung'onong'ono, ohiya wi osuse.

³³Ode ohunasese, Pawulo ahaalobaga aatene yaaligi mwemule wi eje yego, wiira: “Peeno nlabo na neekumi ni mannayi mujejihedhaga ni woova, muhujaga yego. ³⁴Ginowuulibihani wi muje yego, soofuneya wi mvuluwe. Vowi kalivo mmohi a mwa nyo onayeleele naari nthithi nimohi”. ³⁵Agawogile ndo ahithukulaga mukaathe, omutamaalela Mulugu vameentoni va athu aatene, oliye ogwaddanya, wambeela oja. ³⁶Vevale aatene yahilibaga mirima, ojaga. ³⁷Hiyo aatene mmwanddeyani naaligimo athu mazana meenddi ni athu makumi matanu ni meenddi ni athu atanu ni mmohi (276). ³⁸Egajile yahirubalaga, omuthathilela tirigu munyaza, mwanddeya ovevuwa.

³⁹Ogasile kayadidelege elabo yaaligiisu, mbwenye yahoona muwulo wanna museenga, yahiiwananela oxixa ovolosiha wewule. ⁴⁰Yahipadhaga mingoyi dhamagiwena aankora, ohiya mwinko, otapula teto mingoyi dhahiddeliisuna lemi, yahigwelihaga vela yoosogolo wa mwanddeya wi weedde ni pevo, aliwa orugunusedha omusegani wewule. ⁴¹Mbwenye ogafiyile vagumana mahinje oothamaga, mwanddeya ole wahisamaga.

Epaddi yoosogolo oddora, kuheeddaga, epaddi ya mundduli okarakasuwa ni kopolo ya kuluzi.

⁴²Anyakoddo yahiiwananelaga dhowaapa anyakaambura wi mwa aliwa ahikalevo onaarabe, athawe. ⁴³Mbwenye sinturiyawu ole, afunaga dha omvulumusa Pawulo, ahaakooddihaga wiirana ndo. Vowambeela ahilamulaga wi aatene enaakwaniha oraba elupele mwinko, efiye ode. ⁴⁴Nuwindo, ahaalamulaga ale yahalilege wi ethukule matabwa naari dhooparuwa dha mwanddeya wakarakuwege. Mwa mukalelo oyene aatene yahifiyaga ode.

Ofiya veeligani ya oMalata

28 ¹Vano nigavulumuwe fooniligiihu wi eliga ele yeeriwa Malata. ²Athu a wewule yahinaakela, oniirela dhapama vajinji, mwaha wa muzongwe arubwaga ni oddiddila yahitubaanyaga munddo. ³Pawulo ahidhowaga oddodda kuni, ahihelaga vamunddoni. Mwaha wooviha, mukunini mule mwahikumaga evili, omuluma, omuwadeelela vandadani. ⁴Athu a wewule egoonile nyowa ele egamuwadeelele vandadani vaaye, yoowogaga mmohi ni mukwaaye, yiiraga: “Ebaribareene, muthu ola nipanga, naari agavuluwile munyaza, mbwenye Wogoowa^e kanamwihiye wi akale mugumi”. ⁵Mbwenye Pawulo ahitatelaga vamunddoni nyowa ele, kayamporosilege. ⁶Athu ale yajejihedhaga wi mwiili waaye weere odhiba, naari eere otongwa mowaaguva akwe. Voovira mudhidhi woolapeleene emwiing'anaga, egoonile wi kilivo yego enamwiireyela, yahicinja moobuwelo eewa, wiira: “Ola mulugu”.

⁷Murudda olene wahikala midda dha Pubiliyo, oyene aali mpogo a eliga ele, ahinaakelaga, onivaha mburo, nahikalavo malabo maraaru. ⁸Baabi a Pubiliyo oobulela vakamani mwaha wa nipaddawe ni ovaluwa. Pawulo ahivolowaga wi amoone, ahimulobeelaga, omuhela madada, omuyiliha. ⁹Dhigapadduwe nda, aredda ajinji a veeligani vale yoodhaaga wa Pawulo, oliye waayilihaga. ¹⁰Vano yoonivahaga nriho vajinji teto nimaruwaga, yahinivahaga dhaatedhene dhanihaleelaga.

Ofiya wa Pawulo oRoma

¹¹Dhigavirile mweeri miraaru, nahimaruwaga ni mwanddeya wa oAlixandiriya wavireliwe vevale mudhidhi wooddiddila, wanna etoonyihedho osogolo yowi Anapata Milugu.^f ¹²Nigafiye nluwa na oSirakusa nahikala wewo malabo maraaru. ¹³Nigavenyile wewo nahifiyaga oRezhiyo. Nlabo nooharela yahambeelaga pevo yoofuneya, nahimaruwaga,

^e 28.4 Wogoowa naali ndina na mmohi mwa amilugu eewa. ^f 28.11 Anapata Milugu yaali yoohadhihela ya alobwana abiili yatopiwe osogolo wa mwanddeya. Eyene mu eGerego yeethaniwa Diyosikuru.

nlabo nooharela ofiya oPutiholi. ¹⁴Wewule nahaafwanya aKirixtu amohi, yanilobile wi nikale ni aliwa malabo matanu nameendi, mowindo nahifiya oRoma. ¹⁵Addibila a wewule egeewile, yahidha, ogumana ni hiyo omusika wa Apiyo, amohi oNyuba Thaaruru dha Aleddo, onijejiha-ga. Pawulo agawoonile ahivahedha mahala wa Mulugu, oliba murima. ¹⁶Nigavolowile nluwa na oRoma Pawulo ahirumeedhihiwa okala vaaye-vene ni munyakoddo oomwiing'anela.

Mabasa oolaleya a Pawulo oRoma

¹⁷Vigavirile malabo maraaru Pawulo ahawiithanihaga asogoleli a aZhudewu aatene a wewo, egatugumane ahawaaddelaga, wiira: “Addibilaga, miyo gihithegele nlogo naaga, naari dhilemeelelo dha makolo eehu, gihimagiwa oZheruzalemi, opelekiwa mmadani mwa aRoma, ¹⁸aliwa vagikohiliwa, yoofuna ogitapula mwaha wi kayagifwanyilena muladdu wofwanelela opiwa. ¹⁹Mbwenye mwaha wookooda aZhudewu, miyo gahiwaddihedhiwa odha wuno wi githongiwe ni Sezari, kaginna yoosumela nlogo naaga, naari. ²⁰Mwahaya buuyene guulobeliimini wi guwooneni, guuwogenaani, gihimagiwa ni fingwi ela mwaha wa yoojeji-hedha ya aEzarayeli”.

²¹Vano aliwa yahaakulaga, wiira: “Hiyo kanaakelile kaarata yookumela oZhudeya enawoga dha we teto kadhiile muKirixtu mmohi wi awoge obure wa we. ²²Mowindo dheere oniriyela waheere onaaddela dhinoobuweliwe, mwaha wi nihinona wi vili vaatevene nikuru noholo-sa nddo nnokooddiwa”.

²³Vevo aliwa yahiiwanana nlabo nowi egumanele, yahidhaaga athu ajinji vaade va Pawulo. Vano wambeela bebehi ofiyedha ciguwo, aatapulelaga, eerelaga onamoonna dha Omwene wa Mulugu. Ahixixaga wakwekwethela Yesu wi di Misiya, alabihaga Malamulo a Mozezi ni anamavuhulela. ²⁴Yahikalagavo amohi yakwekwetheye ni nde dhawogiliye, mbwenye amohi kayarumeedhe. ²⁵Yahambeelaga okangana vakaleligiwa, Pawulo agoonile wi amohi kayafunaga wiiwa efunaga obalaleya, ahiwogaga, wiira: “Muneba Woweela wahiwoga pama wa makolo eenyu, odheela wa namavuhulela Ezaya, veeriliwa:

²⁶ “Odhowe wa nlogo nddo wawaaddele wi:

Nyo muneerege ovuruwana,
mbwenye kamudha mwiiwelelagamo.

Nyo muneerege osugwa,
mbwenye kamudha mudidelaga.

²⁷Vowi mirima dha athu ala dhili dhovaadda,
mabaruru eewa kineewa, ehaafuga meento eewa
wi ehoone ni meento eewa.

Yaheere ehiira ndo,
meento eewa yeerege woona,
obaruni weewa weerege wiiwa,
yeerege ononelamo moobuwelo eewa,
aliwa yeere owelela wa miyo,
miyo geere waayiliha!’ ”^g

²⁸Pawulo aheenjedhedhagave, wiira: “Vano munone wi ovulumusa wula wa Mulugu wahirumihiwa wa athu oode. Aliwa enoodha yiiwe”.
²⁹[Agawogile madhu alena aZhudewu yahimaruwa, vaari veewa kavaali wiiwanana.]^h

³⁰Pawulo ahilogela wewule yaaka biili akalaga vaade vooboliha wawaakeliye aatene yamusayela. ³¹Owaalaleyela dha Omwene wa Mulugu, owaasuuziha dha Nabwiya Yesu Kirixtu mooliba murima, ahilivo amwihiiha.

^g 28.27 Ezaya 6.9-10 ^h 28.29 Madhu ala kinafwanyeya mmaniivuruni awale.